

## Tusi Faitau Aso 2018

### Reading the Bible with your feet ... heart and head 'Faitau ma vae, ma le loto, ma le mafaufau'

E faatalofa atu i le paia ma le mamalu o le Ekalesia, o le silisili ese o le Atua alofa, ua tatou aulia ai lenei tausaga fou ma le manuia, i lona alofa ma lona agalelei. I lenei savaliga i lenei tausaga, o mea e tele o leā tatou feagai ai ma feau ma galuega, o faatinoga ma tiute tauave, o le malosi ma le atamai, o atina'e ma sailiga, o le tausiniō ma le olaga aoaoina, o le mana ma le malosi o le Atua na te tautaiā la tatou savaliga i lenei tausaga fou, ma le manuia i lona faatasi mai. Talofa lava.

O le tatou Tusi Faitau Aso ua avea ma Ta'iala le Ulutala e faapea: 'Faitau ma vae, ma le loto, ma le mafaufau'. O le tusi IBRA (International Bible Reading Association) ua avea ma tusi e mafaufau ai tagata uma Kerisiano o le lalolagi, ua avea ma taiala e faatino ai le Tapuaiga i aso taitasi o lenei tausaga. O lenei ua faaliliu atu e lo tatou Ofisa, le Susuga ia Emau Petaia F.S. Setefano Pouli Lefale F.S. le faletua o Usugafono Uaea Satele, faapea ma lo'u tagata.

O Tusitala o lenei Tusi ua tusia e tagata mai Aferika i Saute, Initia, Argentina, Brazil, Nigeria, Samoa, Amerika, Caribbean, Sweden, faapea malo aufaatasi ma Peretania. O loo taoto ai le Upu taua mo Ta'ita'i o Mālō - 'A place to stay' - 'O le ā'iga mo au' - e pei ona faamatalaina e Hosea, Faataoto, Kolose, Mareko, faapea le Tusi a le fai Salamo, e pei ona faailoa mai e le Faatonu o Nathan Eddy. O mafaufauga i lenei taiala, i nei vaitaimi ua tatou feagai ma Malo ua aga'i i finauga, ua faalialia ai le malosi o Ta'ita'i o Atunuu ma le maua se nofo fetausiai. Ua tatou maua tala mai Malo i Matu ma Sauté i Sudan, faapea Suria, ma Malo i le Middle East ua le nonofo lelei, e faapea foi Aferika ma ona Malo e 25 ua faia palota i nei tausaga e lua, aisea? E faapea foi ona vaaia o suiga Faaupu fai o Ta'ita'i o Malo i le atu Europa, i Malo soofaatasi ma Peretania faapea Amerika. O vaitaimi ua tula'i mai ai o fesili fou, ma fesili faigatā i Ta'ita'i o Malo, e foliga ua le maua, po ua tau mafaufau Ta'ita'i, i se tali mo tagata.

O le manatu lea o le Tusi Faitau Aso, e tatau ona toe silasila i le faiva Faa-Ta'ita'i faapea le Tusi Paia ma lona faailoa mai. O le a se vaaiga i se Ta'ita'i lelei? O a ni faailoga tāua ua avea ai se tagata e avea ma Ta'ita'i?

Ua avea pea le Upu Fou a le Alii mo i tatou i aso uma, peā faitau i le Afioga a le Alii i le loto, ma le mafaufau, ma o tatou vae. O le a le uiga o lea manatu? E taua tele o nei vaaiga, atoā ma le fetalai mai a le Atua, e tusa ma lona finagalo.

Ua faailoa mai e Lucy Winkett e avea ma Upu Tomua, e faailoa ai taiala mo le Tusi Faitau Aso mo lenei tausaga:

Pe a faitau le Tusi Paia ma le loto, e lagona le pai mai a le Upu i o tatou loto ma o tatou tino. Tatou te au faatasi ma le tagi a Mareta ina ua maliu lona tuagane o Lasalo, e faapea lopu ma mafātiaga ina ua oo mai i lona ā'iga, e faapea foi le

vaaiga ia Iona ma lona loto le fautuaina, faapea Sara ma lana ‘ata’ata, e pei e le talitonuina o le a fanau mai se tama mo laua ma Aperamo peitai, ua tatou iloa le pai mai o le mana faamalolo o Iesu Keriso i o tatou loto. E faapea le agaga o le Tusi Faitau Aso a le Alii, ma le pai mai o lona finagalo ao faitauina le Upu Fou mo lenei aso.

E faapea foi peã faitau ma le mafaufau atoa, o le a tele le fia su’esu’e ma le fia iloa o le gagana Eleni, faapea le gagana Eperu, e pei ona tusia ma faaliliuga e ‘matua o faiva’(theologians), e fesoasoani mai ma faamatalaina a’oa’oga taua. Pea faitau ma le mafaufau, ona tatou maua lea o le tulafono o le alofa, e manatua ai le Atua na te faamatala maia lona finagalo i o tatou loto, e faia ai faaiuga lelei. Pe a faitauina le Afioga a le Alii ma o tatou vae, tatou te faailoa atu le tala lelei mo i tatou ma aso uma. Ia le faia ma se manatu e tusa ma o tatou manatu, a ia faia e tusa ma le faaali mai a le Atua i ai tatou ma aso uma.

E faapea tala o tagata ua faailoa mai e le Tusi Faitau Aso, o tala o tagata ua liliuina, ma toe fuatai olaga, ua faamanuia mai le Atua e ala ia Keriso Iesu ma le Agaga ua faaolaina le tagata agasala, pea fai e talitonu ma faatuatua ia te Ia.

Ia faitau le Tusi Paia i ou vae, ma le mafaufau, ma le loto atoa – O le toe fuataiga o i tatou, e le mana o Keriso Iesu.

Ia manuia tele lau tapuaiga

L.Nuusila Samuelu. F.S.

**Ia tutusa galuega ma le olaga**  
**Balancing in Work and Life**  
**3 Malologa – Rest**

Saunia : Carla A. Grosch-Miller

**Aso Gafua Oketopa 1, 2018 “O le amo e māmā” A yoke of light**

**Tusi Faitau : Mataio 11 : 25 – 30**

**Matua:** ff. 28-30, *Ia outou o mai ia te a’u, o outou uma o e tigaina ma mafatia i avega, o a’u foi e malolo ai outou. Ia outou amoina la’u amo, ma ia outou faaa’oa’o ia te a’u, auā o a’u lē agamalu ma le loto maulalo; ona maua lea e outou o le malologa mo outou agaga. Auā e avegofie la’u amo, o la’u avega foi e māmā ia.”*

Ia o lenā lo’u agaga ua nutimomoia ma ua faapea mai, o au galuega, Iesu, ua fai ma avega mamafa tu ia te a’u. O ou tagata ua fai ma sasa ia te a’u. Ua e finagalo ina ia ou alofa i tagata uma, a e maise e ua fai mo’u fili, ua faavaivaia ai lo’u loto. O lau taga’i mamao ina ia manuia le lalolagi, ua avega ma mea ua le mafai ai sa’u moe i le po. E le faigofie lau amo ma e le māmā lau avega.

Vagana, se tasi ua e silafia ou te le o iloaina, e faapei o ia (Iesu)na ia tauaveina toatasi ona tiga. E le o a’u o se Atua, e leai foi se pule aoao ia te au. E le tatau ona ou susesueina, malamalama ma mafai ona faia. Ae atonu ona ua ou faamaualuga tele, ua ou manatu ai ua mamafa mai tiute iā te a’u, a o o’u manatunatuga ma lo’u le mautonu, ua faapogisaina ai a’u i se vaaiga lelei.

Ua e molimauiua lou tamā na ia faia le amo i laau mata, ae atonu e mafai foi ona e faia lava e oe ia. Ua e silafia, e sili ona malosi o povi e lua ma le amo e tasi, nai lo le povi e tasi. Ua e ofo mai ea e amo faatasi ma a’u? Ua e fesili mai ea, e tatau ona ou talitonu atu e te taitaiina a’u? Tiai le manatu o a’u lava le taunuuga? Ua e valaauliaina ea ita i se mafutaga, ina ia ou maua ai le filemu ma le agalelei o le Alii, ma faamalosi ai e savali ma le fiafia ma le mautinoa, o lo’o lelei mea uma? O le’a ou talia avega mamafa uma. Ou te siitia lau amo aua e māmā ia. E si’i ae lo’u ulu i luga ma ou vaaia ai lo’u tagata fou ma le lalolagi fou.

**Tatalo:** Faasaoloto a’u mai iā te au lava. Ia fai a’u pei se laau ola, ma ia fausia pei o se amo ua gaua’i i le olioli ma le alofa tunoa, **Amene.**

**Mafaufauga Loloto:** Usu le pese “Ua ou faalogo i le leo o Iesu o fai mai” Tusia: H.Bonar (1808-89). Ia mafaufau atili ai i le pese i lenei aso.

**Aso Lua Oketopa 2, 2018 “Ua lava lea” Enough already.**

**Tusi Faitau : Mataio 14: 13-21**

**Matua:** f.13, *“Ua faafofoga i ai Iesu, ona maliu ese ai lea o ia i lea mea i le vaa i le mea tuufua ua na o ia. Ua faalogo ai le motu o tagata, ona latou mulimuli atu ai lea ia te ia, ua ui a uta mai aai.”*

E masani ona ou faalogo o faapea tagata, a faitau ma sailiili ma le manino i le mau a le au fai-evangelia, le masani lea ona tu’ua e Iesu o ona so’o, a e maise le

motu o tagata. O se lagona ou te le'i talitonu i ai. Ae ina ua ou faitau i le Tusi Paia ma su'esu'e i ai, ona ou manino ai lea.

Ua ou molimauina le tigā alofa ona o lenei tala, ua le mafai ona ou faagaloina. O le tala ua fai i ai faitioga ma faaali ai lagona o tagata. Ae o le molimau a le au fai evagelia, o le tala o lo'o faamanino ai e Iesu lona tu'uese ona mafatiaga ma lona vaivai, ae ua ia fafaga le motu o tagata, ma faamalolo i e mama'i.

I le tuana'i, na ou faalogo ai i le tala lenei, sa ou faapea ona fai, Ioe, ua vave lava le moge oso ma fai loa le galuega auauana atu, ma le manatu ua iloa ma ua mafai ona fai. Peitai ane, ua le faamalieina tagata i sa'u auauanga, ona ua sēsē le faamuamua. Mulimuli ane, e le mafai ona o tatou faasoa atu ni mea e le o ni a tatou ia, ae o se mea itiiti e foa'i mai e le Atua ia te oe, e mafai ona ia faatuputeleina. E manaomia le a'oa'oina ina ia mapu ane teisi, sei utufia ma faatumu lo tatou gaogao faale-agaga, ma mafai ai ona tatou faasoa atu ai i nisi.

E ese le faigata ona a'oa'o atu o le alofa fetu'unai ma le alofa faasoa i tupulaga pe a fai ua mautu ma mausalī le mataupu silisili o le lē alofa i tagata. Faalogo i le faamanatu o le tulafono a le Atua, "Ta e alofa atu i le Atua ma lou tuaoi, e pei ona e alofa lava oe ia te oe." E le mafai ona tatou faasoa atu se mea e le o ia te i tatou, tusa lava pe fesili mai. Ae peitai, tatou te talitonu i le mana o le Atua na te faatuputele mea itiiti, e avagalima ai le manao o le tagata.

**Tatalo:** Le Atua alofa e, ave'ese a'u mai le pule a isi tagata, ina ia mafai ona ou toe maua le avanoa e saili atu ai i lau Afio, ma e faatumu lo'u galala i le vai ola o le faaolataga, **AMENE.**

**Mafaufauga Loloto:** Toe iloilo lau faatāua, Vaai po'o fea o ta'oto ai le valaau a le Atua i lou soifua.

### **Aso Lulu, Oketopa 3, 2018 "Alofa tunoa ua lu'itauina"**

#### **Grace under pressure.**

**Tusi Faitau :** Filipi 4 : 1 – 9

**Matua :** *ff.6-7, "Aua ne'i popole outou i se mea e tasi, a ia faailoa atu o outou manao i mea uma lava i le Atua, i le tatalo, ma le faatoga, atoa ma le faafetai. O le manuia foi mai le Atua, o loo silisili lava i mea uma e manatu i ai, e leoleoina ai o outou loto atoa ma o outou mafaufau ia Keriso Iesu".*

Na tusi atu Paulo i le ekalesia pele i Filipi, a o i ai o ia i totonu o le falepuipui. O se ekalesia itiiti na ulua'i tōtōina i Europa i le vaitau o le totogo ma le 'a'asa o le malo o Roma. O se ekalesia sa le amanaia e le toatele, mā e tele foi ona faafitauli mo le 'au paia. O se ekalesia tau atia'e. E tele tofotofoga ma lu'itau e ofi atu, ae silisili lava fevaevaeaiga i totonu lava o le ekalesia i Filipi.

A'o i ai Paulo i le falepuipui, sa ia faamalosi atu i le ekalesia ia tumau i le olioli loloto i taimi faigata, Ana ou i ai faatasi ma outou, tatou te mafai ona tūtū malos i le talaiga o le tala lelei. Ou te iloa, o le a avea au ma fatiga i tagata, a e maise le faatuputupulaia o le masalosalo i loto o tagata ia te a'u. O le masalosalo lea e

fofo'e ese ai manatu ma lagona le mautonu o tagata, ma faatafea ai i le vai. Ae foliga mai o le loto masalosalo lea, ua le manino ai ia te au le faatauaina o le iloa loloto o le valaauina.

O le autu tonu lea o lenei tusi atu a le aposetolo, o le iloa loloto lea o le Atua. O le manino lea o le Atua, e silafia mea uma ma o le tatou tiute, o le faaolaola o le lamepa o le faatuatua, ao agi afā malolosi o le olaga. Tatou te galulue ma le faamoemoe, o le Atua na te silafia le taunu'uga o a tatou galuega. O le iloa manino lea o fua o le tautino e ala mai meaalofo o le filemu, ma le malamalama.

**Tatalo:** Le Atua e, sei e foai mai le poto ina ia ou talitonu ma talia lau meaalofo o le filemu, **Amene.**

**Mafaufauga Loloto:** Tatou mafaufau i le solo na tusia e Dietrich Bonhoeffer's "By Gracious Powers to Wonderfully Sheltered", na tusia i totonu o le falepuipui i nai masina a'o lei fasiotia e tagata Siamani.

### **Aso Tofi Oketopa 4, 2018 "E le mafai ona tauaveina"**

**You can't take it with you.**

**Tusi Faitau :** 1 Timoteo 6 : 6-10

**Matua :** *ff.6-7, "A o le amio Atua ma le loto mālie, o le oloa tele lava lea. Auā tatou te lei au mai lava se mea e tasi i le lalolagi, ua mautinoa foi tatou te le mafai ona ave ese ai o se mea".*

I le feagai ma le galuega tausi au lotu, na ou iloa ai, o i latou uma e utiuti le fa'asoa e to'a'aga e foai. I le mativa ma le lē tagolima, ua latou iloa meaalofo sili o le ola. Ua latou iloa e o'o uma tagata i faigatā ma puapuaga o le olaga, ae o le agalelei o le fua faatatau lea o le mālō o le Atua.

Sa matou taunuu atu ma o matou ofu fou, ma manatu fou, ae ua a'oa'oina ai i matou i o matou natura faale-tagata peitai, ua faateia matou i aso, masina ma tausaga uma e ao ona matou iloa e uiga ia matou lava. E foliga mai ua matou laki. E tele mea taufasesē e ave ese ai tatou mai le mea moni. O le fepulafi mai o vaaiga ese'ese, o le mase'ese'e o le tele o le 'oa, ma le faaosooso o le tele o mea e faasesēina ai tatou. Ua tatou naunau i le mama auro, ae tatou iloa ane, ua na o se apa memea ua vali i le auro, a tu'u i le afi ona mautinoa lea e le o se mea moni. Ua tatou iloa e tasi lava le fesili taua, O le a le faamoemoe o lou soifua ma lou ola? Aua na tatou omai lava ma le leai, tatou te o foi ma le leai o le maliu o le iuga lea. I le ma lea, tatou te mafatia ma taumafai ia ausia a tatou miti ma mo'omo'oga.

E faigofie lava le fautuaga a le tusi tala. Ia soifua i ala o le Atua e malie ato'atoa ai le loto. O le mataala ma tali atu i le valaau mai o le Atua paia. O le poto e iloa ai ona filifili ma le toto'a mea e finau ai ma le loto maulalo, e talia ai mea e tutupu mai i le olaga. O lo'o i ai le mānava ola i lenei fautua, a e maise o se faamalosi 'au. O le olaga e manomia le taumafai ma faamoemoe i le fesoasoani a le Atua.

**Tatalo:** Le Alii e, aumaia le malosi ma le potou ina ia ou iloa ona faaoga tatou lou malosi ma le ola, **Amene.**

**Mafaufauga Loloto:** Tatala lau tusi siaki toe taga'i iai poo fea o aga'i i ai lou alofa. Toe silasila iai poo ai e tatau ona muamua.

**Aso Faraile Oketopa 5, 2018 “Ua tatau ona e malōlō” Thou shalt rest.**

**Tusi Faitau :** Eperu 4 : 1-11

**Matua :** *ff.9-11, “O lenei, ua tuuina mai pea o le malologa faasapati mo tagata o le Atua. Auā o le ua sao atu i lona malologa, ua malolo foi o ia i ana lava galuega, faapei o le Atua i ana lava. O lenei, ina tatou finafinaiua ina ia sao atu i lona malologa, ne'i ai se tasi e paū i lona faaa'oa'o i lo latou faalogogata”.*

Ua faatonuina e le Atua le aso Sa o le aso e malōlō ai. Ua galo ia te au, sa ou faapea o le aso ua atofaina e malōlō ai, tausami i meaai paleni ma faamalosi tino ina ia malōlōina i le tino, mafaufau ma le agaga. Atonu e sa'o lea lagona. Ae o le isi foi lea tulafono, i tulafono e sefulu mai le Atua.

O le amataga o lenei seneturi, na ou asiasi ai i Ieruselema mo le tolu vaiaso, e asi si au uo o Lea, o lo'o a'oa'oina ina ia avea o ia ma Faresaio a lo latou ituaiga lotu Iutaia. O Lea e nofo mautotogi i se fale fogafale lua e avanoa le pito i luga. O le vaega lea o le fale e tafafao ai Lea ma ana uo a'o'oga. O aso Faraile uma, a'o le'i pogipogi, e faalogoina ai lava le pese au alofa o le tuaoi, e fa'afeiloai ai le aso Sāpati, ua faatauaina ma ta'ua o le **“Aso o le Masiofo”**. E lagona le fiafia i le malū ma le matagofie o upu o le pese. O ni pesega ma fatūga ua faatupu manatu mo au, ma ua faamausalī ai le fia tatalo pea. O aso To'ona'i, ua faaogaina e faitau ma faasoa ma fetufaa'i i tusitusiga, ma pesega faa-Iutaia, a'o matou 'a'ai ma feinu i luga o le tumutumu o le fale. Ae le faaititia ai le matagofie o le mafutaga, ma faauma i le tutuina o molī ga'o ma pepese i faamanuiaga o le aso Sapati.

Na faia e le Atua le aso Sapati, e i ai lona taua mo i tatou. O nei aso ma nei taimi ua vave mae'a. Ua tele avanoa ma ua tele le tamaoiga ua tau le taua ai le aso Sapati. Ae i le ta'ele o lo'u fatu, e faatau lava le aso Sapati, e malōlō ma faafetai ai.

**Tatalo:** Le Alii e, ia aoga lo'u leo ia avea ma leo malie e vivi'i ai i lau Afio, ma ia avea la'u malologa i le Aso Sapati, ia fai ma vi'iga ia te oe, **Amene.**

**Mafaufauga Loloto:** E faapefea ona e faatauaina le aso Sapati e malolo ai!

**Aso Toonai Oketopa 6, 2018 “Tumau e faavavau” Eternality**

**Tusi Faitau :** 1 Ioane 2:15-25

**Matua :** *f.17, “E mavae atu foi le lalolagi, atoa ma lona tu'inaanau, a o lē fai le finagalo o le Atua, e tumau lea e faavavau.”*

Ou te alofa i le lalolagi. E le mafai ona ou le alofa i le lalolagi. Ou te momo'o i le felanulanu a'i ma le mamae o lau laau ao le'i to'ulu. Ou te faananau i ao o le lagi, ua pei o ni aluga o lo'o tafetafea i fafo ane o le faamalama o lo'u potu fai mea a'oga, o le mafanafana o 'ave o le la, ua suluia ai nofoa o lo'u potu. Ma susulu atu i le togalaau i le taeao ma le aoauli, ae o le oso a'e o le la i le taeao, e faatupulaia ai le matagofie o fugalaau i fafo ane o le umukuka. Ou te fiafia i vaitau uma o le soifuaga. O le tele o aso, ou te savali ai i le ala ma ou faalogoina le sasala o le manogi o fuarosa, o le ala lalata ane i pusa meli oi i le ala. O a'u o se tagata ua faatauaina mea o le lalolagi ma ē ua aumau ai. O le upu moni, o so'u lagona e le faaleagaga ae faaletino.

O le amataga o le talitonuga faa-kerisiano, e amata i se talitonuga po'o se mataupu silisili vaavaalua (dualisms). O lo'o i ai le agaga lelei ma le agaga leaga. O le tama lelei ma le teine leaga. O lo'o i ai le popolega o lagona o tagata, o lo'o taotasi i le manatu o Satani le pogai. E i ai le talitonuga, o le tele o le gagana o lo'o faaogaina e le feagaiga fou, ua tauau ina ta'ita'i sēsēina ai tatou pe'a le faitau toto'a ma manino ai. I nei augā tupulaga ua latou tete'e atu i le matupu silisili lea o le vaavaalua. Latou te talitonu o le pule fai toatasi a le Atua, e pogai ai mea uma. E ui lava ina le manino o le gagana o le tusi muamua a Ioane, ae i ai le moni ma le faamaoni i toe upu o lenei tusi. O nei fuaiupu, o lo'o faasino i mea e leai so latou tapula'a, atoa ai ma le loloto o le amiotonu o lo'o affi mai ai. O lo'o faatusa ai tatou i se tafeaga tele i se vaitafe ua tumu i faigatā ma tigā. Ae i totonu o ia tafega, o lo'o i ai le tunoa o le alofa o le Atua. O le tafeaga e fau ai le tagata ma toe fa'afouina a o tatou agai atu i lo tatou Tama o i le lagi. O lo'o i a'i tatou faamanuiaga mai le Alii. Tatou alalaga ma fai pesega aua o le gagana lea o le lagi.

**Tatalo:** Le Atua e, o le ola, faatafe maia ou manuia ma avea punavai ola e faasūsū ai agaga o tagata uma, ina ia maua ai pea le manuia, **Amene.**

**Mafaufauga Loloto:** Tuu atu i le Atua i le tatalo. Aua le popole e tali lava le Atua.

**Faataoto – Proverbs**  
**O le la'au o le ola – A tree of life**  
Saunia : Anthony Loke

**Aso Sa, Oketopa 7, 2018 “O le mata'u i le Atua” The fear of the Lord**  
**Tusi Faitau :** Faataoto 1 : 1-7

**Matua :** f.7, *O le mata'u i le Ali'i, o le amataga lea o le poto; a e 'ino'ino tagata valelea i le poto ma le a'oa'oina”.*

Ua tatou i ai i se vaitau maualuga ma le saosaoa o le poto salalau. Ae i ai foi le manatu, ua silisili lo tatou atamamai nai o tatou augā matua na muamua atu i a'i tatou. Ae foliga mai e le o le tulaga lea. Ua siosiomia i tatou i le tele o tomai

ese'ese ua le mafai ona faitaulia, a e mativa lava i le tofa manino ma le utāga i vaega taua ole olaga. Tele le ese'esega o le pota ma le lota matala. O le pota, o le malamalama lea i mea ua a'oa'o'oina ai, ae o le lota mataala, o le faia lea o faaiuga tataui i le pota ua aoaoina ai. O nei augā tupulaga ua atamamai i le faamaopoopoina o faamaumauga, a e o le lu'i tele, pe latou te iloa ona faitau ma faauiga ia faamaumauga. O le lota matala e le fuaina i le malosi o tatou mafaufauga.

O le talitonuga faa-Eperu anamua, na latou maitauina le gasologa o le soifuaga ma fesiliga le au faitofa i lea seneturi ma lea seneturi, i le alumaga o le soifuaga ma faamaumau i lalo suiga ma le aafiaga i le olaga. O lea tamaoiga o le malamalama ma le pota, ua tuulima ma tuu taliga atu i le isi augā tupulaga i nei ona aso, e faapoopo i se suiga o nei ona po. O le Faataoto, o se faataitaiga lelei lea, o lea ituaiga pota. O se iloa ua matua, ua faatusalia i se uaina ua ova ma le tolu selau po'o le fa selau tausaga le matua. E le mafai e le pota moto ona lūlūina. O le naunautaiga o le Faataoto, o le faailoa atu lea o le lota matala e amata e le Atua, mo i latou uma e matata'u ia te ia.

**Tatalo:** Le Alii e, se'i e faatumu i matou i le lota matala ma lou manuia. **Amene**

**Aso Gafua, Oketopa 8, 2018 “Faaloga i e matutua” Heed your elders.**

**Tusi Faitau :** Faataoto 1: 8 – 19

**Matua :** f.8, *“Lo'u atalii e, faalogo mai ia i le a'oa'o atu a lou tamā; aua foi e te tuulafoaiina le upu a lou tinā;”*

Ua silafia e matua le faigata o a latou fanau, pe a avea i latou ma talavou. O lo'o i ai le manatu o talavou, e sili lo latou iloa nai lo matua. Atonu e sa'o, ae sese foi lea manatu. E i ai se muagagana a le atunuu o Saina e faapea, “E tele atu a'u masima na 'ai, nai lo au alaisa na ai.” O le uiga, e tele le silafia o le matua, nai lo fanau aua na muamua mai matua i fanau. E le sili ifo la le iloa o le tamaitiiti, i matua.

O le upu a le Tusi Paia, o le ita i le pota, o le vale lava ia 'valea'(Salamo 14:1). O lo'o i ai le naunautaiga faavavevave i le tamā ma le tinā, e gaua'i mai le fanau i le fautuaga a matua, aua ua silafia e matua le leaga o le lē faaloga i le apoapoa'i atu a le matua, aua e pa'u atu ai i fa'aosoosoga ma i'u vale ai le taunuuga. O le leo o mātua, ua faatusa i le leo o le pota. O le leo o matua, o le leo o le taulogologo ua silafia le leaga o le lē usitai.

**Tatalo:** Le Alii e, tatala mai o matou lota ina ia o matou gaua'i e usitai i fautuaga a e matutua, ina ia aua nei matou faia le sēsē sa latou faia, **Amene.**

**Mafaufauga Loloto:** E tatau lava i mātua ona saili auala e fautua ai fanau e aunoa ma le faaali o le pule aoao.

**Aso Lua Oketopa 9, 2018 “Faaloga i le tama'itai o Poto”**

**Listen to lady wisdom.**

**Tusi Faitau :** Faataoto 1 : 20 – 33



**Matua :** f.33, “*A o lē faalogo mai ia te a’u, e nofo o ia ma le fifilemu; e filemu o ia , e le fefe i se mea leaga.*”

O nisi nei o fuaiupu o lauga e tolu a tina o le potō. Taumafai le au popoto o Eperu anamua, e faailoa ma faamatala le matautia o le potō ma ogaoga o le valea. O se auala o lo’o taumafai e faailoa atu ai i le lautele le taua o ia leo e lua.

O le leo o le potō, ma le leo o le valea e tauva i laua. E tau fai valaau tupulaga uma i ē uma e fia faalogo mai. E ese’ese taunu’uga o le olaga e maua i le leo o le potō ma le olaga e avatu e le leo o le vale. “*O lo’o alaga le potō i fafo; ua leo tele i malae* (f.20). O lona naunautaiga o tagata faigofie (f.22). I nei ona aso, o tagata nei e mu’a mafaufau ma e mulimuli i so’o se tagata e aunoa ma se fetuunaiga pe talafegai. E taumafai lava le tamaitai potō, e faasagatonu ma faailoa le mea moni (ff.22-27) ae le mafafai lava i latou(f.24), e sili lava iā i latou le faatosina mai o le leo o le tamatai o vale (Faataoto 9:13-18). I nei ona aso, ua tutuli taliga i upu o le potō, ae talia le leo o le vale.

Toafia i tatou ua salamō ia tatou faaiuga fai! O le iuga o le lē amanaia o le fautuaga o le potō o lo’o faamanino mai.(f.31-32) Latou te selesele lava i lo latou luluuga. Aua o le ua tete’e i le upu o le potō, ua tete’e foi ia i le Atua(f.29). O le potō moni, mai le Atua lea(f.7). O lo’o i ai le avanoa mo e laiti ma e matutua, e tu’ua ai le vaivai, ae foi mai le Alii. E o’o lava la i le atalii faamaumau ‘oa, na iloa lona sēsē, ma toe fo’i i lona tamā.(Luka 15).

**Tatalo:** Le Alii e, faailoa mai ia te au le leo o le potō, ina ia ou mulimuli ai, **Amene.**

**Mafaufauga Loloto:** E faapefea ona e iloa le leo o le potō ma le leo o le vale?

**Aso Lulu Oketopa 10, 2018 “Saili le potō e saogalemu ai”**

**Seek wisdom and find safety.**

**Tusi Faitau :** Faataoto : 2:1-15

**Matua :** f.5, “*Ona e lagona ai lea o le mata’u i le ALII, ma e maua ai le potō i le Atua.*”

O le naunautaiga o matua, ia fiafia loloto fanau i le potō. O upu a matua, ua pei o tulafono taiala mo fanau, ae tali mai fanau i le gau’i ma le loto malamalama. O tagata uma e ao ina taitasi ma saili le potō. O e uma e saili i le potō, e faamanuiaina aua o le Atua na te foa’i mo i latou uma e saili ia te ia ma le faamaoni. O toe talafeagai ea le saili o le loto matala i nei ona po? O nei ona po ua saili tupulaga mo ni tupe se tele, ia ta’uta’ua ma ia manuia le olaga. Ua tatou saili ma galulue i agavaa faapitoa mo manuia i galuega faapitoa. Ua tatou su’esu’e ma saili tikeri, mo le faafeiloaiga o faafitauli i galuega i aso fai so’o. O ai se alii poo se tama’ita’i ua fia saili i le loto matala i nei vaitau?

I le mataupu e lua o loo faatauaina ai le a’oa’oina ma le potō. O le potō e le atagia ai le faamaualuga ma le faafiapoto, a e o le sini ia olaina le potō ma ia faapaiaina le ola. Tatou te tuliloaina le potō ina ia tatou ola ma le mata’u i le

Atua, ma ava i isi tagata. Tatou te faia nei mea uma ona o lo tatou va lelei ma isi tagata, faatumauiina le faamasinoga tonu ma le amiotonu. O e uma e ‘alofia ia a’oa’oga, latou te faafiafia i le amio leaga ma le tiapolo.

**Tatalo:** Le Atua e, faaali mai ia te au le ala o lou poto moni, **Amene.**

**Mafaufauga Loloto:** E puipuia lava tatou i le saili o le poto faa-le-Atua.

**Aso Tofi Oketopa 11, 2018 “O le poto e laveaiina oe”**

**Wisdom as a moral safeguard.**

**Tusi Faitau :** Faataoto 2 : 16-22

**Matua :** *f.16, “...e laveai ia te oe ai le fafine ese, o le fafine ese na te faaoleole i ana upu;”*

I le mataupu lona lua sa tatou faitauina, o lo’o ai se vaega lona lua fia faatauaina. O le fili o le tama’ita’i poto, o tama’ita’i e faa’ole’ole le laulaufaiva. E i ai nisi e le fiafia i le faauigaina o lenei upu o le mulilua, aua e foliga mai o se upu matuia.

E ave lava le faamuamua ma le faataua o tagata popoto Eperu, i tama talavou. O le faamoemoe ma le sini o le mālō, ia ola mamā tama talavou. Aua nei pisia i latou i le amio leaga ma tu faa-Sotoma ma Komoro. O le faamoemoe, ia manuia le lumanai o aiga, ekalesia ma le atunuu. O le taua ma le ogaoga o le afaina o lenei fautuaga, pe a le gaua’i le faalogo a tama tane ma tama fafine o le a faaumatia ai le paia o Isaraelu. O se mea sili ona tiga, le vaai atu ua pau’u tupulaga i le faita’aga ma le mulilua, ona o le suamalie o le faatosina ma le tuinanau. Ae silisili ona tugā pe afai ua faaipoipo ae fai lava le agasala. O le a afaina aiga, ekalesia ma le mālō.

E avea le poto e fai ma leoleo o le amio lelei mo tupulaga fai a’e. E galue le poto ma le maelega, e puipui le talavou ia faia pea mea tonu i taimi uma. Ia faitauina o se talavou amio mama ma fai mea tonu, ae le o se talavou amio leaga ma fiafia i uiga faa-sotoma ma komoro.

**Tatalo :** Le Alii e, ia e leoleo ina ita ina ia aua nei o’u pa’u atu i le agasala ma le leaga, ae ia faia le amiotonu ma le mea sa’o, **Amene.**

**Mafaufauga Loloto:** E faapefea ona faatumauiina le mamā o matou ala? Ia o matou leoleo i matou loto pei ona leoleo o lau upu.

**Aso Faraile Oketopa 12, 2018 “E fiafia i latou o e maua le atamai” Happy are those who find wisdom.**

**Tusi Faitau :** Faataoto 3 : 13-26

**Matua :** *f.18, “O ia o le laau o le ola i e tago atu ia te ia; amuia foi i latou o e taofi atu ia te ia.”*

O e uma ua maua le poto ua maua le “fiafia”. O nisi o faaliliuga o lo’o faaogaina le upu “amuia”, o lo’o faamanatu mai le Salamo 1:1. *Amuia le tagata e le savali i le filifiliga...* O le tagata ua na maua le mea sili. E sili ia i le siliva ma le auro. E

sili foi ia nai i penina e faananau i ai le loto. O le potō, o le laau lea ole ola mo e saili ia te ia. O le ua maua le potō e faaumiumi lona soifua, ma e mamalu mea na te faia, ae le gata i lea e tele se ola na te maua. Faaaupegaina i le potō, e le gata i le ola filemu ma le fiafia, ae selesele i manuia o le potō.

I le fuaiupu e lua sefulutasi (21), ua toe faamanatu mai e le Tamā i lana fanau, ia tumau ma olaina le potō. O le manuia o le usitai ma faalogo i le potō, o lo’o taua mai fuaiupu o totoe o le tusi faitau. O le faanoanoaga i tupulaga o nei ona po, ona ua le fia saili i le potō o le Tusi Paia lea. E saogalemu ma puipuia i latou uma e saili i le potō. E fia ea ni taimi tatou te sesē ma faaletonu ai, e mulimuli ane ua le mafai ona faagalo. Ana mafai ona fautuaina a tatou faaiuga, semanu e le faaletonu a tatou filifiliga. Ona o le Atua o le faapogai o le potō, tatou te maua ai le maumau. O lē e ava ma faalagolago i le Atua o le tagata manuia lea.

**Tatalo :** Le Atua e matou te talitonu i lau taitaiga i taimi o tigā ma faigatā, **Amene.**

**Mafaufauga Loloto :** I taimi o faigata, e faafelea ona faali mai le Atua foafoa?

**Aso Toonai Oketopa 13, 2018 “Faataitaiga faa-Tamā” A father’s example.**

**Tusi Faitau :** Faataoto 4 : 1-13

**Matua :** *f.1, “Faalogo mai ia, outou le fanau e, i le a’oa’o atu a le tamā, ma uai mai o outou taliga ina ia faaatamamaiina outou.”*

I aso anamua, sa a’oa’oina fanau mai o latou augā Tamā. O se iloa ma se tomā faapitoa, lea ua tuulima mai lea tupulaga i lea tupulaga (Teuteronome 6:1-8 Salamo 78:1-8). E faapena se ata o lo’o taoto i le tusi a Faataoto. O lo’o lapata’i le Tamā i lana fanau, ia gauai ma o latou loto i le tomā o aso uma e aoga mo le lumana’i. O le tuualalo a le Tamā e le maua mai tusi aoga ma fale aoga, ae maua mai i le olaga fai soo. Se’i vagana lava ua olaina e le tagata le olaga atoa mai le itiiti seia o’o i le matua, ona mafai lea ona fa’asoa ma fautua.

E i ai le manatu, o le faalogo o le la’asaga muamua lea. O le tele o taimi e faalogo ai ma tamau i le loto, o le loloto foi lea o le iloa. E taua le a’oa’o mai o tagata matutua i tala ma upu tu’u e tapena ai le iloa loloto. O le toaga la e saili ma faamaumau le potō, e avea ma faaeaea i lē o lo’o saili. E faafeao ma puipui e le potō.

**Tatalo:** Le Atua e, afai ou te saili i mea le aogā o lenei olaga, ia e aoao mai au ina ou saili i le potō, **Amene.**

**Mafaufauga Loloto :** E faafelea ona tatou tu’ulima atu le tomā i isi tupulaga o tatou aiga?

**Faataoto – Proverbs**  
**O oe o lo’u tuafafine/uso” You are my sister**  
Saunia : Jane Gonzalez

**“LOTU A TAMAITI”**

**Aso Sa, Oketopa 14, 2018 “Iunivesite o le ola” “University of life”**

**Tusi Faitau :** Faataoto 5:1-14

**Matua :** *ff.12-14, “... ma e faapea ane, Sa tele naua lo’u ‘ino’ino ina a’oa’oina, ma ua tetee atu e lo’u loto le aoaiga; na ou le faalogo foi i upu a e na a’oa’o mai ia te au, ma ua le uai atu o’u taliga i o’u a’oa’oga. Toetoe lava, ua atoa mea leaga ua ou i ai, o i luma lava o le faapotopotoga ma le saofaiga.”*

O le lima fesoasoani ma le lima fa’aleleia mo oe lava, ua tele ai tusitusiga ma polokalame i TV ma upega tafa’i lagi, ua saili seleni ai tagata e ala i pisinisi. O le vaega la o le faleoloa e faatau ai Tusi Paia ma tusi tapuaiga ese’ese ma mea faaleagaga, ua matuā le uia lava e tagata. Ae ua ave le faamamafa a tagata i le vaega o tusi ma porokalame i TV, ua faailoa ai le tomai latou te mafai ona faamamā avega ma faafiafia i tagata. Ua fau ma soloi porokalame, ma tagata ua latou faailoa latou te mafaia ona fofō faafitauli, o tagata i so’o se vaega. E pei e foliga mai, ua faatuatuaana’i le poto mai le Atua ma le faaiuga lelei ua taitaina ai tatou.

O le tatou tusi faitau mo lenei aso, ua aumaia lea mai tusi taiala a tagata Eperu. O le tusi a Faataoto ua pei o se faamāmā (cleaner) na te tapena ina le tagata ina ia ola mamā, paia ma amiotonu, e le gata i lea a o le va o le tagata ma le Atua ma le va o le tagata ma le isi tagata. O le tauvaley a aso anamua e le o le fiamalie, fia malie ae o le agasala. Mo kerisiano fou uma o le ola taumafai e faavae i le ola pulea. O le ola pulea e faavae i le upu Latina a’oa’oina. O le ola pulea o le faasoa ma le faatonuga fai faatasi. O le lesona o le olaga e faigata ona malamalama i ai.

**Tatalo:** Le Atua e, a’oa’o mai ina ia ou iloa ona faaoga tatau o’u aso ma talia lau galuega. **Amene.**

**Aso Gafua Oketopa 15, 2018 “O se na te leoleoina a’u”**

**Someone to watch over me**

**Tusi Faitau :** Faataoto 5:15-23

**Matua :** *ff.22-23, “O ana amio leaga e maua ai lava le ua agasala; o maea o ana agasala e taofia ai o ia. E oti lava o ia, a o lei a’oa’oina; o le tele o lona valea e sese ai o ia.”*

O se fiafiaga i aiga le matamata faatasi o tifaga. O se tasi o ata e fiafia ai aiga ua faaigoaina o le “ola o nisi”. O nei ata o lo’o tuu faatasia e le malo Siamani i le vaitau o le kominisi. O le vaitau o lo’o nofo vaavaaia tagata i le pule faamalumu a le malo kominisi. I nei ona po i Peretania, o lo’o foliga o lo’o matou nonofo i lalo o se pule faakolone. O se tasi lenei o malō ua tumu i masini

e vaavaaia tagata i mea uma latou te faia. E lelei le naunautaiga mo lo matou saogalemu, ae i ai le fesili tele o taoto mai, ae faapefea lo matou lotoifale? E i ai ea so matou puipuiga e aunoa ma le pule faamalosi o mea totino?

O se mea e faanoanoa ai tagata ona o le Atua e faaali mai i le malamalama. O ia o le faamasino tonu na te iloilo ina ata ese'ese ma faamaumauga o o tatou faaletonu. Na te faalogologo ia tatou talanoaga ma tatou upu mamafa ona faamasinoina ai lea o i tatou.

Atonu o le mataupu na tatou faitauina e foliga faapea, ae o le upu moni lava, e i ai le aso e valaau ta'i-to'atasi ai le Atua i lana faamasinoga. Ae i ai la se vaaiga ese e ao ona tatou toe vaai i ai. O le toe tepa i le faitauga ma iloa ai, o le Atua na te laveaiina tagata, ae le o le vaai masei mo se mea e pa'u ai, o le Atua na te faalaulelei le ala, ae le o le faa-mailei. O le poto na te valaauina i tatou ina tatou manino i mea na tatou pau'u ai. O le vaega lea, o lo'o a'oao'aina ai tatou i le sesē o le tuana'i, ma faapoto ai mo le lumana'i. O le malamalama e mautinoa ai o le faamalumu o le Atua e le o le vaai masei, ae o lona alofa tunoa.

**Tatalo:** Faafetai le Atua i le mafanafana o lou alofa ma lau leoleoga i la'u savaliga o aso uma, **Amene.**

**Mafaufauga Loloto:** O a foliga o le Atua ia te oe?

**Aso Lua Oketopa 16, 2018 “Mataupu faale-aiga” ‘It’s a family affair’**

**Tusi Faitau :** Faataoto 7:1-5

**Matua :** *ff.4-5, “...ia e fai atu i le poto, O oe o lo'u tuafafine, ma ia e ta'ua le atamai, o lou aiga lea. Ina ia leoleo ia te oe ai le fafine ese, o le fafine ese na te faaoleole i ana upu.”*

I lenei tau mafanafana, na faailoga ai le tolusefuluiva tausaga o le ma mafutaga ma si o'u toalua. Sa faia se sauniga pu'upu'u i Sepania, e faamanatu ai le ma faaipoipoga, ma toe to laulau ai le ma tautoga na faia i le ma uluai faaipoipoga. O se meaalofo sili mo i ma'ua, o le alofa i lo ma va i nei tausaga e tele. O le tele o tautoga, e le tumau ae gausia. O le tele o mafutaga tete'a e fesiligia po'o ua mamā le tautoga po'o ua leai lava se naunau e faaleleia le mafutaga.

E tali-faapena foi kamupani ma a latou faiga, ua na ona fai o le kamupani e saili le oa ae faatautau tagata faigaluega i totonu laiti, ma lē totonu ova taimi, ma isi lava tulaga masani. E faapena foi ekalesia ma tagata tai toatasi. Ua leai se faamaoni i le tautoga na faia.

E faaeaea ma faafetaia e le tusi a Faataoto le tagata e tumau i lana tautoga, ma savali ai lava. E o'o mai faigata ma fita i le mafutaga, e tofotofoina foi le faatuatua i le tuinanau, ae e lē manumalo ai, o le toa manumanu o ia. E iai lava tofotofoga e lē faigofie ma lē mafai ona tatali. Ae ia tatou mautinoa, o lo'o fatasi mai le agaga o le Atua. O le mafanafana lea o le mafutaga, e pei o se aiga a i ai se mea e afaina ai se tasi, e lagolago uma le aiga ia fusia le manu'a o le uso. E faapena le alofa o le Atua, na te le tuulafoaina e pei o fanau ua matua oti.

**Tatalo:** Le Atua e ,toto i totonu ia te au le malosi e viia ai oe ma tetea ai le fili pe a latalata mai ia te au, **Amene.**

**Mafaufauga Loloto:** E mafai ona tuu atoatoa lou taimi ma lou ola e faaleleia ai ni mea o faletonu o lau ekalesia ma lou aiga?

**Aso Lulu, Oketopa 17, 2018 “O vale oso vale” Fools rush in.**

**Tusi Faitau :** Faataoto 7 : 6 – 23

**Matua:** *ff.21-22a,23b, “Na ia faasese ia te ia i le tele o ana togafiti; na ia tosina o ia i ona laugutu faaoleole. Ua mulimuli loa o ia ia te ia, e pei o le povi ua alu a fasia; e pei ona faavave atu le manu i le mailei; na te le iloa ua saunia lea mea e mate ai o ia.*

O lo’o faafou le umukuka a se tasi o a’u uo, ma ua mimita lava i lana masini tunu kofe faaonaponei e ese foi ona foliga mai ma lona faaogaina i aso fai so’o. E toafia i tatou e tumu umukuka i masini e vili ai vai-faamalosi tino ma fale-taavale ua tumu i masini faamalosi tino, ina ua faaseseina i faasalalauga i TV ma nusipepa, a e maise ai le aupega tafailagi. E malosi faasalalauga i le faatosina o tagata e faatau mea le manomia pe moomia e tagata.

O le tele o tusitusiga ma lapataiga a le tusi o Faataoto, o lo’o faailoa mai ai le leaga o le fafine lalelei ma le faatosina o tama talavou. O mataupu e iva muamua o le tusi o Faataoto, o lo’o faailoa ai le sailiga i le potu e le aunoa, ae ia mataala ma vaai toto’a i ona faaososoga. E taua le talanoa i le faaleaogaina o le mulilua, ae le tatau ona faafesootai i le faitauga o lenei aso ona o lenei :

Muamua, e tele avanoa e faaososoina ai tatou, ao le’i maua le potu. E ao lava ona tatou faaeteete, ne’i faaletonu i le agasala, po’o le malaia e faavavau. Lua, e faamamafa e Iesu le agaga o le tulafono, (Mataio 5:21-28) nai lo le tusi. Atonu ua le sala i tatou i le mulilua, ae o le fesili! O fea i latou na tuuaina ma faalata i tatou? O le a se mea ua faatosina ai tatou ua le mafai ai ona fai le amiotonu? O ai ea ua tatou faa-māina i lo tatou le faamaoni?

**Tatalo :** Le Alii e, aoao mai ina ou savali i le ala sa’o ma ia ou taumafai e faia le amiotonu, **Amene.**

**Mafaufauga Loloto:** E i ai ea ni vaega o tatou olaga e lagona ai le faalata ma le faamāina? Tatalo mo e ua faatiga ia’i tatou.

**Aso Tofi Oketopa 18, 2018 “Faiogofie le sau, faiogofie le alu”**

**Easy come, easy go.**

**Tusi Faitau :** Faataoto 8 : 1-12

**Matua :** *ff.10-11, “Ia outou talia la’u a’oa’o atu, a e aua i le ario; ma ia talia le potu e sili i le auro e aupito lelei. Auā e sili ina lelei le potu i penina; ma mea faafiafia uma lava e le tusa ma ia.”*

I lenei vaiata, ua tele auala e maua ai tupe nonō, ma o le ata o tupe sefesepe pei ona masani ai nai tua’a, ua pei o se mea ua leiloa ma le masani ai. Ou te

manatua, a’o o’u laitiiti, na teuteuina e le matou tinā le matou fale i ni mea fale fou. Na fesili lo matou tamā, pe o fea le tupe na faatau ai nei mea ae tali le loomatua, o lana card na faatau ai. Tau le manava lelei le toeaina ona o ana tupe na sefesefe i tausaga e tele. E ese le manaia o le maua o le tupe i se taimi vave lava, ae i ai foi ona aafiaga. O mea e maua ma le faigofie e faigofie foi ona mou atu ma i tatou.

I le tusi a Faataoto o loo taua ai le poto o le “penina taugata”. O le poto e leai sona tau ae mafai ona a’oa’oina. E ao ina mulimuli i ē ua savavali i le poto ma ua a’oa’oina i o latou sēsē. O le tapenaga o le poto e manomia le usita’i ma le faalogo e manuia ai. E leai se mea e maua i le faanatinati ma le faatopetope, ma manatu e maua manuia i se taimi vave. E sēsē lava lea manatu. Ae faigatā ua tatou masani i mea e vave maua i le isi aso, pei o le kiliva, o le amazon ia po’o le fedex. Ae o lo’o faamanatu mai lava le tatou faatuatua, e ao ina tatou onosa’i ma fatalitali. E i ai le tau e ao ina totogi mo mea uma.

Ua fetalai Iesu i le faataoto e uiga i le faatauoa na faatauina mea uma ina ia maua le penina, ma le tagata ua faatauina le faatoaga ua tumu i penina natia, ae toe liliu ma toe faatau atu (Mataio 13:44-46). O le tagata poto na te iloa le tau ma auai lona loto e totogi le tau.

**Tatalo:** Le Alii e, foa’i mai le poto ia te a’u ina ia ou iloa ona teu oloa i le lagi, **Amene.**

**Mafaufauga Loloto :** Fai se suiga mo le lelei. Tu’u loa lau upega tafailagi, o lau telefoni ma isi mea o lo’o e pisi ai, ae faasao lou taimi mo le Alii.

### **Aso Faraile Oketopa 19, 2018 “Ola felanua’i le tamaoauga” ‘Life’s rich tapestry’**

**Tusi Faitau :** Faataoto 9 : 1-6

**Matua :** *ff.4-6, “Ai se faigofie, ia afe mai o ia iinei; o le ua leai sona mafaufau, ua ia faapea atu i ai, O mai ia, ina aai la’u areto, ma inu i la’u uaina ua ou suia. Ia outou tuulafoai atu i e valelea, tou te ola ai; ma ia outou ui atu i le ala e atamai ai.”*

O le upu faigofie e tele ona uiga. O lona faaogaina e aofia ai upu pei o le upu le taualoa se’i o’o lava i le upu valea. O lo’u tamā o se tagata e faigofie (uiga mama o le upu). E le o se tagata taualoa pe maualuga, ae tausafia ma loto maualalo. Ou te lagona o le ituaiga tagata lea ua faauigaina e le poto. Ua loa lona soifua ma ua le gae’e lana tofa ma lana faautaga i matagi lagavale o le olaga. O le poto lea e vaai i le leleiga o mea uma. O ia o se tagata na te faatauina le mafaufau lelei. E le manatu tele le poto i lo’u Tamā, ae o tupulaga faamaualuluga ma le faumalō, le tupulaga ua faapea ane ua ou iloa ou te le fia faalogo i ni talatuu ma tala o le poto a e maise talatau le Atua.

Ua lu’i tatou e le poto ina ia tatou toe saili ile poto. Toe foi i le faigofie. Ua tatou pologa ona ua tatou faaigaigatā le olaga, ae le ola i le olaga poto. O mea e faatau

e le lalolagi, a le mataala tagata e pisia ai i latou i le agasala! O le ala foi lea o le lē fealofani o le au Kerisiano ma le lalolagi, ona ua iloa lelei o le lalolagi o le nofoaga o le tiapolo ma ana 'au, ua faatalitali mo taimi tatou te sasi ai. O le potou na te puipuia ma tetea atu i le fili e ala i le upu a le Atua. O le lalolagi, o lo tatou malae ta'alo. Na tatou tutupu ai ma ola ai. O lo'o iai o tatou sesē ma faaletonu. Ae a tatou tausisi i le potou ma faaoga tata, ona tatou iloa lea o le faigofie o le lotou ma le agaga.

**Tatalo :** Le Atua e, aumai ia te au le faatuatua pei o se tamaitiiti, ina ia mafai ona atoatoa la'u vaai i lau afio, ma ia mamā lo'u lotou ina ia faia pea lou finagalo, **Amene.**

**Mafaufaga Loloto :** Ola i le lotou maualalo ma le ola faigofie ina ia fai ma faataitaiga i isi tagata.

**Aso Toonai Oketopa 20, 2018 “O faatinoga faigata” ‘A hard act to follow’**

**Tusi Faitau :** Faataoto 31 : 10-31

**Matua :** *ff.29-31, “E toatele fafine e amio lelei i latou; a o oe, ua faasilisiliina oe ia i latou uma. O le matagofie e pepelo lea, o le mea faatauva le lalelei; a o le fafine ua mata'u i le ALII, e viia lava o ia. Avatu ia te ia le fua o ona lima; o ana galuega foi e viia ai o ia i faitotoa”.*

Na ou talanoa i si au uo i nai aso ua mavae e uiga i le faigata o lo'o feagai ma aiga laiti tau amata. I nei ona po ua tatou maitauina le tula'i mai o tama'ita'i. O le mamafa o le amo a tina, ua le gata i le fatuaiga ao le toalua lelei, tinā malosi, ae o le tinā faigaluega malosi ma lona faatauaina, Fai mai o tina ua fia malosi, ua fia o'o i mea uma. Ae fautuaina e Shirley Conran, e pu'upu'u ma sa'asa'a le ola, ma e le mafai ona vaevaeina i vaega se tele pei ona naunau ai tina i nei ona po. Ua maualuluga matati'a ma sini ua fia ausia, ae le taunuu.

I lenei vaitau ua tatou molimauina le fatu solo Eperu le taiala mo tamaitai ma tinā. E ui ona tusia lenei solo i seneturi e tele ua te'a, ae le uma lava lona mamalu. Lona mamalu ma lona paia lea fai mai e aoga i le lotoifale, ma taua foi i le pisinisi. Fai mai o le uluai leo o le fafine-tamaitai, na au lana ina-i-lau. O le tamaitai na te mafaia soo se mea. E matauina lenei tamaitai, e faigata ona faatumu ona seevae. O se vaaiga latalata i lenei solo, o loo atagia ai se vaaiga ese. E le o taumafai e faatu se malō o tina, pe sii foi tina i luga atu o tamā, ae o se viiviiga o tina e tusa ai ma lo latou tiute faa-tina e o latou taitoalua poo tamā fo'i. O le agaga vivii ma le faafetai o Tama ona o faamanuiaga o lo'o aumaia e tina. O uiga o le tina ua tumu i le potou. O alii ma tamaitai uma e ao ona saili i le potou lea e manuia ai.

**Tatalo :** Le Atua e, aumai le faataitaiga sili ina ia ou atoatoa pei o lau afio. Ia ou mulimuli i ou ala ae le o ala o le lalolagi, **Amene.**

**Mafaufaga Loloto:** O ai se tina-tamaitai o le Tusi-Paia e iloa? E faapefea ona e faaoga lea tagata ma ou taiala suia ai lou olaga?



### FAATA'OTO 3

#### O le tautaliga auro tautele – The golden earring

Apoapoaiga: Deseta Davis

**ASO SA, Oketopa 21, 2018: “O fea o i ai lou faatuatua?”**

**‘Where is your trust?’**

**Tusi Faitau:** Faataoto 11:28.

*Matua (f.28): O lē na te faatuatua i lona ‘oloa, e pa’ū lava o ia; ao e amiotomu, e tupu matagofie i latou, pei o lau la’au.*

E i ai le alaga’upu faa-Peretania i aso nei, e faapea, “E le faatauina i ni tupe le fiafia.” A e foliga e lē faamaonia lea alaga’upu. Peitai, o le lalolagi ua tatou o ola ai nei, ua faatāua le vaavaai i mea faitino o lo’o ola ai---e iloa le tagata i ona lavalava, i taavale e fealua’i ai a e maise o le fale e nofo ai. O le telē o tupe teu i le fale-tupe, o le lelei foi lea, ma o’o ai lava ina vavamamao le va e ese’ese ai tagata mau’oloa ma tagata matitiva, ma e faapoopo pea i le aga’i i luma. .

E foliga e leai se mea lelei e maua i le olaga mativa. Peitai, ua fetalai Iesu, ‘o i latou ia e ona le mālō o le lagi.’ E i ai le toeaina ua matua lava i la matou ekalesia, na te faamatala pea ia i matou le olaga sa ola ai i Indies i Sisifo. E faamatala so’o le leai o ni mea’ai, a e maise lava i tamaiti; e faatumu le ‘ulo i vai ona tunu lea se ia o’o ina pupuna. A e matou te tatalo i le Atua ina ia foa’i mai ni mea’ai mo matou.

E fiafia ai lava o latou loto. I le isi aso a o matou tatalo, a e tu’itu’i mai le faitoto’a, o se tagata e sau ma mea’ai, o mea’ai lelei mo tagata matutua faapea foi i tamaiti. Matou te talitonu, e faamanuia le Atua ma avatu le fiafia i o latou loto. Ua molimau le Salamo 62:10, aua nei o tatou fiafia i le tamaoaiga o mea e fao faamalosi mai isi, po’o le gaoui, ma afai foi e faapoopo le tamaoaiga, ‘aua lava ne’i o tatou mitamita vale ai. Ua aoao mai le Tusi Paia, aua lava nei ave le tamaoaiga tele e fai ma atua e tapua’i i ai. E lē o se mea leaga le tupe, a e ia sili ona tāua le Atua ua e faatuatua i ai.

**Tatalo:** Matou te faafetai, le Alii e, ona o lou tamaoaiga ese’ese ua foa’i mai mo i matou. ‘Aua ne’i o matou faasili le tamaoaiga ua maua nai lo matou faalagolago ma faatuatua i lau Afio. **Amene.**

**ASO GAFUA, Oketopa 22, 2018: “Tausisi i au upu.” [Sticks and stones]**

**Tusi Faitau:** Faataoto 15:1.

*Matua (f.1): O le tali filemū e liliu’eseina ai le ita; a o le upu faatigā e tupu ai le ita.*

Ina ua foi mai le fanau i le aiga mai le a’oga, e masani lava ona ou fai i ai e tauloto mai le solo pu’upu’u, e faapea: “Sticks and stones may break my bone, but words will never harm me.” (Tausisi i le upu e le gau ai se pogaivi, peitai, e le aafia lava a’u i upu.” Ua faaseseina ai a’u! E mafai ona aafia tele le tagata i upu. A e mafai foi ona fai ma fesoasoani, po’o le fai ma a’upega e faaleagaina

ai. O lou tali atu ona o le mana’o o le isi tagata, e ono fai lea ma auala e faaosofia ai se fe’ese’eseaiga ma a’afia ai. Tatou te fa’aaogaina pea upu i le olaga atoa, ma ola ai lava; e mana’omia upu ma e i ai foi taimi e aafia ai ma faaleagaina i upu.

O le mafutaga ma lo’u aiga e to’alima le fanau, e tatau lava ona iai se mea e ono faatupu ai se finauga. O lo’u tinā ma lona taulāmua i le faatupu filemu, e masani lava ona ia fa’aaoga alaga’upu. A e le avea la le na ma mea e taofia ai a’u upu e faailoa ai so’u foi malamalama, e o’o lava i se tulaga e ‘ina’inā ai. A e ou te faafetai, ina ua ‘ou tuputupu a’e pea se ia o’o ina tagata matua, ona ou iloa loa lea, o upu lava e ono aafia ai le tagata, ona ou taumafai lea e tautala i se leo mālū e lē tupu ai se vevesi.

Ina o avea a’u ma faifeau o le falepuipui, sa feagai pea ma tagata tumu i le loto ita. E toetoe lava a fusu ma taua’imisa i nai mea faatauvaa. A o’o ina matou faafesaga’i, o se tulaga mana’omia le toto’a ma tausisi e tautala i ni upu e tupu ai le lagona to’afilemū. Ou te lē taumafai e faasagatau ma le loto ita. E tupu ia te a’u le loto fiafia ma le agaga faafetai, ona o taimi uma ou te tautala atu ai i upu to’amalie ma le agaga maualalo, ou te vaaiia le to’afilemu se ia o’o lava ina ‘ou vaaiia se tagata, e ‘ese mai i le vaaiia sa i ai muamua i le amataga.

**Tatalo:** Le Alii alofa e, faamagalō mai i lo matou tautala i upu e tupu ai le felotoa’i ma maseiga. O lou fesoasoani mai, Agaga Paia e, e tupu ai le to’afilemu i o matou loto **Amene**.

**Mafaufauga Loloto:** Mafaufau loloto i upu e te tautala ai i lenei aso. Taumafai e faautauta ma faatupu le loto fiafia ma le agaga faafetai.

**ASO LUA, Oketopa 23, 2018: “E ta’ita’iina le fanau i le tausiga na ola mai ai.” Children learn what they live**

**Tusi Faitau:** Faataoto 17:1.

**Matua (f.1):** *E lelei si fasi mea e ‘ai ua magumagu, a o i ai le filemū; a e leaga le fale ua tumu i manu ua fasia, a o i ai le misa.*

O aso nei i le itulagi i Sisifo, ua talitonu o le manuia ua vaaiia i le olaga i nei-onapo, e mafua mai i le tamaoaiga ua maua e le tagata. Peitai, ua a’oa’o mai le Tusi Paia, “A o le amio Atua ma le loto malie, o le oloa tele lava lea.” (1 Timoteo 6:6). O le mea lea, o le manuia faamaoni, e maua lea i le amio-Atua i mea ua maua. O se fesoasoani lea e ‘ave’ese ai le tu’inanau i le tamaoaiga tele ua maua.

E faapei ona tusia e le tusi-tala o le Faataoto, ua ia faaalua le liliu’ese mai le talitonuga faale-lalolagi ua masani ai. O le aiga e ola i sina mea faatauvaa a e iai le loto malie, e sili atu lea nai le tele o ta’umafa a e ‘a’ai ma le loto popole. O le aiga la e faatauvaa le tamaoaiga maua a e faale-Atua le amio, e ola i latou e

aunoa ma se loto popole. O le filemu ma le alofa o le tasi i le isi, na te ‘aumaia le fiasia i le mafutaga faale-aiga, ma o’o ina galo ai mea faigata o le olaga nei.

E faatusatusa lea i le aiga o lo’o faula’i le tamaoaiga ma ola i le tu’inanau, e o’o ina tutupu ai fe’ese’eseaiga ma finauga po o ai e sili. E faamaonia lava lenei talitonuga, so’o se aiga e tutupu ai finauga, o se aiga lea e fevaevaea’i ma lē manuia. O fanau e tutupu a’e ma vaavaai i ia uiga ma amioga, e o’o ina mulimuli ai i lea ituaiga olaga i le lumana’i. A o’o ina tagata matutua, e ola ai lava ma aafia ai foi ma le atina’eina o aiga i le lumana’i.

O le tamaoaiga tele, na te lē taofia le ola fe’ese’esea’i, a e na te faatupu le ola fefinaua’i e o’o lava i misaga ma taua. A e o le loto malie ma le filemu e maua i le itiiti ma le faatauvaa o mea e tagolima i ai.

**Tatalo:** O le Areto o le Ola, faailoa i o matou loto le taua o le tamaoaiga ua matou maua e i ai le filemu, nai le tu’inanau i mea e malaia ai. **Amene.**

**Mafaufauga Loloto:** Sa’ili ma taga’i ane i le solo, “Children Learn What They Live.” Na saunia e Dorothy Law Noite. Vaavaai ane po o le a sou manatu?

**ASO LULU, Oketopa 24, 2018: “O se tasi o na mea.” The least of these**

**Tusi Faitau:** Faataoto 21:13.

**Matua (f.13):** *O lē na te punitia ona taliga i le laau a le tagata mativa, e valaau lava o ia, a e le talia.*

E tele tala i le Tusi Paia e faatatau i le tagata mau’oa, a e na te lē maua se fesoasoani i le taimi e mana’omia ai, e faapei la o Lasalo ma le mau’oa ua tusia i le Luka 16. E faate’ia foi le mafaufau ona o lenei molimau i le Faata’oto, ua talanoa i le tagata mativa, a e le o le tagata mau’oa. Mo le to’atele o tagata, afai e fesili atu i ai, e le mafai lava ona faapea mai o ia e mau’oa. Peitai, afai e tautala ma le faamaoni, e to’atele lava e sili lo latou matitiva nai lo tatou.

Po’o faatatau mai ‘ea lenei faata’oto ia i tatou? Afai e fai sa tatou pisinisi, ma faaaoga le totogi pito i maualalo, afai tatou te faatamala i le faia o le amiotonu, afai tatou te lē fesoasoani i e o lo’o mana’omia le fesoasoani e tusa ma lo tatou tiute---ona pupuni ai lea o tatou taliga i le tagi mai a e ua nonofo i le olaga puapuagatia.

Ua a’oa’o mai Iesu i le evagelia a Mataio 25 e faatatau ia i latou ua latou lē fesoasoani i e ua mana’omia le fesoasoani, ua faapea mai: “Auā na ‘ou fia ‘ai, a e tou te le’i avane ni mea ‘ou te ‘ai ai; na ‘ou fia inu, a e tou te le’i avane ni vai ou te inu ai; sa fai a’u ma tagata ‘ese, a e le’i talia a’u e outou; na ‘ou lē lavalava, a e tou te le’i faa’ofuina a’u; na ‘ou ma’i, na ou i le fale puipui foi, a e tou te le’i asiasia a’u...” (f.42-45).

Afai tatou te pupuni o tatou taliga i le tagi mai o e matitiva ma puapuagatia a e maise i latou o lo’o a’afia i sauaga, o lo tatou pupuni foi lea o la tatou faalogo ia Iesu, auā o lo’o ‘auai faatasi o ia ma i latou o lo’o mafatia ona ua tu’ulafoa’iina.

**Tatalo:** Le Alii e, ia matou fiafia e faalogo ma talia le tagi mai o e ua mafatia ma aafia i le olaga mativa. Fesoasoani mai lou Agaga, ia avea o matou lima ma vae e fai ma au mea faigaluega e faatino ai lou alofa silisili i e mana'omia le fesoasoani. **Amene.**

**Mafaufauga Loloto:** Na fetalai Iesu, “**Amuia e alolofa atu; auā e alofaina mai i latou.**” (Mataio 5:7). O ai e te faatino ai lea alofa i lenei aso?

**ASO TOFI, Oketopa 25, 2018:** “**Fetalai mai, le Alii e, a o faalago lau auauna.**” **Speak, Lord, your servant is listening.**

**Tusi Faitau:** Faataoto 25:12.

**Matua (f.12):** *O le tagata ua 'ai'oi ma le poto i taliga ua faalogo mai, o le mama auro lea, ma le 'asoa auro lelei.*

Taluai nei na matou a'o'oga ai i le mataupu e faatatau i le iloa ona faalogo lelei. Ou te lē iloa pe faapefea mai 'oe, a o a'u e lē lelei le faalogo. A e ua saunia lava a'u e tali atu i so'o se fesili. Auā e i ai lava le mea ou te fia tautala atu ai. Ua mālīe lava lo'u loto i le tele o taimi, “ia tu'u atu lo'u tagata e faatino ai”, o lona uiga, o le tautala e aunoa ma le mafaufau iai, e o'o ai ina afaina ai a'u. O le ituaiga faailoga lea, e leai se faautauta lelei i le tele o taimi.

O le faalogo o se tulaga mana'omia tele i le olaga o le tagata. Ua tatou iloa, ua tuuina mai taliga e lua a e tasi le gutu e tele ai le faalogo nai lo le tautala. Ua a'oa'o mai e faapea, so'o se tasi e faalogo i le a'oa'iga e lelei ma talia, o ia lea ua na faa'oga lelei ona taliga ua faatusaina i le mama auro ma le asoa auro lelei.

E faapei o le auro ua faamamaina i le afi, e faapena le te'ena po o le faitioga mai le tagata poto, e ui o upu e lē fiafia i ai le faalogo, peitai, o se faasinoga ina ia avea ma tagata tausa'afia, pe afai e fa'aaoga tatau i le olaga. O le faautauta e maua mai le Atua, o le mea lea e iloa ai e le tagata poto ona puipui ma fautua i mea e faaleagaina ai le tagata.

E filifilia le avanoa lelei ma upu e tatau ai. O le faalogo lelei mo le tagata ua sauniuni, na te fa'aaogaina le a'oa'iga ma e lē sola 'ese pe tete'e. O le faalogo ma talia e sili i lo le na ona lagona, aua o le faalogo ma a'oa'o i ai ma faatino le mea ua faalogo i ai, ua sili lea ona lelei.

E faapei ona fetalai le Alii i lē ua 'auala mai ai le fe'au, o lo tatou faalogo lea e faapei o le tama o Samuelu (tama a Hana) na ia faapea ane: “*Fetalai mai, le Alii e, o lo'o faalologolo atu lau auauna.*” Talosia ia 'aua ne'i avea i tatou ma auauna e galo ona faalogo.

**Tatalo:** Le Atua Poto e, fesoasoani mai ia matou faavave ona faalogo, a e faatelegese le tautala ma le ita. Ia talia le upu a le poto ua auala mai ai lou finagalo ina ia matou faalogo i ai. **Amene.**

**Mafaufauga Loloto:** Pe faapefea mai lau faalogo lelei? Manatua e 'ave sau mata'upu e faalelei atili ai le faalogo.

**ASO FARAILE, Oketopa 26, 2018: “O le loto ua pūlea.” Self-control!**

**Tusi Faitau:** Faataoto 25:28.

**Matua (f.28):** *O le ‘a’ai ua sofa’ia ua leai se pa, o le tagata lea ua na lē matāofia lona loto.*

O se ‘a’ai tele ua fausia, ua i ai le ‘olo e puipui lelei ai ona tua’oi e malu ai, ma le faitoto’a tele e ulufale atu ai. O luga o le pa puipui ua fausia ai fale-vaai. O le pa puipui o le faatinoga lea o le puipua mai le fili e faasagatau mai. O pa puipui mauululuga e faigata ona sopo’ia e le fili. Pe afai e latalata mai le fili, e faigofie ona iloa atu mai le falevaai, ma faatulaga loa ma fana auā le fili ua lata mai.

Toetoe lava o faitoto’a ulufale uma, e i ai lava le fale-vaai i ona luga. Ina ua osofa’ia le ‘a’ai ma faaumatia ona pa puipui, ona ta’alaelae loa lea o le ‘a’ai, ua iloa atu itu uma ma ua leai foi sona lafitaga. O le avanoa lea e ulufale ai le fili ma faa’umatia mea uma i totonu o le ‘a’ai.

O le faata’oto mo lenei aso, ua faailoa mai ia te i tatou le tagata ua leai se loto e pulea ai, ua faapei o le ‘a’ai ua leai se pa puipui e malu ai a e faaumatia e ona fili---ua avanoa ma ua leai se mea e lafi ai. E faapei ona faailoa mai, o le taua pito sili ona tele, o le tagata ma lona lava loto. O le to’atele o tagata i nei ona po, ua lē mafai ona pulea o latou lava loto i ‘auala eseese---i le va fa’afeagai ma tagata, i le so’ona ta’umafa ma inu, ua lē iloa ona alofa ma agalelei atu, tu’inaanau i mana’oga o le loto, ma le tele lava o mana’oga eseese.

Sa ou galue mo e o loo taofia i le fale-puipui, ma ou te vaايا ai pea le to’atele ua le mafai ona pulea o latou lava loto. O le to’atele ua tu’u lafoa’i i o latou manatu lelei e manuia ai. Ua faatusaina lea i le ‘a’ai ua leai ni pa puipui, ua o’o ina sa’oloto ai le fili---o le i’uga o le falepuipui.

O le loto pūlea o se tasi o fua o le Agaga. E faigofie lava ona leai se loto pulea, peitai, o le fesoasoani a le Agaga o le vaifofo lea e manuia ai. E i ai le alaga’upu mai anamua, e faapea: “E sili le tagata e pulea lona loto, na i le tagata e pulea le ‘a’ai.”

**Tatalo:** Le Alii e, foa’i mai ia te a’u le malosi ou te pulea ai lo’u olaga ia tusa ma lou finagalo, **Amene.**

**Mafaufauga Loloto:** Vaavaai ifo ia te ‘oe po o fea tonu e mana’omia ai se malosi e pulea ai ‘oe ia te ‘oe---taumafai i ai ma le malosi.

**ASO TOONA’I, Oketopa 27, 2018: “O ai ua na ‘ave’esea lau malologa?”**

**What is stealing your sleep?**

**Tusi Faitau:** Faataoto 26:14.

**Matua (f.14):** *E fealualua’i lē ua puipui i ona faamau, e faapea le paiē ona feliliua’i i lona moega.*

E faagata le feliuliua'i o le faitoto'a i ona itu e lua, e le sili atu i se isi mea. E puipui mai i le ulufale i totonu ma fafo. E faapena le tulaga e faatusa i ai le tagata paiē. O le faata'oto lenei ua na ta'u leagaina le tagata paiē i ona manatu, i ana faatinoga ma lana amio paiē. O le tagata paiē na te faia lava isi mea a e vagana e lē fia galue.

E ui lava o le moe e tāua mo le soifua maloloina o le tagata, a e afai foi o le a tele le moe, ona a'afia ai lea o le mafaufau lelei o le tagata. Fai mai le Faataoto 20:13, "*Aua e te naunau i le moe, ina nei faamativaina ai 'oe; ia e mataala, e te ma'ona ai i mea e 'ai.*" O polokalama mo fesoasoani a le mālō o le UK e avanoa ai tagata ia 'aua nei faigaluega, peitai, i le tele o isi mālō o le lalolagi, a lē galue le tagata, ona lē maua lea o le ola.

O le lalolagi ua i ai i nei augā tupulaga, ua gaosia le malosi e maua i le eletise, ma faasolo atu ai mea e mana'omia e le eletise, e faapei o le TV, komepiuta, o taaloga ma telefoni feavea'i, ua fai lea ma 'auala e 'ave'esea ai o tatou itula galulue ma o'o ina tele avanoa e moe ai ma mālōlō.

Ua 'ou iloa foi le to'atele o tagata ua tosina tele o latou mafaufau i talanoaga i komepiuta ma ua tau lē maua se moe se'iloga lava ua vaavaai muamua i mea o loo tutupu i le lalolagi. Ua fai ai lea ma masani se ia o'o ina fai ma tulaga e faaaau pea i lea po ma lea po, e aafia ai foi ma taimi o le ao. Peitai, ua foliga ua 'umi taimi o le po, a e pu'upu'u itula o le ao. O le fausia o masini komepiuta, o se 'auala e fesoasoani ai i le fa'afaigofieina o le faiga o galuega.

I le atunuu o UK e tataua ona i ai le vaiaso e pu'upu'u, e iai foi le ofisa e leai ni pepa. A tuu faafeagai la le tulaga lea ma le tagata, o lona uiga, ua galue le tagata i le ao se ia oo i le po, ua faateteleina foi le faaagaina o pepa e sili mamao mai taimi ua tuana'i.

Ua tauau ina faaitiitia le moe, se ia le iloa po o fea e gata ai. O le olaga faapaleni o aso ta'itasi o le tagata ua aga'i ina 'ave'esea. I le atunuu o UK e mana'omia le tele o taimi e galue ai, a e o isi atunuu, e galue ina ia ola!

**Tatalo:** Le Atua e, fesoasoani mai ia mafai ona matou iloa ona fuafua lelei le taimi e galulue ai, ma ia maua foi ni galuega e galulue ai. Ia fesoasoani foi i e galulue malolosi a e itiiti le tau e maua, ia agalelei ma foa'i le tau e tataua ai. **Amene.**

**Maufauga Loloto:** Pe i ai sou malamalamaga i le iloa faa-teknolosi (technology)? Pe fesoasoani lea tulaga i le faapaleni o au galuega, po o le fenunia'i ai?

**Faitau i le Mareko (3)**  
**1 Vaavaai ma faatalitali – Watch and Wait**  
Apoapoa'iga: Jarel Robinson-Brown

**ASO SA, Oketopa 28, 2018: “O le mana o fetalaiga a Iesu, ma i tatou foi.” The power of Jesus’ words, and our own**

**Tusi Faitau:** Mareko 13:1-8.

**Matua** (ff.1-2): *Ua ulufafo o ia i le malumalu, ona fai mai lea o le tasi o ona so’o ia te ia, “Inā silasila ia i nei ma’a ua matuā tetele lava, ma nei fale ua tetele lava!” A ua tali atu Iesu ia te ia, ua faapea atu, “Ua e iloa ‘ea nei fale tetele? E lē tu’ua le tasi ma’a i luga o le tasi ma’a, a e uma lava ona soloia i lalo.”*

Ou te manatunatu lava ia te a’u a o faatafao i la’u ta’ifau o, Seb (o le maile), e mafaufau i sa ma talatalanoaga ma se tagata ‘ese e aunoa ma so’u mafaufau mamafa i ai. I lenei tusi faitau, tatou te fesili ifo ia i tatou lava, O le a tonu le mata’upu o lo’o taumafai Iesu e faailoa mai? O fea o i ai le finagalo o Iesu mo le lalolagi i nei mea?! Ua lē taumate e lē o matuā mafaufau o ia i ai---i lea taimi faale-tapua’iga.

Ua tatou malamalama i le uiga o nei upu! E i ai uiga o upu e ono faatupu ai ni lagona popole, e o’o lava ia i tatou le manatu ifo, pe a tatou tautala ini upu malolosi, po o upu e popole ai le faalogo a ē ua mafai ona lagona mai i ia upu. O fetalaiga nei a Iesu i le Evagelia a Mareko, o upu e ono popole ai, a e o upu foi e tatau ona faalogo i ai.

O upu e tatau ona faailoa atu, e le faapea ona e moni ma tonu, a e ona o le fe’au ua tatau ona faailoa atu loa, ma e tatau ona malamalama i lona uiga. O Peteru, Iakopo, Ioane ma Anetere’a e le tau faamalieina i se tulaga e popole ai ona o le Malumalu, a e ona o le ta’u fa’asesē ma le lē faamaoni a ē ua molimau e o mai ia Keriso.

O le mea e tatau ona malamalama i ai le ‘au so’o, o le Keriso lava o le faamoemoega sili, ma po o le a lava faigata e o’o mai i le lalolagi, e lē suia ai lava. E i ai taimi o Satani, peitai, o le Alii le Atua e pulea mea uma lava.

**Tatalo:** Iesu Keriso e, faatonu mai i o matou laulaufaiva i upu sa’o ma tonu i lenei vaiaso. O la matou olega lea ina ia faia lou finagalo i le lalolagi uma.  
**Amene.**

**ASO GAFUA, Oketopa 29, 2018: “O ē tausia le folafolaga.” [Promise keeper]**

**Tusi Faitau:** Mareko 13:14-27.

**Matua** (ff.26-27): *Ona iloa atu lea e i latou le Atalii o le tagata ua sau i ao ma le mana tele ma le mamalu. Ona ‘a’auina mai lea e ia o ana agelu, latou te faapotopotoina i latou ua filifilia e ia mai matāmatagi e fa; e amata i le tulu’iga o le lalolagi e o’o i le tulu’iga o le lagi.*

Ou te fiafia lava i pese-lotu a Charles Wesley, o upu moni, o upu faale-lagi ma le malosi o lona mana. O pese-lotu uma a Wesley e faaalua ai le tāua o upu tauloto---o ia pese e ta'ita'iina ai le agaga o le tagata e ulufale atu i le lagi, po o fea lava e amata mai ai i le mua'i fuaiupu.

I le Tusi Paia, e masani ona faamatalaina Iesu i ni tulaga e faigata ona malamalama i ai. A e oinei i le Evagelia a Mareko, o Iesu lava ia ua na faamatala mai lona mamalu i le taimi mulimuli i lona afio mai. Tatou te mafaufau i upu o se tasi pese-lotu taua mo le Afio mai na fatuina e Charles Wesley, e faapea: 'Lo He Comes with Clouds Descending!'

A e o se tulaga e atuatuvaile ai pe a mafaufau i le lalolagi i nei ona po, ua le faigofie ona vaavaai atu i se lalolagi pogisa ua aafia i puapuaga faale-natura, o taua foi ma le nofo pologa. Peitai, ua galo lava i le tele o taimi ona avatu le faafetai, ona o mea lelei e tele ua foa'i mai, o le alofa foi ma le filemu tatou te tau ane pea i ai i lea aso ma lea aso.

O le mea e ao ina tatou manatua, o IA foi na folafolaina mai le manuia, e tumau pea lona faamaoni, e faapei ona a'oa'o mai Iesu, o le a toe afio mai---o a uma leaga ma mea sesē ua faia e le lalolagi, o le a faamasinoina ma le tonu.

O le mea pito sili ona faigata e tusa ma lo tatou tausisi i le a'oa'o mai o Iesu, o le tatau lea ona tatou taofi mau i ai, e faapea: O le malamalama o le ao e o'o mai lava i le taeao---o le malamalama e pupula atu i le pogisa e faamaoni, o le uiga lilo lea o le faatuatuaga, e sili ona maualuga ma tumau: Na maliu Keriso, a e na toe soifua mai, ua afio i le lagi a e toe afio ifo lava.

**Tatalo:** Le Atua e, o le lagi ma le lalolagi, e te valaau atu i mea uma lava---e ala i lou Alo Pele o Iesu Keriso e ta'ita'iina ai le lagi ma le lalolagi. Foa'i mai le filemu, le faamoemoe, ma le malamalama i le lalolagi, ia matou iloa ma tausisi i ai. E ala i lou Suafa. **Amene.**

**Mafaufauga Loloto:** Po'o lou malamalama 'ea e faapupula atu i e ua pogisa? Atonu ua ia te 'oe le malamalama o le Alii e faapupula atu i nisi i lenei vaiaso.

**ASO LUA, Oketopa 30, 2018: "Ia mata'ala---'aua le popole!" [Be watchful – not worried!]**

**Tusi Faitau:** Mareko 13:32-37.

**Matua** (ff.32-33): *A o lea aso ma lea itu aso e lē iloa e se tasi, e lē iloa lava e agelu i le lagi, po o le Atalii; ua na o le Tamā lava. Ia outou, inā mataala ia, auā tou te lē iloa pe o'o mai afea ia aso.*

Ua afio mai Iesu---ia pisi loa! Pei lava e i ai se feso'otaiga ma St.Benedict, ua mafua ai ona ou lagona e tatau ona 'ou "pisi". E le faapea o se tulaga leaga le "pisi", a e mafua ona pisi, ina ia mafai ona tu'u'ese mea ua manatu i ai le mafaufau.



E i ai le taimi na ou mālōlō ane ai i le Douai Abbey in Reading, mo le masina atoa o Aokuso---sa ou manatu lava o se tulaga e faigata mo a'u, auā e moni lava sa i ai. Peitai, na 'ou ofo lava i le tulaga na i ai le mafaufau, le tino ma le agaga, ina ua mafai ona faatino i le malosī na maua, aua ua mafai ona faia mea uma sa naunau i ai le loto, o mea e tatau ona faatino.

Ua lē na o a'u e o'o i ai uiga ia, 'ou te iloa foi nisi na ui mai i lenei lava tulaga e faapei o a'u. O le ata ua faailoa nei, e faapea: "Ua afio mai Iesu: Ia salamō po o le faafanoina!"---o faaaliga ia ua tele ina vaaia i auala-tele, a e maise o folafolaga i laau faaleotele leo. O lapata'iga e onomea ma tatau mo se vaega o le nuu, peitai, o upu ua fa'aaoga ma folafola atu, e tatau ona taga'i toto'a i ai mo lona faamatalaina.

O le tulaga e sili ona fa'aeteete i ai, e ui ona o folafolaga e taua mo le taimi nei, ma ia o'o loloto ifo i le loto i le taimi nei---peitai, o le faamalamalama mo le lalolagi e uiga i le ola faavavau po o le ola atali, o le tulaga e mana'omia i le taimi nei, I le aso lenei. Ua faamanatu mai e Iesu mo i tatou le tatau ona mataala i lo tatou olaga i le lalolagi lenei.

E faigofie ona ufiufi lo tatou mataala i le 'ofu o le popole vale. Peitai, o le mataala ma le loto popole vale, e telē lona eseese! A o'o ina popole vale le loto, ona 'ave'ese lea o le vaai o mata i le tini e tatau ona taunuu i ai. Ua alu le mafaufau i le faalavelave, nai lo le tausisi i le faailoga.

A o'o ina popole vale le loto, ona tata'i lea o le mafaufau i manatu lē tonu ma mafaufauga e mafai lava ona fofō o tatou puapuaga e i tatou lava---pe afai e faapea le manatu, o lona uiga, o le faatinoga lea o le faafanoina o i tatou e i tatou lava.

**Tatalo:** I le lalolagi o tu'inaanau ma mana'oga ese'ese, ia pupula mai lou malamalama faapei o le moli i le pogisa---ina ia 'ave'esea le loto popole vale a ia tumau le faamoemoe i lou manuia e faavavau, faavavau lava. **Amene.**

**Mafaufauga Loloto:** Atonu o le taimi lenei se'i fai se malologa. Ia faafo'i le faafetai i le Atua i mea lelei ua faia mo i tatou. Se'i mapu ane teisi---mafaufau i le taimi tuana'i, taimi nei aua sou lumana'i manuia.

**ASO LULU, Oketopa 31, 2018: "O le nanamu o le oti."**

**The smell of death**

**Tusi Faitau:** Mareko 14:1-9.

**Matua** (ff.6-7): *A ua fetalai atu Iesu, "Tu'upea ia ia te ia; se a le mea tou te faalavelave ai ia te ia? O le mea lelei ua faia e ia ia te a'u nei. Auā tou te nonofo pea ma e matitiva, o aso uma foi tou te loto i ai ua outou mafaia ona agalelei atu ia te i latou; a o a'u nei, tatou te lē nonofo pea ma outou.*

O Aso Faraile Lelei uma (Good Friday), i le savaliga faale-faatuatua, e tumau pea le lagona e tausisi i le faamoemoe ua uma ona saunia. Afai ua lē o lea, ona taga'i lea ini sauniuniga faapitoa ua saunia e le Cardiff. E mafai ona mafaufau o

ni taumafaiga ia e tusa ma se molimau faa-Kerisiano, peitai, e i ai so’u lagona e sili atu lea ona tāua pe a o’o ina faatinoina.

Atonu e lē afaina pe a tatou taga’i ane i se satauro ua tata’i ane i le ala-tele, e faamanatu mai ai i le lalolagi o tagata le faigata o lo latou lavea’iina, po o le mana foi o le Atua na faaalua ia Iesu Keriso. Ou te talitonu, o le faatumutumuga lea o le Vaiaso Paia o lo’o faamanatu pea i lea tausaga ma lea tausaga.

E fesiligia pea i lo’u loto, po o fea tonu e agai i ai lenei vaega o le Evagelia a Mareko. I se tasi itu, o so’o o le Alii ma e masani na ‘auai, sa latou le fiafia lava ona o le faalavelave o le tinā ma ana taumafaiga e faatino mo Iesu. Ua tatou maua i le Evagelia a Mareko, e faapea: Ua lē fiafia lava i latou sa ‘auai, a e na o’o foi ia i latou le ita!

Peitai, na suia le vaai i le tinā ma lana foa’i alofa ma le viiga o Iesu, ina ua fefinaua’i e uiga i le ma’imau o le suau’u na liligi i aao o Iesu; e peisea’i o se amiotonu ua sesē lona faatinoga, auā e sili pe ana ‘ave le fesoasoani e faamuamua i e ua matitiva i tupe e maua mai pe a faatau atu le suau’u tau tele!

Peitai, ua ou manatu o lenei faatinoga ma le ‘auai o Iesu, ua ‘ave seseina i le suāu’u ma lona tuuina atu---o le ta’imuaga mo le faatinoina o puapuaga i le satauro. O lenei mata’upu o loo a’afia ai mea tāua na faatinoina e lenei tinā mo Iesu, o le ta’imuaga o lona faasatauroina, o le nanamu o le suāu’u ua faatumulia ai le fale uma, ua fai ma faamanatuga o le Faaolataga tele na saunia e Keriso Iesu mo le lalolagi agasala.

O le faauuina i le suāu’u o le Keriso o se tulaga e le mafai ona soloi’eseina e se tasi---o le oti e lē o se faatinoga e mafai e le tagata ola ona sola ‘ese ai. Peitai, o le faatuatua i le Keriso manumālō, e o’o lava i le oti na to’ilalo ai, o le faamoemoe ola lea o le Kerisiano e ala i le loto ua salamō ma faatuatua i le Togiola ua mae’a ona saunia.

**Tatalo:** Le Alii e le Atua, fesoasoani mai ia matou malamalama lelei i le uiga o le tagata na e faia i lou lava faatusa paia. Ia matou talitonu ua lava ma totoe lau foafoaga ua lelei ma atoatoa, matou te lelei faatasi ai e o’o lava i le iuga. Amene.

**Mafaufauga Loloto:** Manatunatu i mea e tāua ia te ‘oe---e tusa ma le i’uga o le ola nei. Ia e mafaufau i ai i lenei aso.

### **Aso Tofi Novema 1, 2018, Fa’amaoni i le taunu’uga Faithful to the end**

**Tusi Faitau:** Salamo 43

**Matua:** *ff.3-4, ‘Ua faia o’u loimata ma’u mea e ai i ao ma po, a o fai mai pea i latou, O ifea ea lou Atua? Ou te manatunatu i ia mea, ona faavaivai ai o lo’u loto i totonu ia te au; auā sa matou o faatasi ma le toatele, ma matou savavali i le fale o le Atua ma le leo fiafia ma le viiga, o le toatele o e faia le tausamiga’.*

O a’u ma lo’u tuafafine, sa tausia i maua e le tinā o ma mātua. O le tinā paia, e le gata o ia o le tinā o ma mātua, a o le tinā ua vaai ai Iesu i ana faata’ita’iga

lelei, e pei ona faatinoina i ana galuega. Sa avea o ia ma se teine na le maua se āiga, ua iloa lelei e ia le olaga manuia e tausua ai o fanau. O lea ua tu'uina atu o lo'u olaga atoa i faata'ita'iga lelei e pei ona fa'ata'ita'i mai e le tinā mo māua.

O lo tatou lalolagi e moomia ni tagata e ola fa'atuatua i le Alii. O tagata e fa'amaoni ma ofoina atu le ola i le Atua. O le ofoina atu o le ola, e fa'atupuina ai le talitonu, o le talitonu e avea ai le tagata ma uō, ua atagia ai le alofa. Tatou te fia maua tagata e fa'amaoni i le tautuaina o lou āiga, i au galuega, i taleni ua mo'omia ai, o au su'esu'ega i a'oga, o galuega ua filifilia ai oe e lou atunu'u, o le tagata e fa'amaoni i le Alii ma faatino o lana auuaunaga.

O le ofoina atu o le loto atoa i le auuaunaga e suia ai le lalolagi, auā ua faailoa uiga tāua e avea ai le tagata faamaoni ma avea ma toggiola, e faailoa mai le alu 'ese ma le olaga matagā e le tatau ona faia. O tagata paia uma e va'ava'ai ia Iesu, o lē na faasatauroina ua toetu o Ia, na o Ia ua i ai le malosi sili e faaolaina ai i tatou e ala i lona alofa tunoa. E tatau ona fialia ina ua valaauina i tatou ia ola fa'apaiaina, auā o ala ia o le Alii ua faailoa mai, ma e faia e le Atua mea uma tatou te mo'omia ma vala'au atu ia te Ia.

**Tatalo:** Le Alii e, faafetai ona o tagata paia faatuatua ua faata'ita'i mai. Ia e faailoa mai o au galuega matou te tumau ai i le fa'amaoni ma le fa'atuatua i lau Afio. **Amene.**

**Mafaufauga loloto:** E iai taimi tatou te tali atu ai i le leai. Ia lototele ma tau atu i tagata mea e tutupu mai ai suiga lelei mo le atina'e ina o le mālō o le Atua ma le faamaoni.

## **Aso Faraile Novema 2, 2018, 'Naunau i le ola,' 'Dying to live'**

**Tusi Faitau:** Mareko 14: 10 – 31.

**Matua:** *ff. 29 – 31, 'A ua fai mai Peteru ia te ia "E ui lava ina tausua i o tagata uma, ou te le faapea lava au". Ona fetalai atu lea o Iesu ia te ia, "E moni, ou te fai atu ia te oe, O lenei aso, o le po nei lava, a o lei oo i le vivini faalua o moa, e te faafiti faatolu mai ia te au," Ona atili ai lea ona fai mai o ia, "E ui lava ina ta oti faatasi ma oe, ou te le faafiti lava ia te oe" Ua faapea foi ona fai mai o i latou uma'.*

Na faapefea ona saunia so'o o Iesu mo lenei fa'atinoga faigatā?

E leai se so'o o Iesu, na sauni ma le fa'amaoni i nei suiga o le a o'o mai. O ō latou manatu, o le tagata ua latou mulimuli i ai, ua aga'i atu o ia i lona faasatauroina i Kalevario. Peitai, a o lei o'o mai o nei va'aiga, o lo'o i ai le manatu tāua o Iesu mo ona soo e tatau ona faatino mo i latou ao le'i oo mai o puapuaga.

Na latou mafuta faatasi ma faia le Talisuaga mulimuli ma lona auso'o. Ua tuuina atu e Ia ia te i latou le falaoa(areto) ma le uaina, o le faatusa o lona tino ma lona toto o le a fa'amaligiina mo le faamagaloina o agasala a le lalolagi, ma faatonu atu, ia latou faia lenei mea ma faamanatuga ia te Ia.

I lenei va'aiga, ua tōtō e Iesu le taulaga i loto o tagata Kerisiano tapua'i, le olaga ma le soifua auunaga. Ua ia tofitofia le falaoa ma le uaina, ma faailoa le ātoaga o lana galuega, o le olaga ua ia faatonu atu i lana 'au-faigaluega galulue ina ia faapea ona fai.

E faapea lo tatou ola, o le tino ua faamomomoina ma le toto ua faamaligiina ma sasa'a atu, ma faia le finagalo o le Atua e pei ona faia e Iesu ina ia faapea ona tatou faia, e ala i le soifua ma le auunaga.

**Tatalo:** Fesoasoani mai le Alii ina ia ou faamaoni i lau afio – e le gata i mea tetele, ao mea uma mo lenei olaga – ia oo mai lou mamalu ma lou toe afio mai, a o matou faatalitali atu ma le faamaoni ma faia o lou finagalo. **Amene.**

**Mafaufauga loloto:** Po'o tatou faamaoni ea i le Alii e pei ona faamaoni o Ia i ai tatou? E lelei ona toe saili la tatou mafutaga ma le Alii, ma toe iloa mea ua faaletonu, ma toe faaleleia.

**Aso Toonai, Novema 3, 2018 'O Iesu o le tagata, e pei foi o ō tatou tagata' 'The human Jesus'**

**Tusi Faitau;** Mareko 14: 32 – 42.

**Matua:** ff 34, 35, *'Ona fetalai atu lea o ia ia te i latou, "O loo matuā tiga lava lo'u loto e oo i le oti; ina nonofo ia outou iinei, ma mataala". Ua faaitiiti atu ia i luma, ona faapaū lea o ia i le eleele, ma tatalo ina ia mavae atu lea itu aso ia te ia, pe afai e mafai,'*

O le afiafi o le aso muamua o la'u galuega i Cardiff, o le aso umi lea i la'u galuega. O nai uō na tāpenaina a'u mea, ua toe fo'i i latou i Lonetona ma o le mea ua tupu, ua o'u feagai ma le galuega ma le toatele o tagata, ma ua fa'afuase'ia le o'o mai o tiute ma galuega e faatino.

Ia, ua ō i latou sa fesoasoani mai, na o'u vaaia se pepa o lo'o faapipi'i i le potu o le fale, o loo faapipi'i ai pea ma manatua ai nei upu: 'We love you, you can do this! Melissa and Reema x' Ua avea ia upu ua faamalosia ai lo'u loto e feagai ai ma galuega i le aso fou. E lei fa'aitiitia le manatua o le mafutaga ma tagata e manatua pea.

I taimi uma o le Tala Lelei ua tatou iloa ai Iesu, o le tagata e pei o o tatou tagata. I lenei tala, o Iesu ua tigā lona loto e oo i le oti. Ua iloa e Ia o tagata uma sa mafuta ma Ia, ua tu'ulafoa'i ia te Ia peitai, o tagata o lo'o ia fia mo'omia, O uiga ia o Iesu e pei lava o uiga o tagata, ua lagona le mafatia. Ua tatou iloa le Atua e ala ia Iesu ua ia silafia uiga loloto o le tagata.

Ao tatou feagai ma le Atua i talosaga, tatou te tatalo ma mautinoa o lo o silafia e le Alii mo'omo'oga o o tatou loto. O le Atua na faia i tatou ma le alofa, ma valaauina i tatou ina ia tuuina atu le tatalo ma le loto atoa ia te Ia. Pe afai e le avea i tatou ma tagata moni e pei ona faia ai i tatou e le Atua, o afea ae faapefea ona avea i tatou ma tagata moni o le Alii?

**Tatalo:** Le Alii e, ia e fesoasoani mai ina ia ou mafuta faatasi ma Oe. O le Atua alofa, o le faaola, o le uō i aso uma. **Amene.**

**Mafaufauga loloto:** O iai se mea e te fia ta'u i le Alii o lo'o mafatia ai lou loto? O le Atua e faafogaina le tatalo ma le faamaoni o le loto.

### **Faitauga mai ia Mareko (3)**

#### **2 O le toe upu mulimuli**

( saunia e Noel Irwin )

**Aso Sa, Novema 4, 2018.** ‘O le tagata fa’amaoni ma le tagata faalata’  
**‘Loyalists and traitors’**

**Tusi Faitau: Mareko 14: 43- 52.**

**Matua:** f.50, *‘Ona tuua ai lea o ia e i latou uma, ua sosola’*

O Iuta faapea so’o o Iesu ( pei ona manatu i ai) e pei ua vaaia i latou o tagata faalata ua faalataina le Alii, ma tu’ua o Ia i taimi o lo’o mo’omia ai e Iesu se fesoasoani.

Na tusia ai e Rowan Williams se Tautinoga Fou, ina ia tatou saili i le lalolagi ua vaeluaina i le tagata faamaoni ma tagata faalata. I manatu o Williams, e i ai ‘ese’ese o tagata ua tūua o le faalata. Na te faatulagaina i latou i le ‘fa’amaoni ma le lē fa’amaoni’ o le tagata. E iai tagata latou te faalataina se miti, poo se mafaufauga, poo le faaaliga e ala i le ‘au atu i faatinoga e pei ona taua i le tala faasolopito. O nisi faalata, ua avea i latou ma agaga ua talia faaaliga ina ia iloa tele ai le faaaliga e pei ona faailoa mai.

Pe na faia faapea e Iuta le faalata, ina ua ia u’unaia Iesu ina ia faia se vavega e ofo ai tagata i le faatinoga o lenei faaaliga?

O mafaufauga o Iuta o lo’o tatou mafaufau pea i ai peitai, o le faatinoga o le malosi ma le faata’otoina o taiala e tusa ma le natura o mea, o le mea lea a le Atua silisili ‘ese, o Ia lava na te faia, e pei ona tatou vaai i ai i nei ona po, i le malosi faale atunuu ma le soifuaga i le ekalesia.

**Tatalo:** Le Alii e, ua nofofale lau Afio i lou loto, ia avea Oe ma faaaliga o lau afio. **Amene.**

**Aso Gafua Novema 5, 2018-** ‘Faamolemole ia toe vaai i lau gagana’.  
**‘Mind your language, please’**

**Tusi Faitau:** Mareko:14; 66 – 72,

**Matua:** f.70b, *“E moni, o oe lava lo latou; auā o le Kalilaia oe”*

O le tala ia Peteru ma le fa’afitia o Iesu, o lo’o amata i le Mareko 14;54 a’o mulimuli atu ia Iesu, ma sāvalia lotoā o le Ositaulaga sili. Ua uma ona silifia e Iesu ona so’o o leā faafitia o Ia e pei ona molimau i ai i le Mareko 14: 27, ma ua taunuu ai o ia folafolaga. Ua sosola uma so’o o le Alii peitai, na o Peteru na fa’aaau lona mulimuli atu ia Iesu.

Tatou te mafaufau ia Peteru, ua tu'uina atu o ia e tofotofoina lona loto ia Iesu, pe moni ma faamaoni o lana tautinoga. Ao tūtū ai Peteru, na vaaia e ia le ita o tagata ma fāifāi atu ia Iesu. O le mea mata'utia lea, ua lē faailoa atu e Peteru o ia o le so'o o le Alii, auā ua fa'afiti ma 'au faatasi ma tagata ma fāifāi atu ia te Iesu. O leā se va'aiga ua iloa ai e tagata le faafiti a Peteru? O lana gagana.

I le avea o a'u ma tagata mai Aialani Matu, ua faama'ati la'u tautala i upu ma le malosi, o fugalaau, o ta'avale, faapea ta'elega, ua 'ese lau gagana faa-Peretania ua faailoa atu i lo'u toalua ma tamaiti ua iloa ai o a'u o le tagata mai Aialani. Ina ua o'u i ai i Peretania, o le taimi na faapalasi ai pomu a terorisi Aialani i luga o Peretania, o taimi ua luita lo'u tagata ona o la'u gagana fāifāi sa le tataua ona faia ua iloa ai lau gagana peitai, ua o'u faia ina ia laveaina ai lo'u ola.

E faapea Peteru, ua fāifāi i le tagata na te lei faia se faatinoga e tau atu i le leaga, a'o le tagata ua ia aumaia le alofa ma le faaolataga. O uiga ia o Peteru ma ua iloa, o ia o le tagata e le tumau lona alofa ia Iesu. O Iuta ma Peteru, o tagata faalata. E ui ina ua iloa le lē faataunu'uina o le feau tāua, atoa ma le iloa ua tu'u 'esea le faamaoni ia Iesu peitai, i le lē atoatoa o manatu a ua fetalai Iesu e pei ona faamauina e Mareko 16: 7, "*A ia outou o atu, ina tau atu i ona soo atoa ma Peteru, e muamua atu o ia ia te outou i Kalilaia; tou te iloa ai o ia i lea mea, faapei ona fetalai atu ai o ia ia te outou.*" O upu o le faamoemoe mo Peteru, ma lona lumana'i faatalitali mai.

**Tatalo:** Le Atua e, e i ai taimi e sesē ai o matou ala i mea e paū ai. Seia e faamanatu mai le tala ia Peteru ma lona olaga. **Amene**

**Mafaufauga loloto:** O le lē faataunu'uina, loto faanoanoa, faapea le toe fuata'iga, o le ā se va'aiga i nei upu i lou loto?

**Aso Lua, Novema 6, 2018. 'O ai ua ia faatupua le vevesi?' 'Who is the revolutionary?'**

**Tusi Faitau:** Mareko 15: 1 – 15

**Matua:** f.13, '*Ona latou alalaga ai lea, "Ina faasatauro ia ia te ia."*

O Iesu ua tauleagaina e ta'ita'i o le lotu, ma ua tuuina atu o Ia i le pule a le mālō o Roma. E le tāua ia Pilato ni mataupu ua avatu e faaleaga ai se tagata lotu. Pau le mea o lo o silasila i ai, ona o le tagata ua faailoa le Tupu e pei ona faailoa mai. Na saunoa Iesu i nai upu itiiti, ma o le ofo tele lea o Pilato ona o le tagata ua le tali atu i le alalaga a tagata ina ia faasatauroina o ia, atoa ma le lē sailia o se Faamasino e fesoasoani i lona faamasinoga, faapea le lē vala'au atu ina ia faamagaloina o ia.

Sei o tatou va'ava'ai atu ia Parapa ma lona tula'i mai.

I le Mareko 6: 34, ua faailoa mai o Iesu ua agalelei atu i tagata uma, ona 'ua avea i latou e pei o se lafumamoe ua leai so latou ta'ita'i'. I le faiupu e 8, ua faailoa atu i tagata, ina ia filifili i nei tagata e toalua' O le isi tagata o le tagata

faatupu faalavelave, ao le isi tagata na faailoa o lona mālō e ala i le filemu ma le faaolaina o tagata..

O le ata o loo iloa ai ta'ita'i o le Lotu, ua faamalosi atu i tagata ina ia talia Parapa peita'i, o Pilato na ta'ita'ia le faatinoga ma le ofotele. E lei leva atu na fetalai ai Iesu i le malumalu ma faagae'etia ai loto o tagata ma alalaga 'Osana i mea aupito aluga, ua afio mai le Alii o le faaola,' a'o aga atu o ia i Ierusalem peitai, o lenei ua alalaga ina ia faasatauroina o Ia.

O Iesu na faalataina e le Lotu, faapea le mālō o Roma ma tagata matitiva. Ua faailoa mai e Mareko le 'ese'esega e faatupu ai o faalavelave. O le faatupuina e Iesu o le faalavelave, o le mea mata'utia o le taulaga e toatasi na faia e Keriso Iesu i lona maliu ma lona toetu, na tupu mai ai suiga lelei i le alofa, mo le manuia mo tagata uma.

**Tatalo:** *'Ua sāuaina o ia, sa tigaina foi o ia, a e le tautala mai o ia, e pei o se tamaimamoe ua ta'ita'iina ia fasia, e pei o le mamoe foi i luma o e sele lona fulufulu,ua faalologo ia, o ia fo'i ua le tautala mai'.*(Isaia 53:7) **Amene**

**Mafaufauga loloto:** Poo e iloa ea le faia o filifiliga i lenei lalolagi o lo o moomia a le filifili ia Iesu poo Parapa?

**Aso Lulu, Novema 7, 2018. 'A! Ua tauemu, ma alalaga atu' 'Aha! aha! Mocked and jeered'**

**Tusi Faitau:** Salamo 70

**Matua:** f. 1, *'Le Alii e, ia vave ona e laveai mai ia te a'u; le Alii e, ia vave ona e fesoasoani mai ia te au'.*

O le Salamo e 70, o le valaau a le tagata ina ia faaolaina. E pei ona o'u valaau i le Alii ao sauni le va'alele e lele atu i luga, ina ia fesoasoani mai. O le agaga faailoa lea a le tagata i le Alii.

O lenei Salamo, ua tutusa ma le Salamo e 40, o nei fetu'una'iga i le 40: 13 -17. O le valaau i le Atua ina i ai se faaola e faaolaina ai o ona tagata. O lenei Salamo, o le Salamo e tāua tele ia Dietrich Bonhoeffer, o le faifeau Siamani na faa-falepuipui e le Nazis, ona ua avea ma tagata ua sauni, e fasiotia le alii o Adolf Hitler.

O le Salamo e faalogologo pea i ai Bonhoeffer ma maua ai se to'a malie e fa'aauau ai o lona nofo i le falepuipui. O manatu o Bonhoeffer, o le Salamo e 70 o le tatalo o lo'o atagia ai le tatalo a Iesu. Na o Iesu lava e atoatoa lona olaga, o le tagata e talitonuina lona lē ta'uleagaina, faapea ai puapuaga ua faia fua ma le leai o se upu e lagolagoina ai le mafua'aga o puapuaga.

Ua manatu o ia, o Keriso ua avea ma taulaga togiola i le Salamo e 70 mo i tatou. E pei o le tino o Keriso ua tatou iloa ai le mafaufauga o le Alii e pei ona faailoa mai i le Salamo 70.

O le mea taua ia Bonhoeffer, o lenei Salamo o lo’o faailoa ai lona ita ma le lē fiafia, atoa ai ma lona loto faamagalalo atu i ē ita mai. O Iesu ua avea ma fili mo tagata peitai, ua le o toe iai ni o tatou fili i le faatinoga a Iesu ma le faamagalalo atu. O le feau taua lea i le asō.

**Tatalo:** Sei o tatou tatalo mo tatou fili. **Amene**

**Mafaufauga loloto:** Pe e te manatu e tusia se Salamo o lo’o atagia ai lou ita, atoa ai ma le loto faamagalalo?

**Aso Tofi, Novema 8, 2018. ‘O le mālō ua toe liliu mai’ The Empire strikes back’**

**Tusi Faitau:** Mareko 15: 33 – 41.

**Matua:** f.39, *‘O le ta’ita’i o le toaselau, o le na tu atu i ona luma, ua iloa e ia ua faapea ona to o lana manava, ona faapea atu ai lea o ia, “E moni, o se alo o le Atua lenei tagata.”*

O le tagata muamua na faailoa Iesu ma lona maliu, o le tagata sa avea ma tagata na faasatauroina le Alii i le pule a le mālō o Roma. O le tautinoga ta’uta’ua a le ‘ta’ita’i ‘au o le toaselau’ e pei ona faailoa e John Wayne i le tala ‘The Greatest Story Every Told’ i lana gagana faa- Amerika na ia taua ai faapea, ‘tatou te iloa atoatoa Iesu Keriso i ona puapuga i le satauro’.

Po’o le tautinoga ‘ea lea na muamua ina ua maliu Iesu? Peā manatua le fetalaiga a le Alii i le aso o le papatisoga, faapea lona aveina a’e i le mauga, na iloa ai Iesu ua pupula mai o lona mamalu (transfiguration), na o i latou na faailoa le silisili ‘ese o Keriso e pei ona aumaia e Mareko, o i latou ia o temoni na tete’e atu ia Iesu.

O tala atoa a Mareko, o lo’o faavae i tagata uma ua i ai le pule, ma iloa Iesu ma lana talaiga, ma taumafai ia fasiotia o ia. O nisi na mulimuli ia te ia ma le loto masalosalo peitai, o nisi o tinā na mulimuli ma le faamaoni ia Iesu, e o’o lava i lona faasatauroina ma lona maliu.

O le faasatauroina o Iesu ua liliu ai loto o tagata, o le ta’ita’i ‘au o le toaselau ua suia lona ola, ina ua vaai ia Iesu i luga o le satauro. O le mea tāua lea ua folafola e le tagata sa faasatauroina le Alii, ‘o le Alii o le Alo o le Atua’. O le mea sa le tataua ona tupu, a ua tupu ina ua vaai ia Iesu i luga o le satauro. O le fesili fo’i lea a le ta’ita’i o le toaselau mo le tagata faitau, e pei ona molimau i ai Mareko.

**Tatalo:** Tatalo mo latou ua aga atu i le fa’ataunu’uina o faasalaga i le oti. **Amene**

**Mafaufauga loloto:** O Iesu i tusitusiga a Mareko e fiafia e fa’aaoga le igoa o Iesu, ‘O le atalii o le tagata’ nai le igoa ‘O le Alo o le Atua’ Aisea?

**Aso Faraile Novema 9, 2018. ‘O ta’ita’i Iutaia ua toe liliu mai’ The Jewish authorities strikes back?’**



**Tusi Faitau:** Mareko 15: 42 – 47

**Matua:** f.46b, *‘ona fuli ane lea o le maa i le gutu o le tuugamau.’*

O le agaga fiafia ia Mareko ma lana tala faalilolilo, e uiga i le maliu ma le toetu mai o le Alii. O tusitusiga a Mareko ua talafegai lea ma o tatou taimi, Ua tatou fesiligia le ta’ita’i ‘au o le toaselau. E faapea foi ona tatou fesiligia o Iosefa le Arimataia. Pe sa’o pe sesē? Ioe, e faapea le ioe ma le leai. O le fesili lava lea e pei ona i ai i le aso ananafi: po’o le fesili ua atagia ai le liliuina o le tagata na afua mai i le va’aiga i le satauro, po’o se vaega o tagata ua latou tete’e atu ia Iesu a o feagai o ia ma ona puapuaga?

Pe na manatu Iosefa le Arimataia ina ia avatu ia te ia le fa’atāua e pei ona ia tanua ai Iesu? Ioe, na o Mareko na ta’ua le tanuga o Iesu e Iosefa le Arimataia ao lumanai le aso sapati.

I le Tusi Paia, e tele tagata Iutaia sa faamamalu i le aso sapati, I lenei faitauga, ua faamaonia ai le tanuga o Iesu a o lei o’o mai le aso sapati. Aisea na le faatinoa ai e Iosefa le Arimataia mea uma e tatau mo le tanuga o Iesu? Aisea na tu’u ai i tinā latou te faatinoa le avatu o mea manogi sa tatau ona faatino a o lei tanua Iesu? O se manatu atonu, o le faailoa o le olaga faamamāina, o le upu mulimuli lea ua tuuina atu e le tagata na lē manatua le Alii i ana a’oa’oga ma faatinoga. Ou te manatu i le faitauina o lenei tala ma le matautia o le gagana tusitusi a Mareko, o le tala i tagata na avea ma fili ia Iesu ma le upu mulimuli ua latou faailoa mai.

Ao feagai i tatou ma mālō ma ekalesia ua pulea le lalolagi i e o latou ta’ita’i i nei onapo, e faapea le ta’ita’iga e pei ona tatou feagai nei e pei ona tusia e Mareko.

**Tatalo:** Tatalo mo i latou ua feagai ma mea faigatā ina ia latou maua le fesoasoani. **Amene.**

**Mafaufauga loloto:** O tala mai Uk, o le tanuga o e matitva. Faitau iai i le ekalesia so’ofaatasi i le Uk i le uiga o le faia o le amiotonu faapea le agalelei atu.

**Aso Toonai Novema 10, 2018 – ‘Toe foi i le lumana’i’ ‘Back to the future’**

**Tusi Faitau:** Mareko 16:1 – 8

**Matua:** f.7, *“A ia outou o atu, ina ta’u atu i ona so’o atoa ma Peteru, e muamua atu o ia ia te outou i Kalilaia; tou te iloa ai o ia i lea mea, faapei ona fetalai atu ai o ia ia te outou”*

O le tala ua ma’ea le tapunia o le ma’a o le tu’ugamau. O Iesu sa avea ma ta’ita’i ua maliu. O ta’ita’i o le lalolagi ua manumalo la latou molimau ua maliu Iesu. O le finauga ua ma’ea lona faatinoga.

Peitai, o le upu moni ua liliuina le lalolagi, ma ua faamuamua i latou sa puapuagatia ma le lē taualoa, a ua faamaulaloina ē sa faasilisili. O tamaita’i ua

latou iloa le Alii ua toetu mai, ua faapea ona ola ma tala'i atu le mālō o le Atua, e pei ona faailoa, o e na mulimuli ua muamua, a o e na muamua ua mulimuli.

O ta'ita'i o le Lotu Iutaia na latou le talia o nei upu e pei ona faailoa e tinā, 'ua toetu le Alii', O Iesu ua le iloa o ia i le mea sa tanu ai e Iosefa le Arimataia – peita'i ua toetu o ia (16:6)

O le tala ua faailoa, ina ia toe foi i Kalilaia na valaauina ai e Iesu o ona soo, latou te maua ai le lumana'i o le olaga o le soo mo Keriso.

O le mea lea ou te fiafia ai ia Mareko. I le fuaiupu e 7, o tamaita'i ua faailoa i ai latou ua faailoa mai le tala peita'i, i le fuaiupu e 8, ua maua foi i latou i le gatete ma le matata'u. O le va'aiga i le toetū e le tatau ona faaii faapea.. O tagata uma e va'ava'ai atu i le faai'uga fiafia, e tatau ona maua e tagata uma le o'o mai o le tala lelei. O le va'aiga a tagata e tatau ona tu'ufaatasia mea uma, ma aumaia ai le tala lelei mo tagata uma.

Peita'i, e le faapea manatu o Mareko. O le tagata na te aumaia le fesili e fesili ai pea le tagata, i le fa'amoemoe ma fesili pea. O le uiga tāua lea ua tatou maua i lo tatou tu'u fesili, o le fesili e avea ma so'o moni e mulimuli ai ia Iesu i Kalilaia, faapea le lalolagi atoa.

**Tatalo:** Le Alii e, seia e faaa'ogaina tamaita'i na mulimuli ia te Oe ma le feau o le toetu, ia faapea foi ona faia e le ekalesia i onapo nei. **Amene.**

**Mafaufauga loloto:** Poo e manatu ina ia faamaonia pea au fesili? Aisea?

## **'Ua tauave e le Atua i ona a'ao.' 'Held in God's hand'**

### **1 – 'Faamanatuga' 'Remembrance'**

( saunia e Malcolm Carroll )

**Aso Sa, Novema 11, 2018. 'O le Faamanatuga o le Aso Sa' ('Remembrance Sunday') 'Matou te manatua pea'**

**Tusi Faitau:** Luka 22:14 – 20

**Matua:** f.19, *"Ona tago ai lea o ia i le areto, ua faafetai, ua tofitofi, ma avatu ia te i latou, ua faapea atu, "O lou tino lenei, ua foaiina atu mo outou; tou te faia le mea nei e fai ma faamanatuga ia te au,"*

E i ai mea e pei ua galo peita'i, e i ai taimi e toe manatua ai. O le tinā ua toe manatua lona āiga ma mea taua sa ola ai. O lenei ua faamatala se tala i aso ua leva, ina ua aulia lona 60 o ona tausaga. O le tala ua toe faamatala lava ia te ia, ma lona lē usita'i i ona mātua, ina ua alu atu i le mea o loo faatalitali ai nofoaafi i Lonetona na lona tuagane matua o Len, ma talotalo ma faatofa atu ia Len ina ua alu i le taua; Latou te le'i iloa ua faatofa atu ma faamavae ia te ia, o lo latou uso na oti i le taua muamua o le lalolagi, 1918.

O le a se mafua'aga ua fa'aaauai ai le manatua o tagata? Ae maise, aisea e manatua ai vaaiga leaga?

O le mea muamua, ina ia tatou iloa ai le lē toe fai o mea sesē e pei ona tupu mai. O le tāua lona 3 o le lalolagi o lo o tatou faatalitali atu i ai. O va'aiga faanoanoa ua uma ona tupu e le tatau ona toe tupu.

Lua, tatou te faailoa atu i tagata uma ua tatou nonofo faatasi ma le lalolagi ua le maua le nofo fealofani. I lenei Aso Sa, ou te manatua tagata uma, ina ia maua le filemū o le Atua i loto ma agaga.

I Aso Sā uma, ua valaauina i tatou e Iesu ina ia manatua o ia. O le la'asaga i le faamanatuina, ma auai faatasi ma ia, i mea uma sa ia faia. I lenei vaiaso, o le a tatou feagai ma le faitauina o le Tusi Paia ma auai i le 'Faamanatuga', o le soifua atoatoa o Iesu ua faailoa mai ina ia tatou faia pea, ma tumau ai i le faatuatua.

**Tatalo:** I le goto o le la ma toe alafa'i i le aso fou, tatou te manatau ai le alofa o le Atua, o le Alii e le liliu lona alofa e faavavau. **Amene**

### **Aso Gafua Novema 12, 2018 – 'Ia manatua le Tulafono'**

#### **'Commanded to remember'**

#### **"Aso o Fitafita taua" Virtrance Day.**

**Tusi Faitau:** Esoto 12: 21 – 28.

**Matua:** ff. 24, 25, *'Tou te tausia foi lenei mea, o le tulafono ia te oe atoa ma au fanau e faavavau lava. A outou oo atu i le nuu e foaiina mai e le Alii ia te outou. Faapei ona ia fetalai mai, ona outou tausia lava lea lenei sauniga.'*

O le tasi lenei faafitauli ia te a'u ona o le faatonu mai o tulafono e ao ona faia peitai, lea o lo'o ou faataunuaina. O le isi faafitauli, ona o le tausia o le tulafono. O Iesu na suia atoa le Tulafono i le 'aua, i le faia'. Ia faatino le tulafono ina ia alofa i le Atua atoa ma tagata. O lenei ua tatou maua le Tulafono fou o le faaolaina, ma le malutia o tagata uma e ala ia Keriso Iesu.

Ua tatou maua le tulafono o le 'manatua'. O le upu 'manatua', o le upu tāua i le Feagaiga Tuai. Aisea? O le upu o lo'o taoto ai le faaolataga. O le faatuatua e āiga faatasi ma le Atua, o lenei ua faatonu mai ina ia 'manatua' le silisili 'ese o le Atua, ma auai faatasi ma tagata i mea uma na ia faia. O nei fa'atinoga ma gao'io'iga, ua faamatata mai i tala, ma avatu viiga ia te Ia i le faiga'ai ma le pese, faapea le faailoga e 'manatua' pea, o le falaoa (tino) ua faamomoina, ma le toto ua faamaligiina. O le 'manatua' ma le faatuatua, e o'o faatasi ma u'u lima faatasi. O le 'manatua' o le Atua na faaolaina i tatou, o le galuega na faia e le Alii a'o tatou vavamamao ma Ia, o le fili sa faaleagaina i tatou, ina ia manatua le Atua na faaolaina ai le tagata.

O le faatuatua, o le talia lea o galuega a le Alii na ia faia, Ia fiafia ma olioli i tatou i le mafutaga ma le Atua ua mafuta faatasi ma fiafia faatasi ma tagata. O le 'manatua', o le toe vaai lea i le faia e le Atua o le tagata. I le va'aiga faale Tusi Paia, o i tatou o fanau uma a le Atua ma faaauau e ia lo tatou ola, e ala i le togiola ia Keriso Iesu.

**Tatalo:** Le Atua seia e alofa ma faamanatu mai ia te au, o au o le atalii o le Atua. **Amene.**

**Mafaufauga loloto:** O aso uma e faia e le Atua le faaolataga mo tagata uma. I aso lelei faapea foi aso leaga, e tumau lava le alofa o le Atua faatasi ma ona tagata.

**Aso Lua Novema 13, 2018- ‘O le mea e ala ona manatua’ What we should remember’**

**Tusi Faitau:** Isaia 46:8 – 11

**Matua:** f. 9, *‘Ia outou manatunatu i mea muamua talu mai le vavau; auā o a’u lava le Atua e leai ai lava se tasi; o le Atua, e leai se ma te tutusa;*

O se vaega toaititi o i matou o lo’o maua ata e pei ona pueina, e manatua ai mea na tutupu i aso ua tuana’i, e toe vaavaai i ai, ma toe manatunatu i ai ma mafaufau i le tuana’i sa ola mai ai. E i ai mea e manatua ma teu i o matou loto. E pei ona manatua le faitauina o le numera, o le faatele i le 2, 2 ni tasi ua 2, lua ni lua ua 4...

E faapea le Atua ina ia manatua o ia i o tatou loto. I lenei lalolagi ua faatumulia i faaososoga a le fili ma le tiapolo, o le Atua lava ua ia filifilia i tatou i mea ua ia faailoa mai. O le Atua na te lē taitaia i tatou i mea e leaga ai poo ni atua sesē. O le Atua silisili o loo galue pea o Ia ma faataunuu ma faaauau ana galuega i le lalolagi i mea lelei ua ia faia.

O le manatu ina ia manatua le Atua ma lona natura, o le Atua ma lana galuega ua faaolaina ai i tatou.

**Tatalo:** O le a se mea o loo finagalo ai le Atua e manatua ai o ia? Faitau le Tusi Paia ma mafaufau i ai. **Amene**

**Mafaufauga loloto:** E mafai ona e faia se polokalame e te mafaufau ai ma le to’amalie ma mafaufau ai i le Alii?

**Aso Lulu, Novema 14, 2018 – ‘E manatua e le Atua’  
‘What God will remember’**

**Tusi Faitau:** Salamo 103:1 – 14

**Matua:** ff. 9,14, *‘E le aoai mai pea lava ia; e le faamoemoe foi lona taosa e faavavau. Auā ua silafia lava e ia le mea na fai a’i i tatou; ua manatu ia o le efuefu lava i tatou.’*

O le tamaiti’i o Jenny o le ta’ita’i o le Ekalesia, na ia tuuina mai ia te a’u le meaalofa o’u te feagai ai ma fono vevesi a tiakono, faapea le ekalesia. O se vaaiga ua faamatala ai Pooh faapea le matagofie o uiga o manu e pei o tala a tamaiti. - ‘A, o le manu e lapopoa ona mata: o le vaaiga o le lapiti ma ona uiga; o manu e fiafia e tautatala ae leai se tonu lelei e maua ai.; – ‘A, o lea ua ulufale mai Tigger’.

E faapea se va'aiga e pei o le tala ina ua ulufale mai Jenny i le faitotoa. I lea aso na o le lua lava mea na manatua e Jenny, na o le tusi e ave i le pusa meli, ma le tusi o lo'o i ai se tupe mo a'u. Ina ua ulu atu i le faitotoa ma le tusi e tasi, na gugulu tagata uma, ma ua ia iloa ua i ai se mea ua faaletonu. Ua ia mautinoa le mea o lo'o tupu.

'O le a se mea ua galo ai e le Atua i nisi o tele o taimi? E aunoa ma le fetalai mai ina ia tafieseaa mea faaletonu o le lalolagi, a o le Alii ua pese mai le pese taua mo tagata uma. O le talia o talosaga mo nei tupulaga ua faatasia ai i latou – faafetai i le tumutumu o kamela ma lapiti.

Na faapea tala a Jenny 'Le Alii e, e iai se mea o loo tumutumu ai le nuu i Islington'.

Na vave atu Peteru ma iloa le tumutumu o tagata i le faitotoa o le alofa, peita'i ua foliga ua galo i le Atua poo ai i latou e tatau ona faaolaina e sao i le faitotoa o lona mālo.

E tele tusi ua tatou iloa ai le Atua na te manatua i tatou, na te iloa i tatou, o i tatou uma na faia i le lefulefu. O ia na filifili i tatou, na te filifili fo'i ina ia lē manatua o tatou sesē i le tuana'i ona o lona alofa tunoa e ala ia Keriso Iesu.

**Tatalo:** Le Alii e. ua e silafia ē ua sauaina, i latou ua fia maua se fesoasoani. Aumaia le malosi e faatino ai lou alofa i tagata, **Amene.**

**Mafaufauga loloto:** O le a se ta'ita'iga o le a feagai ai ma lenei aso?

**Aso Tofi Novema 15, 2018, 'Manatua o oe o le efuefu.'** **Remember that you are dust'**

**Tusi Faitau:** Failauga 12:1-7

**Matua:** *f. 7, 'ma toe foi atu le efuefu i le eleele e pei ona i ai ia, ma toe foi mai le agaga i le Atua o le na foaiina mai ai'.*

E toatele tagata o loo soifua i atunuu o lo'o tele ai le tamāoa'iga faapea le soifua faafualoa, e fa'apea fo'i le o'o mai o ma'i e pei o le Alzheimer's i le tele o tagata.

Pe a manatua, e 44 miliona o tagata na maua i le Alzheimer's i le 2015, e faapea foi le va'ava'ai atu i le 150 miliona o tagata, o le a maua i le Alzheimer's i le 2050.

O'u te manatua Ivy, ma le o'o mai o le galo o lona mafaufau, ua avea ai ma faafitauli i lona olaga – ua galo ia te ia le falai na tu'u i le ogaumu ma ua sasao le afi, ua tu'u atu fasipepa i le ogaumu ma ua a'afia ai le eletise, ma feanu i le afi. O le tamaita'i sa galue i le falemeli, ua le mafai ona talanoa i tagata, ua tele foi meli ua le manatua pusa e tu'u i ai.

I vaiaso uma sa fesoasoani ai lona atalii e avea o ia i le nofoaga e va'aia ai tagata mama'i, e faapea foi aso uma i taeao ma afiafi sa fesoasoani ai lona atalii i le

tausiga o lona tinā. Na le manatua e si ona tinā le atalii peitai, na va'aia le fiafia o tinā ina ua faatino o mea uma e pei o faia i lona āiga- o le feso'otaiga ma le tinā ina ia maua e le tinā le mafutaga e pei ona i ai.

E i ai taimi, e oo mai ai i ai tatou le galo atu o le mafaufau. O le galo e faafuaseia lona oo mai peita'i, e oo mai i ai tatou uma.

I lenei faitauga, ua faailoa mai e le Failauga e o'o mai le faai'uga o mea uma.

Ia manatua mea uma e tāua, a'o tatou maua. O ai o le a toe manatua mea tāua a ua uma le taimi sa tataua ona manatua ai? Ia manatua pea le Atua.

**Tatalo:** Tatalo mo i latou ua le manatua o latou mafaufau. O le tatalo o loo atagia ai lo tatou fesoasoani i o tatou tagata. **Amene**

**Mafaufauga loloto:** O ai na te manatua i toe taimi? O le tagata pagota na manatua Iesu i luga o le satauro. Na faapea lava ona fai?

**Aso Faraile Novema 16, 2018. 'Ia manatua lou tagata' 'Remembering who you are'**

**Tusi Faitau:** Teuteronome 26:1 – 9

**Matua:** ff. 7, 8a, *'ona tatou alalaga atu lea i le Alii le Atua o tatou tamā, ua faafofoga mai foi le Alii i o tatou leo, ma ua silasila mai i o tatou tiga, ma a tatou galuega mamafa, ma le sauaina o i tatou, ona aumaia lea o i tatou e le Alii mai Aikupito ...'*

E to'a iti'iti tagata o lo'o ola i ana, i se tasi o nuu i Lonetona e pei ona faamatala e Malcolm Carroll. Na iloa i latou ma le va'aiga maoa'e: ua latou faaaoāina mea ua lafoa'i, po'o lapisi o mea ua le aogā. O i latou nei ua fa'aigoaina, 'the Wombles'- e i ai tusi faasolo a le BBC news ma pese ua faailoa ai pese siva na faasalalauina i le 1970. Ou te manatua le slogan, o le catchphrase,- 'Remember you're a Womble !'

O le 'manatua', e pei o se va'aiga ua to'e tepa i tua, ua toe 'manatua' ai aso ua tuana'i. Peitai, o se upu ua toe suia lo latou ola mai le tuana'i i le taimi nei. O le avea ma tagata o loo i ai le manatua o le aso ananafi faapea foi le loto fa'amagalo, o le upu o lo'o i ai le faamanuia ma le aga'i pea i luma o le ola.

O fanau a le Atua latou te manatua le aso ananafi, ma manatua tala o le faaolataga i lenei aso, o tala fiafia o le faamalologa e aga'i ai pea i luma o le soifuaga o le olaga. .

Ou te manatua o a'u o le tagata Womble. Peā manatua o ia mea, ona e iloa lea o lo'u identity, o lou faasinomaga, o le olaga e pei ona ola mai ai. O le vaaiga, e iloa ai le soifuaga moni o le tagata sa soifua mai ai.

O le 'manatua' o le Atua, e lē na o faaaliga a le Alii i taimi ua tuana'i peita'i, o le 'manatua' e tosoāina ai lo'u tagata ma le faamoemoe i le lumana'i, ma soifua ai faatasi ma le Alii ma lona faaali mai.

**Tatalo:** O le lalolagi ua manatu ua tu’ua ma lafoaina peitai, o le Atua ua ia faalelei ma faatāuaina. Le Alii e, fesoasoani mai ia te a’u ma le Ekalesia ina ia o atu ma fesoasoani i tagata ua faitauina i latou o tagata ua lafoaina, **Amene.**

**Mafaufaga loloto:** Peā manatua e tagata le Atua, e toe faia e le Atua i latou e pei ona ia faia ai.

**Aso Toona’i Novema 17, 2018 - “O le papa na tofitofia mai ai outou” “Cut from one rock”**

**Tusi Faitau:** Isaia 51: 1 – 3.

**Matua:***ff.1-3, ‘Faalogo mai ia ia te au, outou o e tausisi atu i le amiotonu, e ua saili i le Atua; ina vaavaai ia i le papa na tofitofia mai ai outou, ma le gutu o le lua na elia mai ai outou’.*

Ou te le o manatua le mafua’aga na faaleagaina ai le masini ma ua le mafai ona toe faia. Na o’u faatali i le nu’u o Shropshire o i ai telefoni malolosi i le vaega’au i Cleveland i le kalapu mo le o’o mai o le taavale ua faaleagaina. O le van ma tagata o loo aumaia tagata o le nuu, o tala a tagata o loo iloa ai talanoa i le tetele o le faatinoga o le taua. Ua faasinosino lima i mea ua faaleagaina, o mea o lo o i ai meatau e faia ai le taua, na ou iloa ai lea o tagata e au faatasi ma a’u, ma o le va’aiga tāua lea ia te a’u i le auai i le taua, o le English Civil war.

Ua toe manatua le papa na toe faaolaina mai ai au ao taoto i lalo ao faia le taua, le tagata faamaoni e tauina le taua mo le atunuu o Egelani.

O le Kerisiano e toe manatua mea sa tutupu, e lē na o mea na tutupu ae o le olioli o le loto ina ua aua’i i mea na tutupu. O le manatua o mea ua tuana’i, ua toe aumaia ma faagae’etia ai i tatou i le toe fuata’iga o le olaga i lenei vaitaimi. O faatinoga a le Atua i taimi ua tuana’i, ua faatasia ai i tatou ma Keriso i le taimi nei ma faaauuina lana folafolaga mo le manuia o tagata.

O le ‘manatua’ o mea uma e ‘manatua’ ai le Atua ma mea uma na ia faia. O i tatou na tofitofia mai le papa e le Atua, ma maua le olataga ua faaolaina ai i tatou.

**Tatalo:** Faafetai i le manatua o lo matou lumana’i ma le feagaiga na faia e le Atua mo i matou. Ia viia lona suafa e faavavau. **Amene.**

**Mafaufaga loloto:** O mafaufauga faakerisiano e fefaaso’a’i, e toe fuata’ia o tatou olaga, e tupu ai le faalateleina o o tatou manatu, faapea le lui’ina o o tatou loto e faataunuu ai a tatou feau ma le faatasi mai o le Atua.

**‘Tauaveina i aao o le Atua.’ ‘Held in God’s hand’**

**2. Ua tu’ua e o. Letting go**

( saunia e Vron Smith )

**Aso Sa Novema 18, 2018 ‘Tatou o ma ia tini le faamoemoe’**

### **‘Let go for a goal’**

**Tusi faitau:** Filipi 3: 12 – 16

**Matua:** *ff,13,14, ‘Le au uso e, ou te le manatu ua ou maua, a o le mea e tasi ou te faia, ou te faalagolago i mea ua tuana’i, ou te momo’e punou a’i foi i mea ua lumanai, ou te tausisi atu i le faailoga, ia maua ai le tau i na valaauina ai a’u mai lugā e le Atua ia Keriso Iesu,’*

Pe ā mafaufau i le Olimipika ma le tu’uga i le 100 mita, ua va’ava’ai atu ua fa’atulaga vae i poloka ma ua sauniuni, o maso o le tino ua lagona i le loto, o le mafaufau atoa o le tagata tamo’e ua sauni atu i le tausinioga.

Mafaufau i le toe 10 sekone, o mea uma sa tapena i ai, i le tausaga atoa ma le mafatia, o le faamalosi e momo’e punou a’i, o le tigā o vae, o le loto ua tau faaletonu peita’i, o le ofoina atu o le ola, e faapaleina ai oe i le manumalo i le tini, pe lē manumalo a ua tu’u atoa i ai le tino le mafaufau ma le agaga i lenei tausinioga. O le va’aiga lea ma le matagofie i ai latou ua tausiniō ma le loto ma le faamoemoe. O le va’aiga ua taitoatasi ona finau i le tau, o le sini e faapaleina ai. O le a se tauiviga sili ua tosoaina i ai a’u ina ia o’u maua le pale o le ola e pei e ona momo’e punou a’i o tagata tausiniō ina ia mau le pale o le manumalo?

Ua faamanatu mai e Paulo le manumalo o Keriso i le toe soifua mai i le tuugamau ma mau faatasi mai ia i le ola e faavavau, o le manumalo lea o le Kerisiano, o le pale o le ola mo oe ma a’u, o le tini o le faamoemoe ua tausiniō i ai. E faapea se ata o lo’o tatou tausiniō pea i ai, ma le valaau mai a le Atua ina ia tatou tamomo’e pea ina ia maua le tau e pei ona valaauina ai i tatou e le Atua e ala ia Keriso Iesu.

**Tatalo:** Peā ua faatetele lau mānava ma vesia oe i le tamo’ega? Taumafai e faagesegese lau mānava ma o’o ai i le tini lou faamoemoe. O le mānava i fafo, ua e faailoa ai le manulauti ua e momo’e pea i ai. **Amene.**

### **Aso Gafua Novema 19, 2018. ‘Faamamulu ma ola atili ai pea’ ‘Let go and live the more’**

**Tusi Faitau:** Mataio 6: 25 -34.

**Matua:** *f.25b.26, ‘E le sili ea le ola i mea e ‘ai, ma le tino i le ofu? Ia outou vaavaai i manu felelei, latou te le lulu saito, pe selesele, pe faaputu i fale saito, a e fagaina i latou e lo outou Tamā o i le lagi. E le sili ea lo outou lelei i lo latou?’*

O le ata tifaga e lei mavae atu nei, na faailoa ai le tagata ua faasalaina i le oti. Na fesiligia o ia e tagata pe aisea ua le popole ai i le oti. O le tali a le tagata, ‘o le popole i le oti, e le mafai ona tuu’esea ai le o’o mai o le faasalaga’.

I le sailiga a saianisi na latou faailoa ai, o le popole i le ola, e faapuupuuna ai le soifua, nai lo le faapoopoo atu o le ola e pei ona mafaufauina. Peā faatusatusa i faamatalaga a le ‘au saianisi, e sa’o le tala a le tagata e pei ona tali mai i le fesili e pei ona fesiligia.



E faapea le natura o mea, tatou te popole i mea ‘ai ma lavalava faapea mea uma e maua ai le olaga solo lelei e pei ona faamatalaina i le Human Right mo tagata. E le gata i lea, ae tatou te popole i mea ua tatou le iloa, o mea e ona tutupu mai ma taia ai i tatou, o faalavelave faafuase’i e vesia ai i tatou ma le maua se lafitaga.

O le upu taua ua o’o mai i lo’u mafaufau, o le Tusi Faitau i le asō. O le upu, ‘lo outou lelei’ ‘E le sili ea le ola ... ma le tino...’ ‘E le sili ea lo outou lelei i lo latou?’

O le manatu autū lea, e ta’ita’iina ai i tatou, ina ia tatou va’ai i le lautele o lo tatou faamoemoe, nai lo le manatu o le tagata e vaai i mea ‘ai ma mea inu ma lavalava e tusa ma le aso.

O le valaauina ua valaau ai i tatou, ina ia silasila i le lelei ma le tele o le tamaoiga i le mālō o le Atua – o le Atua alofa na te faia mea uma i lo tatou ola, e le faaitiitia ao le mālō o le Atua e faia pea mo le tagata e pei ona faia e Iesu Keriso ma fuatele mai.

**Tatalo:** Tautai mai lau afio ina ia tuuina atu lou ola mo lau afio ma lou malo. **Amene.**

**Mafaufaga loloto:** Ia e maua se meaalofo mai le Atua ua tuuina mai mo oe i lenei aso.

**Aso Lua, Novema 20, 2018. ‘Faamamulu, ma ave uma’ ‘Let go and give all’.**

**Tusi Faitau:** Failauga 3:1-8.

**Matua:** ff.1,2, *‘O le mea ma lona tausaga i mea uma, ma ona lava po i mea uma lava i lalo o le lagi; o ona po e fanau mai ai, o ona po e oti ai; o ona po e totō ai, ma ona po e liai ai le mea ua totōina’*

O le faitauga e iloa ai le soifuuga o le ola, faapea mea ua mavae atu, o le soifuuga tāua lea mo le tagata. O tagata su’esu’e e faatāua tele le taimi – taimi e te faatino ai o au feau i taimi ua tuana’i, faapea lenei taimi ma le aga’i atu i le lumanai. E mafaufau i le ola e pei o se mea ua tu’ua faatasi i lenei ola sa soifua ai.

O le va’aiga lea a le tusitala, ma le Failauga na tusia ai lenei tala. Na ia va’ai i le soifuuga o le tagata ma lona taimi e pei ona tuuina mai i le tagata. Na ia taumafai ina ia iloa mea uma na faia faapea le i’uga o le ola, faapea ma le oti ua faaumatia ai mea aogā e ona tupu mai, i le tagata ma lana galuega. O le taimi na te faatonuina la ta filifiliga. Tatou te faatino, lagona, ma mafaufau peitai, o nei faatinoga ua valaauina ai le tagata ina ia faamamulu o faatinoga, filifiliga, o lagona ma manatu. Aisea ua tatou faitauina ai o lenei tala?

Ou te manatu, ua tatou le faailoa atu le tāua o o tatou olaga, ma fufulu o tatou mata tatou te iloa ai le tāua o o tatou taimi ua galo i ai tatou le faatinoga a le

Atua. Peā tatou faitau i leni tala e tatau ona tatou tuuina atu o tatou taimi ma faatinoga i le Atua i aso uma o lo tatou ola.

I leni taimi, aisea e le tuuina atu ai i le Atua o tatou mata e fufuluina, faapea pesega, ma taaloga ma musika, faapea le teuina o tatou fale faapea ma o tatou taimi uma i le Atua? Peā tuuina atu mea uma ma o tatou taimi i le Atua, e faapea ona foa'i mai e le Atua lona tamāoaiga ma le sosia faula'i mai o lona alofa mo i tatou.

**Tatalo:** Le Atua o'u te tuuina atu o mea uma ia te Oe, seia e faatele mai o lou tamāoaiga i aso uma o le ola. **Amene**

**Mafaufauga loloto:** O le a se taua o lou taimi i lou olaga? E lelei ona amata sau tusitusiga e amata i upu tomua a le Failauga, 'O le taimi ma lona...'

**Aso Lulu Novema 21, 2018 – 'Tuu'ese le olaga tuai a ia naunau atu i le ola fou' 'Let go the old and desire the new'**

**Tusi Faitau :** Isaia 65:17 – 25.

**Matua:** *ff,17,18, 'Auā faauta mai, ou te faia le lagi fou ma le lalolagi fou; e le toe manatua mea na muamua, e le alu ae foi i le loto. A e peitai ia tatou olioli ma fiafia e faavavau i le mea ou te faia'*

Mafaufau i lou tagata, o lo'o e mafuta faatasi ma le Atua, a'o faia e le Atua le lalolagi tuai ma mea na ia faia, ma va'ava'ai i le faatinoga e pei ona i ai i nei aso. O mea ua ta'eta'ei ma ma'a numinumi ua iloa ai le olaga mafatia, o mea ua fa'aleagaina, o le tagi, ma le fia 'ai, o le olaga le malutia faapea le liaina o le ola.

O le va'aiga a le Atua i le tula'i mai o le lalolagi fou ma le ola fou, o se va'aiga ofoofogia ua le manatua ai le galuega muamua na ia faia.

Mafaufau i a'ao o le Atua, o a'ao o le Alii na ia faia mea uma e gatete ai o tatou lagona peā va'ava'ai atu i mea na ia faia, o a'ao na ia faia ua toe faaleleia, ma toe faatula'i mai i foliga e pei ona faia ai. O le Atua ua faia mea uma, o mata ua va'ai i le aso ananafi o leā tula'i mai i taimi nei. O le Atua ua lagaina le olioli o le faamo'emo'e, fiafia, mafuta faatasi, o la'au taumafa ua fuatele mai, o faato'aga ua seleseleina, o le olioli ma le olaga ua le uma le loto faafetai.

O le a sau vaai i lou mafuta atu i le Atua a'o feagai o ia ma ana galuega mamana?

Ia e manatua, ua liliu mai le Atua ia te oe ma faapea mai, 'Find joy forever in what I am creating' O le a se lagona e tupu mai ia te o'e?

Peā e lagona i lou loto le finagalo o le Atua ma lana galuega atoa ua fiafia i ai, tatou te lagona mea taua e pei ona naunau iai i le lalolagi fou ma le ola fou e pei ona tatou naunau i ai.

**Tatalo:** Ia manatua le Atua ma lou aua'i faatasi ma ia i le galuega o lana foafoaga. **Amene.**

**Mafaufauga loloto:** O le a se mea ua faia e le Atua mo oe? O a ni mea tuai ua le manatua, atoa ai ma le olioli i le olaga fou ua e maua?

**Aso Tofi Novema 22, 2018 – ‘Faamamulu ma avea ma a’u’ Let go and be mine “Aso Faafetai – Thanksgiving Day”**

**Tusi Faitau:** Ieremia 31:31-34.

**Matua:** *ff.33,34, ‘... ou te tuuina la’u tulafono i totonu ia te i latou, ma ou tusia ai i o latou loto e fai a’u mo latou Atua, o i latou foi e fai mo’u nuu. E le toe a’oa’o atu foi le tagata i lē la te tuaoi, ma le tagata i lona uso, e faapea atu, Ia outou iloa le Alii; auā e iloa a’u e i latou uma lava’*

I le ta’aloga sa masani ai ona ta’aalo, e galulue faatasi peā fia maua le manumalo. Peita’i, e i ai isi tagata ta’aalo e nātia o latou lagona, o le faamo’emo’e ina ia manumalo peitai, ua faalata e le isi tagata le isi tagata, ma ua fete’enai ai o tu’utu’uga ina ia manumalo ai le ‘au. O lē ua iloa uiga faalata, pe cheated, ua taumuimui ma faailoa le lē fiafia ma taofi mau i ona manatu. E le fiafia e faamamulu ona lagona. E faapea le uiga o ta’aloga.

E faapea le olaga o i tatou, peā faia’ese tagata se mea ua faaleagaina ai i tatou, ua le toe talia e le loto se upu mai lea tagata faalata. Ua silafia fo’i e le Atua uiga faapenei o lo tatou ola. I lenei aso, ua tatou faalogo ai i le Atua ma lana valaau i āiga o Isaraelu ma Iuta, i taimi mai le amataga sa ia osia ai le feagaiga ma le loto atoa ma latou, peita’i ua liliu ‘ese le tagata ma lē manatua o ia ma lana feagaiga.

O le mea ‘of’ofogia mo Isaraelu ma Iuta, ua suia atoa e le Atua o lana fuafuaga, o le Atua na te faamagalo i le nuu agasala, na lei manatua e le Alii le nuu ma ona sesē e pei ona faia lava pea. Ina ua galo le alofa, e le’i galo i le Atua lana fanau, fai mai Ieremia o le feagaiga sa tusia i papa ma’a e Mose e ta’ita’ina ai le nuu, lenei ua faailoa mai e Ieremia ua tusia e le Atua le feagaiga i o latou loto, ma ta’ua i latou o lana fanau.

E faapea foi ona tatou faalogoina le valaau alofa a le Atua, *‘Ou te tuuina atu o la’u tulafono i totonu ia te i latou, ma ou tusia ai i o latou loto; e fai foi a’u mo latou Atua.’*E faapea ona faia e le Atua mo i tatou. Pe mafai ona tatou faia faapea i o tatou tagata?

**Tatalo:** Le Alii e, ia o’u iloa le upu ua tusia i loto o o’u uso ma tuafafine, ina ia a’oa’oina a’u e faamagalo atu i o’u uso ma i latou uma. **Amene**

**Mafaufauga loloto:** A’o e feaga’i ma tagata i lenei aso, mafaufau i le Atua po’o leā se mea ua tusia e ia i o tatou loto.

**Aso Faraile Novema 23, 2018**

**‘Faamamulu ma ta’ita’iina’ ‘Let go and be held’**

**{ Suega ulufale Seminare Kanana Fou 23-24 }**

**Tusi Faitau:** Salamo 95

**Matua:** *ff 4-6b, ‘O loo i lona aao o mea loloto o i le lalolagi; e ona foi mauga*

*maualuluga. E ona le sami, na faia lava e ia; na faia foi le laueleele i ona aao. Ia tatou tootuli i luma o le Alii o le na faia i tatou.*

Ua vala’auina i tatou e le Salamo ina ia tapua’i i le Alii o lē na faia i tatou, ia to’otutuli o vae i lē na faia mea uma, o ana lava mea na ia faia.

Ua valaau mai le Salamo ina soia le faa’ana’ana atu i le Atua – ‘aua tou te tuuina atu le fa’aoso’osoga i le Atua e pei o aso ua mavae. O le Atua o lo’o silasila alofa ma foa’i mai o mea ua tatou fia maua i lea aso ma lea aso, e oo lava i mea faigatā.

E iai taimi tatou te mafaufau ai i le loloto ma le lautele o le lalolagi, ma le Atua na te ‘opo’opo faatasi o mea uma i ona aao, tatou manatua foi i tatou ma le tele o avanoa ua saunia e le Atua ma ‘opo’opo mai i tatou e pei o le moa na te ‘opo’opo i lana toloa’i.

**Tatalo:** Le Alii e, seia e faailoa mai le lautele o lou alofa mo a’u, ma o’u tumau ma talitonu i lau afio ma mea na e faia. **Amene**

**Mafaufauga loloto:** Mafaufau i le lalolagi ua fusia faatasi e le Atua ma lou tagata i ona aao.

**Aso To’onai, Novema 24, 2018. ‘Faamamulu ma tula’i’** ‘Let go and rise’  
**Tusi Faitau:** Luka 23:44 – 46.

**Matua:** f.46, *‘Ona valaau ai lea o Iesu, ua leo tele, ua faapea atu, “Lou Tamā e, ou te tuuina atu lo’u nei agaga i ou aao”*

Ua faamanatu mai e le tusitala le i’uga o le ola o le musiterio, o se vaaiga e le iloa le o’o mai o le oti. O le manava e pei ona soifua ai, ua avee esea ma ua uma le ola.

O faamaumauga a le World Health Organization, e sili atu ma le 55 miliona tagata maliliu i tausaga uma i le lalolagi, e tusa ma le lua sekone e maliliu ai tagata e toalua. E ui lava ina lē taofia le oti, e o’o mai lava i ai tatou, ma o se faafitauli o lo’o tatou nonofo ma feagai ai.

O le oti ua aumaia se manatu ua le mautonu, ma e tatou te lē fiafia i ai. Tatou te le iloa le aso ma le o’o mai o le oti e le toe fo’i mai, e leai fo’i se tagata e toe fo’i mai ma faamatala le mea na tupu ma vaaia i ai, o le tagata ua tuuina atu i le lalolagi ua lē o toe vaaia.

E fa’apea ona silafia e Iesu le ola o lo’o tatou i ai nei. Na fa’apea fo’i ona le maua se manatu i le oti ma le o’o mai, peitai o le tutu’iina o ona lima i fao ma faatautau mai i le koluse, na ia iloa ai le o’o mai o le oti. Na manava o ia ma le mafatia, ua silafia e ia ua tō lana manava mulimuli. O le mautinoa o lona Alii, o le Alii na te manatua o ia, o le Tamā ua tu’uina atu i ai le usita’i ma faia lona finagalo, o le Alii na te faafogaina o ia ma lana vala’au atu.

O Iesu e pei foi ona soifua faatasi ma tatou peita'i, o ia o le Alo o le Alii na faia mea uma lava ma le usita'i. Ua toe soifua mai o ia, o le toetu ma le ola mo i latou uma e faatuatua ma talitonu ia te ia, Ua faapea foi ona tatou iloa, e i ai le aso o le toetu, o le oti e lē o le gata'aga lea o mea uma. O le faamoemoe e tupu pea, pea tu'uese manatu uma, ae tu'uina atu i tatou atoa i le Alii.

**Tatalo:** Ou te tatalo mo i latou ua maliliu ina ua ofoina atu lo latou ola e avea ma taulaga mo tagata uma, faapea ma i latou ua oti faafuase'i. Ia e aaina i matou i lou alofa. **Amene.**

**Mafaufauga loloto:** O le a se mea ua e le mafai ona e faamamulu?

### **'Tau ave i aao alofa o le Atua''Held in God's hand'**

#### **3. O le lumana'i ma le fa'amoemoe.**

**A future and a hope.**

( saunia e Kate Hughes )

**Aso Sa, Novema 25, 2018. 'Galulue mo le filemū faapea le fefa'amagaloa'i'  
'Working for peace and reconciliation'**

**Tusi Faitau:** Isaia 40:1 – 5.

**Matua:** *ff.4,5, 'O vanu uma e faaeaina ia; o mauga uma ma mea maupuepue e faamaulaloia ia; Ona faaali mai ai lea o le pupula a le Alii.'*

O le soifuaga i le nu'u ua fa'atasia ona tagata, o le nofoaga ua fa'aigoaina 'O le a'ai o le filemū ma le fefa'amagaloa'i. O le nofoaga na fa'alua ona pomu i le tāua lona 2 o le lalolagi. E faatusa lenei nofoaga e pei o Dresden, o i latou na manunu'a e peā ma le 1,000 tagata na a'afia ai. O le ogatotonu o le a'ai ua malepe atoa, o faleoloa i maga'ala o le a'ai ua faaleagaina, faapea le afe ma afe o āiga ua leai ni o latou fale, o le nofoaga toaititi, e faigofie ona iloa e le isi tagata le isi tagata ua taoto mai ua oti, ma i latou ua manunu'a.

O le Malumalu o le Anelekana ua fa'aleagaina.

O le aso na soso'o ane ai, na tula'i ai le Dean o le cathedral, ma fauina le koluse (cross) mai la'au, o beams ua mu, ma fa'atū i totonu o le falesa i le vaega e faia ai le faamanatuga, ma valaauina ai se tagata stonemason, na te vaneina ia upu i lenei koluse – 'Father forgive' i ma'a o le koluse.

O le amataga fou lea o le galuega fefa'amagaloa'i mai le malumalu (cathedral) ma le nu'u atoa ua fa'amanu'alia. Ua o'o atu le galuega a le cathedral i tagata sa fe'ese'esea'i, faapea tagata na avatu le filemū mai le nuu ma faailoa atu le Koluse ma fao na faalava'au ai Iesu i lona satauro, o le nofoaga ua ta'ua faatasi, ma nuu na faaleagaina ai i le taua lona 2 o le lalolagi e pei o Dresden, Stalingrad, Warsaw, faapea Sarajevo.

Ua faailoa mai e Isaia, O vanu uma ua toe faalauleleia, o mea na faaleagaina ua toe faalafulemuina, ua faailoa ai le silisili ese ma le pule a le Atua i mea uma lava.

**Tatalo:** Le Atua e, ia avea a’u ma auala e oo atu a le filemū i le laloagi. **Amene.**

**Aso Gafua, Novema 26, 2018- ‘O le olataga mai le Atua’ ‘The salvation of our God’**

**Tusi Faitau:** Isaia 52: 7-10

**Matua:** f. 10, ‘... ua iloa foi e tuluiga uma o le lalolagi le olataga mai lo tatou Atua.’

O lenei faitauga e pei ona tatou maua, e tumu i mea uma o loo faatalitali atu i ai. O tagata ua tutu atu i le faitotoa o le nuu, latou te vā’ ai i le tagata ua fotua’i mai. O tagata ua tūtū atu ma talia le oo mai o le tagata ua aumaia le feau, e le gata i lea a’o le talia o le o’o mai o le Alii. O tagata ua va’ava’ ai atu i latou i le a’ ai, o le ala ua faalauteleina. Po’o le avefeau lea ua oo mai? Poo le Alii ea lea ua toe afio ai i Siona?

O le upu moni, e tatau ona manatua i latou ua maliliu mai fe’ese’esea’iga ma mea sa fete’ enai ai tagata militeli faapea tagata savili. Peitai, ua tatou maua i nei vaiaso le manulauti mo tagata uma, ina ia fa’agalō i faiga le amiotonu, le fa’atigaina, le o’o mai o le ita, faapea le tau ai i lē ua faia ma fili. Ia a’oa’o ina i tatou i le loto fefa’amagalō’i, auā o le Atua a’o feagai o ia ma puapuaga na ia vala’au “Lou Tamā e, ia e faamagaloina atu ia te i latou; auā ua latou le iloa le mea ua latou faia”(Luka 23:34)

I le tu’ufa’atasia o le mataupu silisili o le lauga a Paul Tillich i le 1963, ‘The Eternal Now’

O le lē manatua e ui ina manatua, e oo mai ai le loto faamagalō. Tatou te manatua i latou na faia mea leaga i ai tatou peitai, o le loto faamagalō e tatau ona le manatua mea na latou faia i ai tatou, ma tuuina atu le loto talitonuina i nei tagata. O le lē talia o le loto faamagalō atu, ua mamao ‘ese ai i tatou ma le Atua e pei ona faamagalō mai.

Peā faamagalō atu, o le Atua ua ulufale mai ma mau faatasi ma tatou e pei ona molimau i ai Isaia, o le tagata ua toe fa’afosisia mai i Ieruselema ma le a’ ai o Siona ua faaolaina. O le faamagalō ua faailoa ai le silisili ese o le Atua ua ia faaolaina i tatou- e le mafai ona tatou faia ia mea, e aunoa ma le alofa tunoa o le Atua.

**Tatalo:** Le Alii e, ia ou maua le loto faamagalō ina ia e afio ai i lo’u loto. **Amene.**

**Mafaufauga loloto:** O ai se tagata ua e le mafai ona faamagalō atu i ai? Faailoa i le Alii o ou manatu, ina ia faamagalō mai i lou loto ma faamagalō atu i tagata.

## **Aso Lua, Novema 27, 2018 – “Aga’i i luma” ‘Moving on’**

**Tusi Faitau:** Ieremia 29:4 -14

**Matua:** *f.11, ‘Auā o a’u nei, ua ou iloa manatu ua ou manatu ai ia te outou, o manatu i le manuia, a e le o le malaia, o loo fetalai mai ai le Alii, e foaiina atu ia te outou le iuga e i ai le faamoemoe.’*

Ua faailoa mai e Ieremia le nu’u o Iuta na avea e Papelonia, o se va’aiga matautia faapea le faatafunaina o le Malumalu i Ierusalema. O se va’aiga ua fetagisi ma le leai o se faamoemoe, ua fesiligia fo’i le Atua ma lana fa’atinoga, e pei ona pepese ai i ‘auvai o Papelonia ( Salamo 137). O le manatu o Ieremia ma le ‘au perofeta, ua fa’aaogāina e le Atua Papelonia ina ia faatafea le nuu ona ua le savavali i latou i ala e pei ona faailoa atu i ai latou.

E le talafeagai ia Ieremia le fetagisi ma le lē leai o se faamoemoe. Peitai, ia avea le tafeaga e toe silasila ai i le amataga fou, o le avanoa e toe mafaufau ai i le olaga sa le tatau ona o’o i ai ma manatua lo latou vaivaiga ma sesē ma faatoese i le Alii. O le faamanatu lea a Ieremia ina ia soifua atia’e le tagata i Papelonia, ia galulue ma fesoasoani i le mālō o Papelonia, ia faatoateleina le faitau aofa’i o latou tagata ma sauni i le faaolataga e toe fo’i ai i Iesusalema lo latou nu’u moni.

Tatou te le o maua o faaaitaui ma puapuaga e pei ona ta’ua i le tafeaga peitai, tatou te maua pea o puapuaga ma faaaitaui ua fetaia’i ma lo tatou ola i nei aso. E fa’apea fo’i ona fesiligia e le tagata le Atua ma lona finagalo peita’i, ua a’oa’o mai ina ia tatou ola ai e pei o tagata Iutaia i le tafeaga, ia aga’i i luma le faamoemoe, o le taimi e iloa ai le faatinoga ua le tusa ma le finagalo o le Atua, ma ta’uta’u atu o tatou sesē ma faaletonu i le Alii.

Tatou te tuuina atu o tatou lagona uma i le Atua, ma ta’ita’ina i tatou, ma aga’i atu pea i le lumanai manuia. O le faamoemoe e faa’au’au pea ma le lototele e aga’i ai pea i luma faatasi ma le Alii, ia suia i tatou e pei ona faia ai i tatou, o le tagata na faia e le Alii e pei ona ia faia.

**Tatalo:** Aumaia le lototele e tu’uina atu ma le mautinoa i lau afio i taimi faigatā, ina ia aga’i atu pea i le lumanai ma le faamoemoe i le olaga fou. **Amene**

**Mafaufauga loloto:** O i ai se mea ua e manatua ai le tafeaga i ona po nei? O le a se silasila a le Atua i nei mea ua tutupu mai?

## **Aso Lulu, Novema 28, 2018 – ‘Fusia i le fiafia’ ‘Clothed with joy’**

**Tusi Faitau:** Salamo 30

**Matua:** *f.11, ‘Ua e liua lo’u tagitu’i i le siva; ua e talaeseina lo’u ie talatala, a e fusia a’u i le fiafia’*

O i tatou o tagata kerisiano, o tagata ua talitonu i le aso maliu ma le aso o le toetu mai o le Alii. O le mulimuli i le Alii ua tatou maua ai lagona i le feagai ma le oti ma le toetu.

E faapea fo'i o tatou lagona i va'iva'iga faale tagata, faapea fo'i le mafatia ona o se uō ua maliu poo se tagata fo'i o le āiga, o se fe'ese'esea'iga ua tupu ua lē lelei o le mafutaga ua avea ai ma agasala ua le tusa ai ma le finagalo o le Atua. O va'aiga faapea, ua fa'apei o le pogisa ma le oo mai o le oti i le tagata ua tu'ulafoaina. E faapea le lē faailoa mai o le Atua i le tagata ma tu'ua le tagata ina ia toe mafaufau i ai lona tagata.

O le faailoa mai e le Salamo 139:12. *'Auā o le pouliuli e le pouliuli lava lea ia te oe; a e malamalama le po pei o le ao; e tusa lava ia te oe le pouliuli ma le malamalama'*

Ua faatauasoina o tatou mata i puapuaga ma le agasala, ua tatou le iloa ai le Atua, e pei o le Atua ua mamao 'ese ma tatou ma ua le mafuta mai peita'i, o le Alii o lo'o faatasi ma tatou, a'o i tatou ma o tatou lagona ua galo le auai o le Atua faatasi ma tatou. O le Alii o loo mafuta mai, ma ta'ita'iina i tatou, ma faatasi ma o tatou tagata ma le alofa, peā o'o mai o mafatiaga e ui ina tatou le manatua o ia.

O tatou lagona i le oo mai o le oti ua pei o se savaliga ua Malaga atu i se ala pogisa mamao lava peitai, ina ua taunu'u le ala pogisa ma a'e atu ma suluia i tatou i le malamalama o le taeao fou. Tatou te lagona le siva ina ua toe alafai mai i le aso fou, ua maua le malosi, faapea le mafutaga ma le Atua, ua fusia i tatou i le fiafia faapea le faamoemoe ua faafouina.

**Tatalo:** Ia tuuina atu lou loto atoa ia te Oe, e ui ina tanumia i le pogisa, peita'i o lou alofa ua ou toe alafai mai ai i le malamalama mai ia te Oe. **Amene.**

**Mafaufauga loloto:** O le oti ma le toetu o se vaaiga 'ofo'ofogia lea ia te oe. O le ā se mafaufauga e ona tupu mai i ou lagona?

**Aso Tofi, Novema 29, 2018 – 'Tumau ma ia taofimau' Stand firm and hold fast**

**Tusi Faitau:** 2 Tesalonia 2:13-17.

**Matua:** *f.15. 'O lenei, le au uso e, ia outou tumau ma taofi mau i uputuu na aaoaina ai outou i la matou upu po o la matou tusi.'*

O lo tatou faatuatuaga e tofotofoina i taimi e o'o mai o le loto ua faapogisaina, faaleagaina, faapea vesiga ma fete'ena'iga. O tagata ua faavevesi mai le isi i le isi, ua a'afia ai fua i latou ae le'i faimisa.

E faapea mea tāua i lo tatou ola ua faaleagaina, i o tatou āiga ma fale faapea fo'i ma a tatou galuega o lo'o faia. Peā i ai fo'i se tagata faatupu vevesi, o le a a'afia tagata sa pele i le loto ma ua o'ese, poo o le loto vevesi fo'i o le a le maua ai se galuega e pei ona moomia. O leā se silasila a le Alii i nei faafitauli ua tatou feagai ai? E faapefea ona tatou ta'ua le Atua, o le Atua alofa a'o silasila o ia ma iloa o mea faigatā ua feaga'i ma tatou ma lenei ola?



Ua tusi atu Paulo i le 'au-kerisiano i Tesalonia, 'ina ia tumau ma ia taofi mau'. Peā fai ua a'oa'oina ma faatuatua i le upu a le Alii, e le tatau ona tatou tu'ulafoa'i ma lē talia le a'oa'oga e pei ona a'oa'o atu. E pei ona tatou maua i tusitusiga i le aso ananafi, o le Atua o lo'o faatasi ma tatou i taimi o le pogisa faapea le malamalama, ma faatupuina pea lo tatou faatuatua, i taimi ua tofotofoina ai i tatou.

Tatou te atia'e le faatuatua ma iloa le Atua i auala 'ese'ese ua faailoa mai. Ia tatau ona tete'e atu i faa'oso'osoga ua tatou le talia ai le Alii ma lona faailoa mai. Ia tatou 'tumau ma taofi mau i le upu a le Alii,' ona tatou alafa'i mai ai lea i le malamalama, ma lo tatou faatuatua ua tuuina atu i le Alii ma tumau ai ia te ia.

**Tatalo:** Le Alii e, fesoasoani mai pea oo mai o mea faigatā ina ia ou tumau ma taofi mau ia te Oe. **Amene.**

**Mafaufauga loloto:** O lea se va'aiga ua e valaau atu i le Alii ina ia e tumau ma taofi mau i taimi faigatā?

**Aso Faraile, Novema 30, 2018 – 'O le lagi fou ma le lalolagi fou' 'A new heaven and a new earth'**

**Tusi Faitau:** Faaaliga 21:1 – 4.

**Matua:** f.4, 'E sōloiesea foi e le Atua loimata uma i o latou mata'

O le Archbishop o Rowan Williams i lana tusi *Meeting God in Mark*, ua faamatala ai le o'o mai o le 'Mālō o le Atua' e pei o le 'regime change' po'o le 'mālo ua suia'

O ta'ita'i ma ali'i sili o le mālō i le lalolagi ua avea ma mata'i sāuā, ua faamatalaina e tagata o 'Satani' po'o 'Tevolo', o tagata e le fa'alogi i le Atua, ua fa'ateteleina ai galuega ua fa'aleagaina ai le si'osi'omaga ma faia ai e le Atua, ua latou tu'uina tagata i falepui fa'apea le sāuaina o tagata, o nisi ua tatoso ma fasiotia. I le feagai o le Atua ma nei va'aiga, o le Atua ua afio mai i lona nofoalii, ua ia suia atoa va'aiga i ta'ita'i sāua, i le Ta'ita'i na faia le togioala i le la'au ma le koluse i luga o le mauga o Kalevario.

O le mālō fou ua suia atoa e le Alii mai le mālō tuai. O le Ta'ita'i fou, o le Atua lava na faia i tatou i lona alofa, o le Atua agalelei, o lē na te aumaia le tulafono fou, o le Alii na te sōloiesea loimata uma i o tatou mata, ma mafuta faatasi ma tagata nai lo le sau'ina i totonu o nofoaga puapuaga.

O le va'aiga a le Fa'aaliga ua le toe i ai se tagi po'o se auē, ua mavae atu ta'ita'i sāua tuai, aua o'o mai su'iga o le mālō fou.

O tagata uma e avea ma tagata o le mālō fou, o kerisiano ua avea ma tagata o le mālō pe a papatisoina, ma talia i latou e le Ekalesia i lenei mālō fou. Ua suia le mālō tuai o Ierusalem ma faailoa le mālō fou ua oo mai, e pei o le tamaita'i

fa'atoanofotane, ma ona la'ei ua pupula ma le matagofie i le aso fiafia o le fa'aipoipoga.

**Tatalo:** Ua olioli lo'u loto ina ua o'u ola i le suia o le mālō fou, o le mālō o le Alii o lo'o i ai le lumana'i manuia ma le fa'amoemoe. **Amene.**

**Mafaufauga loloto:** E faapefea ona iloa le manumalo o le mālō o le Alii i lau aulotu ma lou nuu?

**ASO TOONAI, Tesema 1, 2018: “E leai se na te faate'a'eseina mai i tatou.”**  
[Nothing can separate us]

**Tusi Faitau:** Roma 8:35-39.

**Matua** (ff.38-39): *Aua ua 'ou mautinoa, e lē mafaia e le oti, po o le ola, po o agelu, po o alii, po o e malolosi, po o mea i nei ona po, po'o mea atali, po o le maualuga, po o le loloto, po o se tasi mea na faia, e lē mafaia e ia mea ona faate'a'eseina mai i tatou i le alofa o le Atua, o loo ia Keriso Iesu lo tatou Alii.*

O le tusi faitau leni ou te mana'o ia faitauina i o'u toe sauniga! O se tasi leni o manatu pito taua e fetufaa'i ai le 'au Kerisiano ma nisi tagata: Aua e le tu'u'eseina lava i tatou mai le alofa o le Atua, pe vaeluaina foi i tatou mai lana silafaga i se isi lava mea, tusa lava po'o fea tatou te aga'i i ai.

E faatasi mai pea o IA: e alofa, e a'oa'o mai, e lavea'i mai, e ta'ita'i mai---a e maise lava pe a tatou pa'ū'ū, natia lona alofa sili, e fesoasoani mai lava ina ia tatou iloa e i ai lo tatou aogā, e faapei ona ia faia ai le tagata i lona faatusa paia. E i ai lo tatou sa'olotoga, tatou te fulitua ai i le agalelei mai o le Atua, ua fai lo tatou lava loto, ma ua le mulimuli tonu e tusa ma lona finagalo.

Peitai, tatou te lē mafaia, e lē fīa tau ma sui mai foi, e lē taofia lava lona alofa mai. Ua na faaali manino mai le na alofa i le soifuaga, e ala ia Iesu lea na malii ma toe soifua mai nai le oti ma le tuugamau. O lea na faailoa mai e le aposetolo o Paulo i lana tusi faalua i le 'au Kerisiano i Korinito, “*Auā o ia o le Ioe i mea uma ua folafolaina e le Atua, o le mea lea ua tatou Amene ai foi e ala ia te ia, e o'o ai i le viiiga o le Atua.*” (2 Korinito 1:20).

O le mea lea, po'o a lava faigata ma puapuaga ua mavae, tusa foi po'o fea le loloto e o'o i ai, po'o le a foi le moni o faanoanoaga, tusa lava po'o fea e o'o i ai le loto faavaivai ona o le feitaga'i, a e maise lava i taimi o taua ma sauaga, e lē tu'ulafoa'iina lava i tatou e aunoa ma se faamoemoe lumana'i, auā e tumau pea le alofa o le Atua.

A e lē gata i lea, a tatou tutula'i faatasi i a tatou tapua'iga, ma faapea ane, “Ua matou ta'utino ma le loto talitonu ia Iesu Keriso,” o lo tatou faamaonia lea o Iesu ua na faaali mai le Atua i ana fetalaiga ma faatinoga, ua molimauina ai e faamaoni le alofa o le Atua ia te i tatou.

**Tatalo:** Lo’u Alii e, ua ou fiafia aua e leai se mea e punitia ai lou alofa mai; tusa lava po’o a mea tutupu ia te a’u, ua e tuuina le faamoemoe mo lo’u lumana’i, aleluia! **Amene.**

**Mafaufauga Loloto:** E tusa ma le malamalama o le alofa o le Atua, o le a sou iloa e uiga i lou lumana’i faamoemoeina?

## **Tala o le afio mai ua faaalii i le Evagelia a Ioane 1:**

### **Upu a le Atua**

[Saunia apoapoa’iga: Sham P. Thomas]

**ASO SA, Tesema 2, 2018: “Sa i le amataga le Atua.”**

**In the beginning, God**

**Tusi Faitau:** Kenese 1:1-5.

**Matua** (ff.1-2): *Na faia e le Atua le lagi ma le lalolagi i le amataga. Sa so’ona nunumi le lalolagi ma ua gaogao, sa ufitia foi le moana i le pouliuli; na fegaoioia’i foi le Agaga o le Atua i le fogātai.*

O le amataga o se galuega o le ‘afa lea o lona faatinoga! Ua le o galuega uma foi e faai’u i se lelei. A e le afaina lea, aua e tatau ona muamua fuafua ma mafaufau lelei, o ulua’i laasaga ia e faatino ai se faai’uga fiafia, e faapei ona fai mai se tasi o alaga upu, “O faiga malaga o le afe maila e tatau lava ona amata i le la’a muamua!”

O le tusi faitau o le vaiaso lenei, o le a tatou manatunatu ai i le Atua o ia lava o le “mua’i laasaga”, po o le foafoaga, po o le liu-tino tagata, po o le ola foi e faavavau. O le ulua’i vaaiga i le Tusi Paia, o le faatomuaga lea o le molimau faale-Tusi Paia, e faapea, o le Atua lava le amataga.

O le tala la i le “afio mai”, o le ta’iala lea i o tatou manatu ma mafaufauga i le Atua Tolu-Tasi ma lona afio mai i le lalolagi i foliga o le tagata. O le Atua o le foafoaga. O le Atua, o le Upu ma le Agaga ua faailoa mai le vanimonimo mai totonu o le gaogao. O mea uma na faia e le Atua Tolu-Tasi, ua faia ia matagofie ma lelei, ua faailoa mai e le Tusi Paia ina ia tatou molimau i lea lelei---e aofia ai ma le tagata. Ua fai lea ma lu’itau ona ua toe faaliliu e le lalolagi ua toe faavasega le tagata i le matagofie ma le itiiti o le matagofie. A e le gata i lea, ua valaauina le tagata ina ia fiafia i isi foafoaga matagofie a le Atua, e faapei o le la, le masina ma fetu, ia iloa foi ona mata’u ma tapua’i i le Atua e to’atasi, o ia lava o le Pule, o ia o le Amataga ma le Gataaga, o le Alefa ma le Omega!

**Tatalo:** Le Atua e, matou te faafetai ona o le atoatoa o le foafoaga na e faia. Foa’i mai i o matou loto le agaga e faaauau ai lea matagofie i le lalolagi na e saunia i le amataga. **Amene.**

**ASO GAFUA, Tesema 3, 2018: “Ua na saunia le so’otaga.”**

**Mending the gap**

**Tusi Faitau:** Ioane 1:1-18.

**Matua (f.14):** *Ua liu tino tagata le Upu, sa mau foi o ia ma i tatou, na matou matamata i lona mamalu; o le mamalu lava lea o le Alo e to'atasi o le Tamā, ua tumu o ia i le alofa tunoa ma le faamaoni.*

E i ai nisi o atunuu latou te saunia ni faasilasilaga taua e fautuaina ai tagata faigamalaga i luga o taavale nofoa-afi (train), “ia e taga’i ma le faaeteete!” O lona uiga, ia faaeteete ina ne’i e pa’ū i le va o le taavale ma le pulela’a e oso ‘ese ai. E sili ona mata’utia pe a fai a e telē le avanoa!

O se faatusa lea o le faigata o le lalolagi pe a oo ina vatele le va o fe’eseeseaiga i augā tupulaga, i le va o nofoaga gaogao i tua ma totonu o taulaga e fetinea’i ai le to’atele, i le va o le itupa o alii ma tama’ita’i, i le va o e mau’oa ma le ‘au itiiti le tamaoaiga, e o’o lava i nei ona po ma le eseeseaga o mana’oga o le ‘au maumea e ‘ese mai le ‘au matitiva. O se ata manino lea ua aliali mai ua tupu tele le va e va a’i le Atua paia e mamalu, ma le tagata agasalala.

O le liu tino tagata o le Atua, o le finagalo lava o le Atua ia faia le “so’ota’iga”, po o le “punitia o le va”, e va a’i le matai-tufuga ma le foafoaga (creator and creation). O le finagalo o le Atua, ua le o se “maimoaga”, ua na ona silasila mai i fe’ese’eseaiga o mea tutupu i lana foafoaga. Peitai, o le Atua o le “foafoagalua”, e fuafua ma galua ina ia faatino ma foliga mai e tusa ma lona lava faamoemoe, o lona lea finagalo. A e le gata i lea, o le liu tino tagata, o le faatinoga o le alofa e faapei ona finagalo ai le Atua, ia ta’ita’iina ma faasino i le tagata. O le Atua ua na saunia le so’ota’iga e ala i le Upu ua liu tino tagata, na soifua faatasi ma tagata---fetautalatala’i i gagana a tagata, ua avanoa mo tagata uma, e femalieu’i ma pa’i atu i so’o se tasi. Ua afio mai lava le Atua liu-tino-tagata ina ia faaalua lona silisili ese ma ia iloa e le lalolagi o tagata lona finagalo. E le gata i lea, o le afio mai o le Atua liu-tino-tagata, o le mea-alofa mai le lagi e ala i lona Alo Pele, so’o se tasi e faatuatua ia te ia, e ta’ua i latou o “fanau a le Atua.”

A e pagā lea, e lē logo mālie ona o lenei alofa-tunoa na te’ena e le lalolagi lē talitonu.

**Tatalo:** O le ‘Upu, o le Atua na liu-tino-tagata, fesoasoani mai ia matou iloa lau faaaliga, ina ia faafouina ai o matou tagata, ma saunia ai i matou mo lou toe afio faalua mai. **Amene.**

**Mafaufauga Loloto:** Pe faapefea ona matou malamalama i le Liu-Tino-Tagata o le Atua, e fai ma ta’iala i la matou tala’iga o Lou finagalo?

**ASO LUA, Tesema 4, 2018: “O le ‘Upu e leai sona muta’aga.”**

**Word unbound**

**Tusi Faitau:** Isaia 55:6-11.

**Matua (f.11):** *E faapea foi la’u upu e alu atu ai i lo’u gutu, e le foi fua mai ia te a’u; a e peitai e faia le mea ou te loto i ai, e manuia foi i le mea ou te auina atu ai.*

A e le'i faavaeina se gagana i le lalolagi i le amataga, sa leai ni upu sa leai foi ni faamatalaga, "o le tuuina atu o se mana'oga i 'upu", o se faatinoga e matuā taua ma e mana'omia sona faamalamalama lelei. "E faapea foi la'u 'upu e alu atu ai i lo'u gutu, e le foi fua mai ia te a'u," o le faamalamalama lea o le 'Upu.

Ua filifili nisi, ia tuu ai pea tusa lava pe lusi pe gau fo'i, a e aua ne'i toe tepa i tua e tau faasa'o se upu ua misi. E sili atu ona malosi se tautoga pe a fai na faatino e tusa ma le silafaga a le Silisili Ese. Ina ua o o mai i ona po ua taualoa faamaumauga tusitusia, ona faaaoga loa lea o upu ma faamatalaga e tusia i pepa ma saina e faamaonia ai le tonu.

"Ia faamautuina i le tusi", e sili ona moni na i lo na o upu ma faamatalaga e mafai ona galo. O le galo ma le lē manatua o upu ma faamatalaga e tupu ai se tasi lagona: "e leai se malosi pe a na o upu!" Pe a tuua'iina se faaletonu o faasilasilaga ma faasalalauga, manatua, e taua tele le faaaogaina o 'upu moni ma 'upu e tatau.

O le Upu o se tasi lea o uiga o le foafoaga, faamanuiaga ma le faasalaga. Ua folafola e le perofeta o Isaia le mamalu ma le tonu o le Upu a le Atua, e le fo'i fua aua o lona finagalo lea. O le upu moni, o se faamanatu pito taua lenei mo i tatou e ala i le Upu a le Atua e faaaauu pea i lea tupulaga ma lea tupulga, aua e tatau ona olaola pea. O le Upu e le taofia pe faato'ilaloina. E ono faasalaina 'avefe'au o le Tala Lelei, peitai, o le Upu a le Atua e leai sona muta'aga. Ua faailoa e le perofeta i latou e faifai mea leaga ma e fai le amioletonu, e ala i o latou manatu ma mafauauga, e le o le finagalo lea o le Atua, e lē o le Upu a le Atua. Ua latou faatupu i 'auala ma manatu faa-Satani, o ia o le "tamā" o le 'au tala pepelo ma upu faa'ole'ole e pupuni ai le finagalo tonu o le Atua.

O le Upu a le Atua e olaola, o lo'o galue, e tonu ma malosi, e tatau foi ona faapea le tagata. O le upu o le faamaoni ma le usiusita'i, upu o le amiotonu ma le faamoemoe lelei. Le fanau e a le Atua, o se lu'itau ina ia toe faaolaola le upu moni, a e le o le tau faasese ma le leai o se faamoemoe lelei, o le faamoemoe ia tatou tautua ma auuina i le faamaoni mo lo tatou Alii.

**Tatalo:** Le Atua o le amiotonu, ia avea i matou ma avefe'au o le tala lelei ma ia matou tumau ai. Ia matou auuina ma le faamaoni, galulue filifiliga, ia faatumuina i matou i lou mana e faatino ai lou finagalo. **Amene.**

**Mafauauga Loloto:** Pe tatou te faamaoni 'ea ia tatou upu, galulue filifiliga, tala'i e tusa ma le finagalo tonu o lo tatou Atua?

**ASO LULU, Tesema 5, 2018: "Si'ufofoga o le matai." His master's voice Tusi Faitau:** Ioane 1:19-28..

**Matua:** (ff.22-23): *Ona latou fai mai ai lea ia te ia, "O ai 'ea oe? Ina ia matou ave le tali i e na auuina mai i matou; se a 'ea sau upu ia te 'oe?" Ona faapea atu ai lea o ia, "O a'u o le leo o lē alaga i le vao, Inā faalaulelei ia le ala o le Alii, faapei ona fai mai ai o le perofeta o Isaia."*

E to'atele e fia pu'e ni o latou ata e teu e fai ma faamanatu. A e faafetai i saililiga fou i nei ona po, ua i ai mea pu'eata ua mafai e le tagata ona pu'e i sona lava ata (selfie), e pu'e i soo se faiga e mana'o i ai. O se avanoa e faatino ai e le tagata le ituaiga foliga e mana'o i ai, e le gata i le mana'o o le loto a e faapea i foliga i le tino. A e afai o le a le faataunuuina, ona fai lea ma faapogai e ulagia ai ma faapea ane: e te fia lauiloa i mea uma.

Afai e faamatala e le tagata e iai lona so'otaga i le Mesia, tusa lea ua na ta'u mai le Afio mai e pei o Ioane le Papatiso. O lo'o fai ma lu'itau le faailoa mai o Ioane, ona o lo'o fesiligia pea po'o Ioane tonu lea pe leai. Sa maua e Ioane le avanoa e mafai ai ona ta'ua o ia o le Mesia, o le avanoa e fai ai o ia ma tagata ta'uta'ua, e tosina loto o tagata ia te ia, e lauiloa foi ma viia o ia. A e sa na te'ena le na avanoa, ona sa talitonu ma le loto faamaoni e i ai lē e sili atu ia te ia. Sa na faamatala lona va feagai ma le Mesia. A e ina ua le manatu e fai sana molimau i lea mea, e ui lava na iai le avanoa. O le mea lea, ua fai ai o ia ma molimau i le Upu o le faavavau. Ua ia faailoa mai o ia lava o le auauna i le Mesia, ua na teuteu i le ala e afio mai ai o IA. Sa lē sailia e ia se auala e ta'uta'ua ai o ia, po'o le faavae o se faalapotopotoga e iloa ai o ia; a e o le autū ma le faamoemoe taua, ia maua nisi e fai ma so'o o le Mesia. Na faamaulalo o ia ina ia faaeaina le Alo Pele e to'atasi o le Tamā. Faauta, o le tulaga tonu foi lea mo le lalolagi o tagata, ia atagia i loto ma manatu ia foliga (selfie) o le Alii, e ala i o tatou foliga amiotonu!

**Tatalo:** Le Atua o le faavavau e, ia avea i matou e fai ma molimau e alagaina ma faalauiloa le Upu o le faavavau. Fesoasoani mai ia faatauaina o matou olaga e fai ma molimau o lau tala lelei. Ia matou iloa ona teuteu le va feagai ma lau Afio se ia e toe afio mai. **Amene.**

**Mafaufauga Loloto:** Pe faapefea ona avea i matou e fai ma faafiafia loto, e tusa ma e o lo'o fiafia e vaavaai i ata faatosina i TV?

**ASO TOFI, Tesema 6, 2018: “Ua loto vaivai le ta'ita'i.” Folly of the mighty Tusi Faitau:** Salamo 2.

**Matua (ff.1-3):** *Se a le mea ua faanunununu ai nuu ese, ma mafaufau ai nuu i le mea e le aogā? Ua tutū mai tupu o le lalolagi, ua pulega faatasi foi alii, e tete'e atu i le Alii ma lē na ia faau'uina. Se'i tatou motusia ese a laua noataga, ma lafoa'ieseina a laua maea ia te i tatou.*

O le tasi leni o tulaga faaletonu o le lalolagi ua tatou i ai nei, e mafua mai i ulu ma ta'ita'i. A e faaopoopo i lea faaletonu pe a o'o ina manatu faatauva'a le to'atele o tagata i le finagalo o le Atua na faia ai le lalolagi ia lelei. Ua tele ina manatu le tagata i mea e viia ai o ia, a e le faamuamua le viiga o le Atua ma lona silisili ese. O le Salamo ua filifilia mo leni aso, ua na faailoa mai uiga tete'e ia o le tagata i lona Atua. O le tulaga e faanoanoa ai, e to'atele ua taumafai e nānā o latou mafaufauga tete'e i le Atua Silisili Ese, ina ia avanoa le ala e faatino ai so latou vi'iga. Ua taumafai e mimilo le talitonuga i le Atua ma le faatinoina o le

finagalo o le Atua, se ia o’o ina foliga o mea tonu na mafaia i lo latou potō. Peitai, e lē o le tulaga tonu lea e tatau ona i ai. O ia ituaiga o fuafuaga faale-tagata e i ai lona tau mulimuli ane.

I le Tusi Paia atoa, ua faaalua i le tusi Salamo lenei le “ata” o le Alii ua sōisōi (‘ata’ata) ma ‘otegia. O le “ata” e le masani ona faaalua o le Alii, e soisoī i e ua taumafai e faailoa so latou potō. Ua tusia, “E soisoī le Alii ia te ia; aua ua na silafia o le a sau lona aso.” (Salamo 37:13). E sōisōi le finagalo o le Alii ia i latou ua fia iloa so latou malosī e tete’e atu. Peitai, o lenei sōisōi o le Alii, o le faatinoga lea o le lavea’iina o e naunau e mulimuli ma tausisi pea i le agaga o le loto foa’i mo le viiga o le Silisili Ese.

O le Alii le Atua, ua na faailoa lona malosī silisili ese, ua na ‘auina mai lona Alo Pele e to’atasi e faailoa le pule aoao e faato’ilaloina ai e ua tete’e mai. Ua faailoa mai foi le ala tonu e mulimuli ai i latou ua talitōnu ma faatuatua, aua e foa’iina mai lava le potō ma le malamalama e liua ai ma faatino le finagalo o le Alii. E lē pelogia lava le Atua!

**Tatalo:** Le Atua Silisili ‘Esē, ia fesoasoani mai lou Agaga: ‘Aua ne’i faaseseina pe faamata’u mai i matou ina ia mulimuli ma faatino manatunatuga tu’inanau o le lalolagi. Ia e foa’i mai le potō ma le malamalama ina ia matou tumau i lou finagalo alofa. **Amene.**

**Mafauauga Loloto:** Pe faapefea ona tatou iloa ma malamalama i fuafuaga lililo a le lalolagi fia tete’e i le finagalo o le Atua soifua i nei ona po?

**ASO FARAILL, Tesema 7, 2018: “Ua alofa mai le Atua.”** *Passion of God*

**Tusi Faitau:** Esoto 3:1-15.

**Matua** (ff.7-8a): *Ona fetalai mai lea o le Alii, Ua ou matuā vaai atu i le puapuaga o lo’u nu’u o lo’o i Aikupito, ua ou faalogo foi i lo latou alaga ona o e pule faasauā ia i latou, ua ou iloa foi lo latou tigā. O lenei, ua ou alu ifo, ou te lavea’i mai ia te i latou ai lima o Aikupito, ...*

O ia o le ‘ta’imua i le ala’, O le Atua e lē o se tupua po o le faatagata. O le Atua e mataala e faailoa ma ta’utino le ala tonu e ui ai ma savavali ai. O le ‘Liutino-tagata o le Atua’, po o ‘faaali mai o le Atua’, o se tasi lea o faasinoga ua faailoa mai i le Matua o le aso lenei. E peiseai e lē o faaalua mai le mamalu silisili ‘ese o le Atua. E mafuta mai i so’o se taimi o aso ta’itasi, a e maise i taimi e lē manatunatu lelei ai. Atonu e tupu i se faaaliga e le’i mafauauina, e faapei o le mauga o Horepa na vaai ai e Mose le afi mumū i le la’au talatala a e lē faaumatia, po o le moega o le pepe i le fale o manu i le nuu o Peteleema.

Tatou te maofa ona o auala e faailoa mai ai le Atua i faatinoga e faatauva’a i manatu o tagata, a e mulimuli ane ua iloa le pa’ia ma le mamalu e fa’agae’etia ai lotō. A o taimi foi faapenā e o’o mai faatasi ma se faasinoga i le

taimi e faagata ai le avanoa, e faapei ona faailoa mai i se ala faigofie, ua faapea mai, “*O A’u o LĒ ola, o lo’o Ola lava.*”

Ua faaali mai le Atua i ala o le puapuaga i le vaai, i le faalogo ma le lagona ua iloa ai lona mafatia ona o le agasala a isi. O le tagi a i latou ua lē iloa ua lē gagana foi i le nofopologa, ua talia la latou talosaga ia lavea’i mai, o se faailoga manino lea o lo latou faaolaina. O le faatinoga foi lea o le faamasinoga o e molia i faasalaga ma le faatālatū. E lē o lilo i le silafaga ati a le Atua, aua e faia lava lana faamasinoga tonu.

Fesoasoani Sili. E saili mai le Alii i e ua talia puapuaga ma faasa’oloto i latou, e o’o lava i e ua le lagona le fia ‘auai e faapei o Mose i le ala umi na saili ai le sa’olotoga mai le nofopologa. O i latou uma o e ‘auai i lenei faatinoga, latou te maua le ala tonu e tau atu i le faaolaina. O le va i taimi lenei o le Afio mai e faamalosi loto ai lo tatou vala’auina.

**Tatalo:** Le Alii e o le Atua na te faafouina lo matou malosi, ia faailoa mai lou alofa ma lona faamoemoe, ia matou iloa au faaaliga e avea ai i matou ma ou tagata e viia ma faaneeneina lou suafa mamalu, aua matou te maua ai le sa’olotoga moni. **Amene.**

**Mafaufauga Loloto:** Pe faapefea ona tatou malamalama ma faaa’oa’o i ai, “E alofa le Atua i ana galuega na ia faia.” E aofia ai ma i tatou?

**ASO TOONA’I, Tesema 8, 2018: “Ia talia pe te’ena o ia.”**

**Receive or reject him**

**Tusi Faitau:** Ioane 8:42-59.

**Matua (f.42):** *Ona fetalai atu lea o Iesu ia te i latou, “Afai o lo outou Tamā le Atua, po ua outou alofa mai ia te a’u, auā ua ou sau mai le Atua, ma ou sau iinei; aua foi ou te le’i sau fua, a o ia lava ua auina mai a’u.”*

O le tasi o mata’upu autū e maua so’o i le Tusi Paia, o le te’ena lea o le finagalo o le Atua e tusa ma le ola fa’avavau, le ola atalī. E molimauina lea i le soifuaga o Iesu mai lona fanau mai e o’o i lona maliu. O le mea pito sili ona tulaga ‘ese, e o’o lava i le Alo Pele o le Atua na te’ena i le suafa o le Atua. Sa le’i nātia e Iesu lona afio mai ma le faamoemoe na ala ai. Na ia ta’utino o ia lava o le Upu a le Atua, e faailoa le finagalo o le Atua e ta’ita’iina ai i le ola ua faa’ato’atoaina. Na ia faailoa atili lea faatinoga i le ola e leai se oti o i ai.

E ui ina tele taumafaiga a le tagata ia tumau pea le ola ma faateleina le tamaoaiga, a e le mafai lava ona taunuu i le ola ua ato’atoa e maua fua, o le ola faavavau, o le ola atalī. Ua faamanino mai i le tusi faitau o le aso lenei ni mafua’aga e fete’ena’i ai le faatinoga o le ‘ala tonu’.

Muamua, o nisi faalapopotoga o tagata Iutaia o e faalogologo i a’oa’oga a Iesu, o loo taofi mau pea i talitonuga ma uputu’u mai i o latou tua’ā, ua latou faatuatua ma talitonu i ai, ua lē mafai ai ona ofi se isi lava suiga i o latou manatu. Ua latou manatu o Aperaamo o lo latou ‘atua’, e aunoa ma se faailoga i



lea talitonuga ia Aperaamo e atagia i o latou olaga. A e sili ona feteena'i, ona o mea latou te faia e lē o ala ia o Aperaamo.

Lua, ua latou manatu o Iesu e tatau ona fetalai e tusa ma mea ua latou loto i ai, ia galue ma faatino foi mea e tusa ma o latou talitonuga. O le talia o le finagalo o le Atua, e faalagolago i mea ua latou manatu i ai ma tausisi i ai. O lona uiga, afai o le Atua ua le tutusa ma o latou manatu, ona gata ai lea. Ona o uiga ma amioga faigata ia, ua finagalo ai Iesu e tatalo mo lo latou faamagaloina, a o faaalua pea lo latou vaivai ma le pogisa a'ia'i lea na molimauina i luga o Kalevalio!

**Tatalo:** Le Atua e o Lē faamagalalo mai, se ia e talia i matou e tusa ma lou finagalo tonu, ma ia matou faamaoni ai e fai lau amiotonu, **Amene.**

**Mafaufauga Loloto:** Pe faapefea ona tatou tau mo le 'taua o le amiotonu' (taua i le suafa o le Alii)?

## O le Afio mai i le Evagelia a Ioane

### 2 O A'u lava ...- 2 I am

(Ua saunia: Jennifer Smith)

**ASO SA, Tesema 9, 2018: "O a'u ..." I am ...**

**Tusi Faitau:** Esoto 16:1-9.

**Matua** (f.4): *Ona fetalai mai lea o le Alii ia Mose, Faauta, ou te faatotōina ifo le mea 'ai mai le lagi ma outou, e o atu foi le nuu ma latou faaputuina, o le aso ma ana mea e tusa ai; ina ia ou tofotofa ai ia te i latou, pe latou te savavali i la'u tulafono pe leai.*

O le tusi faitau mo lenei vaiaso ua faatatau i le fesili, Po o ai le Atua i le feso'ota'iga ma mea e fai, a e pe fa'apefea foi ona alofa mai o le Atua. Peitai, e pei ona molimauina le tusi faitau o le asō. So'o se fesili lava e tula'i mai, e lotolotoi ai lava ma mana'oga o tagata o le Atua: O le a le mea'ai ua tatau mo a'u i lenei aso? O fea 'ou te moe ma malolo ai? Pe 'ou te saogalemū ai 'ea?

O Iesu, o le liutino-tagata o Ieova, na ia tali i fesili ia faale-tagata, ua toe fo'i atu i le Atua le Tamā: O a'u o le Alii na 'ou 'aumaia outou mai le nofo pologa, Ou te foa'i atu mea'ai tou te 'a'ai ai, O a'u o le malamalama, O a'u o le toetū, O lē ola pea e faavavau. O lo tatou Atua e lē na o se agaga e leai se tino, o le Atua na liutino-tagata, e iai ona lagona, e agalelei foi ma alofa i so'o se tasi.

Sa fa'agae'etia lava loto o o'u mātua, i nai vaiaso talu ona 'ou A'oga Aso Sa, a e va'ava'ai mai ua muamua fai la'u tatalo a e 'ou te le'i 'ai. E moe'i'ini o'u mata, e memumemu o'u laugutu i 'upu e lē matuā manino se ia o'o i le faai'uga ona ou leo tele ai lea ma faapea mai : 'o vai inu ma kuki!' O le Mana mai le lagi, ua i ai 'apu ma kuki manogi i le 'ai.

O la'u ole atu lea i le Atua e le faapea e tali sa'o mai le Alii i o'u mana'oga, a e o le uiga moni o le tatalo, e i ai le agaga talitonu e lē tu'ulafoa'iina le tagata

talitonu ma faatuatua. O le agaga foi lea o le a tatou iloa i tusi faitau mo lenei vaiaso. Tatou te iloa atili ai foi ma le malamalamaga: O ai le Atua o lo’o tatou talitonu ma auuana i ai.

**Tatalo:** O fea o i ai le ‘vaomatua’ ua e iloa, i lou olaga talitonu i le Atua?

Tatalo i so’o se mea ua e mana’o i ai, a e maise o mea ua mamafa i lou loto i lenei aso.

## **ASO GAFUA, Tesema 10, 2018: “Ia faia le finagalo o le Alii.”**

### **Doing the work of God**

**Tusi Faitau:** Ioane 6:25-35.

**Matua (f.35):** *Ua fetalai atu Iesu ia te i latou, “O a’u nei le areto o le ola; o lē sau ia te a’u, e lē fia ‘ai lava ia; o lē fa’atuatua foi ia te a’u, e lē toe fia inu lava ia.”*

Afai e fai mai se tasi ia te a’u: Matou te lē talitonu e i ai se Atua. A maua lo’u avanoa, ou te fesili: Se’i faamatala mai lo outou talitonuga i le Atua lea tou te lē talitonu i ai. E i ai foi taimi ou te lē talitonu ai i le Atua lea ua latou faamatalaina, a e maise lava pe a fai e faamatala mai o le Atua: e faatosina ini faailoga po o ni mea ofoofogia, mulimuli ane e lē tonu ma lē faamaoni.

O le faafitauli e tusa ma foliga ia o le Atua ua ta’ua, afai a e leai se faamanuiaga e maua, ona mou atu lea ma le alofa o le Atua. O mea ia ua faafeagai nei ma Iesu, o faigata pito latalata mai lea ia te ia---o faanoanoaga, o gasegase o le tino, ma faasauaga---e foliga na o lo’o tau mamao ma le Alii, pe a faatusatusa i nisi tulaga mana’omia. O ai la e talitonu i le Atua? O le te’ena o le Atua lea, o le faailoga lea o le ola maloloina!

E i ai le fete’ena’iga i nei manatu: A tu’u faafeagai le tusi faitau o le aso lenei ma faatinoga ia sa faatoā uma ona faia e Iesu, ona iloa lea o faailoga tonu lava ia o loo mana’omia e le motu o tagata, e pei o le fafagaina o le to’a lima afe i nai falaoa ma nai i’a iti lava. (Ioane 6:1-14). E le gata i lea, ua toe fetalai atu i le motu o tagata, “*‘Aua tou te galulue i mea e ‘ai e pala...’*” (6: 27).

O le uiga moni o lenei a’oa’oga a Iesu, ua faatatau lea, o le faailoga (sign) o ia lava lea: “...O a’u nei le areto o le ola...” (f.35). O le tagata e talitonu i le Atua e le faalagolago po’o fea e sau ai (aiga, nuu, atunuu, lanu), ma e i ai a’u togafiti faataulaitu po’o ni amioga taufaa’ata, e lē o uiga ia. Peitai, o le tagata e talitonu i le i ai o le Atua e faalagolago i le loto talitonu: O le Atua o lo’o faatasi mai pea e ala i lona Alo Pele e to’atasi, lea na afio mai i le lalolagi. O lo tatou tiute o le faailoa atu: O le Atua o lo’o ‘au ma i tatou, o le Atua o le alofa lava ia---o le tasi lea igoa o le faatuatua.

**Tatalo:** IESU e, o le Atalii o le Tagata, faapupula mai i la’u vaai, le faalogo o o’u taliga, ina ia ou iloa ai lau Afio i taimi uma. Ia latalata mai e faapei o la’u manava ou te ola ai, ma ou iloa atili ai pea lou alofa. **Amene.**

**Mafaufauga Loloto:** O fea tatou te iloa ai ua lē ‘auai mai le Atua i le lalolagi? Pe iai se auala e molimau ai le alofa o le Atua o loo faatinoaina pea?

**ASO LUA, Tesema 11, 2018: “Faatumauina ma saogalemū.”**

**Constancy and security**

**Tusi Faitau:** Isaia 60:19-20.

**Matua (f.20):** *E lē toe goto lou la, e toe mavae atu foi lou masina; e faavavau; e uma foi aso o lou faanoanoa.*

Ina ua ou taunuu i lo’u ofisa ma tatala la’u meli i le komepiuta, na ‘ou va’ava’ai i le tele o fe’au e faatatau i a’oga, o fe’au e faatatau i le tamaoaiiga tupe a e maise o fe’au mo le soifuaga maloloina o tagata, e faa’au’au nei faasilasilaga uma i le “olaga manuia” o le tagata.

E tele fautuaga lelei, a e o le tele o ia fautuaga e faatatau i sauniuniga e aunoa ma le fefe i aso ta’itasi ma aga’i atu pea i luma: Ia pasi le su’ega ulufale i le kolisi, filifili i le polokalama i sou faailoga e maua ai sau galuega, vaavaai i sou fale faatau e lelei mo le inivesi i le maketi, toleni ou ivi ia malolosi ‘aua e te faatamala i ai, fai sau teuga-tupe mo lou litaea, vaai i a’oga a lau fanau ma o latou ulua’i ta’ito’alua, etc. A tu’u fa’atasi nei mea uma, ou te talitonu o le fa’atinoga lea o le “olaga manuia” o tupulaga talavou ma e ua matutua foi---o le amataga lea o le saunia lelei mo le lumanai o le “olaga manuia” o le tagata.

A e mo lenei taimi, o le oso a’e o le lā ma lona toe goto ifo i le afiafi o aso taitasi, e tofi le aso ma ona filiga, e i ai mea lelei a e iai foi mea faigata ma puapuaga. O le ata lea o le olaga e ui atu i mea faigata, pe a fai na ona ola i aso ta’itasi e aunoa ma le faafetai i le Atua, aua o le tele o taimi e mafaufau ifo lava na o a’u ma lo’u olaga i mea e tutupu ai.

O le upu moni, e fiasia le loto pe a lelei le tulaga i le su’ega, e faapea foi ona fiasia pe a lelei fuafuaga o le tamaoaiiga tau tupe e leai se faapopoleina o le mafaufau. Ioe, o le galue ma le loto filifiliga e manuia lona taunu’uga. A e ui lava i lea, o le tusi faitau mo lenei aso, ua faamanatu mai ia i tatou: o lo’o tatou o ola i totonu o faamanuiaga mai le Atua, auā o le Atua o le alofa lava ia. O le mea lea, ou te galue, su’esu’e ma sa’ili, o lo’o maua le saogalemu e aunoa ma le popole, o isi ia o mea alofa a le Atua ua foa’i mai ou te lufilufiina ma ia lelei ona faaaoaga.

**Tatalo:** Le Alii e, ou te tatalo ia ou iloa lou alofa faamaoni, ia ou iloa lou agalelei ma lau tausiga matagofie ua ou fiasia ai nei ma aso uma o lo’u olaga.

**Amene.**

**Mafaufauga Loloto:** Ia tusia sau lava tusi e faatatau i lou olaga taumafai, ia e faamatala lou ola mautinoa e leai se mata’u pe faapopoleina i le lumana’i---tapuni ma faamau ma faatali e toe tatala pe a mavae masina e ono.

**ASO LULU, Tesema 12, 2018: “Savali i le pogisa ma aga atu i le malamalama.” Walking in the dark, towards the light.**

**Tusi Faitau:** Ioane 8:12

**Matua** (f.12): *Ona toe fetalai atu lea o Iesu ia te i latou, “O a’u nei o le malamalama o le lalolagi; o lē mulimuli mai ia te a’u, e lē savali o ia i le pouliuli, a e ia te ia le malamalama o le ola.”*

O le taimi muamua na feiloa’i ai lo’u to’alua mai Peretania ma le to’atele o lo matou aiga, sa matou taunuu i le tau afiafi i le itu i matu o le Setete o Vermont i Amerika (USA). Na malolo la matou ta’avale i se ogā ala laulelei mai le umi o la matou malaga mai le patupatu ma ‘omo’omo o le ‘auala.

Na ‘ou mua’i fa’ailoa, o le a matou savavali pe tusa o se ‘afa maila ma aga’i atu i le fale e maua ai mea’ai, le malamalama ma le mafanafana, o lo’o faatalitali mai ai o’u tau’usoga e to’a 25 i latou. O poloka ‘aisa sa to’a ua amata ona liu suāvai ma to’u’ulu ifo, o lo’o pogisa pea le po ma e malosi le mālūlū.

Ua tu’u a matou ‘ato i luga o le tama’i ta’avale toso, o mea ia sa tau’ave mai e le tamā o le aiga, a e se’i fa’aavanoa ona lima e u’u ai le fa’amalu. Manatua o fa’amalu, e lē o se mea e masani ai i Vermont, aua e tele le kiona i luga o atumauga. Peitai, sa i ai lava lona fa’amalu. Na ou fa’asino ia matou aga’i i le mati’e: “Savavali pea i luga, a e vaavaai atu loa i le malamalama o le moli, ia savavali atu loa i ai.” Ua matou taunuu ma fetagofi loa i a matou ‘ato ma savavali atu i nai minute.

O le savali i le pogisa ua lē o se mea faigofie. O lea po sa iloa le mea matou te aga’i i ai, na iloa foi le mea e o’o i ai, auā o lo’o i ai le malamalama i le taunu’uga, le mafanafana ma le feiloa’iga fiafia. Peitai, e masani lava, e i ai taimi e feagai ai ma le lagona lē mautinoa tonu po’o fea e taunuu i ai, e le mautinoa foi po’o a ni mea e tutupu mai, ni faigata ma ni puapuaga e le ma’alofia.

O le poloa’iga ua saunia e Iesu ia tatou mulimuli atu i ai, o le a tatou vaaia ai le pupula uiga ‘ese sa tatou lē iloa, ma le nofoaga sa tatou lē mafaufauina. E ui ina sa tatou iai i le pogisa, a e sa tatou moe’i’ini lava o tatou mata ma le loto talitonu, o lo’o tatou savavali ma le mautinoa i le lumana’i ua uma ona saunia. O le faamalu, ua na o se faatinoga o le ola sauniuni!

**Tatalo:** O le faamalalamaina o le lalolagi, o le pupula mai lea o le malamalama i mea pogisa o loo tatou savavali ai. **Amene.**

**Mafaufauga Loloto:** Po’o i ai se tasi ua e iloa o loo ola i le pouliuli? Meli i ai sau tusi faamalosi loto, po’o sau mea-alofa e faafiafia ai.

**ASO TOFI, Tesema 13, 2018:** “Malolo i le filemū se ia toe tu i lou mamalu.” **Rest in peace, rise in glory**

**Tusi Faitau:** Ioane 11:17-27

**Matua** (ff.25-26): *Ua fetalai atu Iesu ia te ia, “O a’u nei o le toe tū ma le ola; o lē faatuatua mai ia te a’u, e ui lava ina oti, a e ola lava ia. O tagata ola uma o e*

*faatuatua mai ia te a'u, e lē oti lava e o'o i le fa'avavau; po ua e talitonu mai 'ea i lenā mea?'*

E masani ona tatou faalogo i upu o le Matua o le aso lenei i le amataga o sauniga maliu. O ulua'i upu lava nei ua masani ai i le amataga o le solo o se maliu e aga'i atu i le Malumalu. I lo'u tiute faa-Faifeau, ua 'ou faitau so'o i nei upu mo e ua 'ou iloa ma e foi ou te lē masani ai. Ou te manatu, o upu foi ia e faitauina pe a o'o ina ou oti, ma ou te talosia o i latou uma e 'auai i o'u sauniga maliu ia latou ta'u mai 'upu lava ia ia te a'u.

Peitai, ua tatou lē faitauina atoa fuai'upu nei e o'o lava ia Iesu ina ua fesili ia Mareta: "*Po ua e talitonu mai 'ea i le na mea?'*" Manatua, e lē o faalagolago le toe tu mai o le tuagane i se tali mai a Mareta---ioe pe leai--- i le fesili a Iesu. Po'o fea e i ai le talitonuga o Mareta, e lē taofia ai le toe tu mai o Lasalo i le tuugamau.

Pe a fai o le a soifua pea Lasalo ma toe oti mulimuli ane ai, tatou te le iloa lea tulaga. Ua tatou manana'o ia fa'aloaloa o tatou aso i le lalolagi, peitai, e faalagolago lava i le tagata ma lona tulaga e ola ai i lenei olaga. O le Atua o loo soifua pea, tatou te mālōlō ina ua gata lo tatou ola ona oti lea. Ona o le Atua na afio mai ai Iesu, tatou te toe tutū mai le oti ma faatasi ma le Alii ma i latou uma ua filifilia i le ola faavavau. O e ua faatasia i le toe tutū, o le faatinoga lea na saunia e Iesu mo i latou.

A e ui lava i lea, ua lē o ia mea faigatā na fai ma 'auala e ono tu'ua ai e le tinā ona tiute tau'ave, e pei ona iai i le umukuka, a e maise o ona lagona fa'anoanoa a o savavali i le ala aga'i i Ierusalem. Na taumafai pea e fa'afeagai ma faigatā o le loto fa'anoanoa, a e o le tali atu a Iesu ia Mareta ma ona fa'anoanoaga ona o le maliu o le tuagane, o lona faamanatu atu lea o ai ia (Iesu), o le Atua lava lea, e mafuta fa'atasi mai lava, i le ola po o le oti.

**Tatalo:** Le Atua paia e, ia faatasi mai lou Agaga i loto o e ua mafatia ma tigaina i lenei aso, ia ave lea ma faamafanafanaga sili i o latou loto mafatia. **Amene.**

**Mafaufauga Loloto:** Mafaufau i se upu faamafanafana iloga i le Tusi Pese Lotu, e peseina pe faitau foi i sauniga o lou lava maliu, ma ia faamatala po'o le a lona uiga.

**ASO FARAILE, Tesema 14, 2018: "Pe toe aoga i se a le ma'a ua tuulafoa'iina?" What it is to build with rejected stones**

**Tusi Faitau:** Salamo 118:15-24.

**Matua (ff.22-24):** *O le ma'a na lafoa'iina e tufuga fai fale, ua fai lea ma ma'a tulimanu aupitoaluga. O le mea lea ua faia e le Alii; o le mea tatou te ofo ai pe a vaai i ai. O le aso lenei ua faia e le Alii; ia tatou olioli ma fiafia i ai.*

O tusi faitau filifilia mo lenei vaiaso, ua fesiligia ai po o ai le Atua, a e pe faapefea foi ona faatino le alofa mai o le Atua. O le tusi faitau mo le aso lenei,

ua faailoa mai ai le Atua ma ana galuega, ma ua faailoa mai ai foi le Atua e ona le malosi uma lava. E loloto mafaigata faaaliga ua faailoa mai.

O ai lava se tufuga faufale iloga na te fausia se fale i ma'a ua tu'ulafoa'iina e isi tufuga? Afai ua le fa'aogaina e le matai tufuga se ma'a, o lona uiga, e i ai le mafua'aga tatau ua pogai ai: O le ma'a tulimanu e tatau ona lelei i ona itu uma. Pe faapefea ona avea ma ma'a tulimanu se maa ua tuulafoa'iina, o se fale ua tatau ona lelei atoatoa? Ailoga ou te fia nofo ai i lea fale? Peitai, o le valaau: Ia tatou fiafia i ai, aua o le aso lenei ua faia e le Alii ia tatou fiafia i ai.

E lua ni mafua'aga ua faailoa mai ia te a'u. Muamua, ia talitonu o fuafuaga faale-Atua e tonu ma faamaoni ia, aua o le finagalo o le Atua i sili i manatu faale-tagata. Pe afai ou te faitau ma talitonu o le Atua e le finagalo ia tuu lafoa'i ana galuega na fai, ona ou manatu ai lea: O se a'oa'oga taua lenei ia tatou iloa ona fa'aaoga tatau le si'osi'omaga mai le pule so'ona fai a le tagata.

O lona Lua, o se mafua'aga e lē o'o i ai le iloa faale-tagata, e faapea: Pe faapefea ona tatou iloa ua sili atu ona taua ma le saogalemu o le galuega ua fausia nai lo'o le ma'a? Na afio mai le Atua i le lalolagi na IA fausia, e iai lona tapulaa, o le tagata, e i ai ona vaivaiga ma e gata lona malosi. Na maliu o IA. Ua pa'ū ma to'ilalo le tagata na ia faia. Po'o ai 'ea le Atua na ia toe faatuina mai lē ua to'ilalo? I tatou---le tagata!

**Tatalo:** Le Alii e, ia matou olioli ma fiafia i lenei aso ua foa'i mai matou te ola ai, i le manava ola, a e maise o lou alofa tele mai, ua tuu faafeagai ma o matou aso ua faatapula'aina. **Amene.**

**Mafaufauga Loloto:** Mafaufau ma manatunatu, po o ai le “ma'a ua tu'u lafoa'iina” i totonu o lou nu'u. E faapefea ona e fa'aogaina e fai ma totonugalemū o la outou mafutaga?

**ASO TO'ONA'I, Tesema 15, 2018: “Faalogo i le valaau mai i lou aiga.”**  
**Hearing the voice of home**

**Tusi Faitau:** Ioane 10:1-10.

**Matua (ff.7b,10b):** ... *O a'u nei o le faitoto'a o mamoe...Ua ou sau ina ia latou maua le ola, ia maua atili ai lava.*

Ua silafia lelei e Iesu le taua o le iloa e mamoe, e pei ona ta'ua i lana apoapoa'iga. Ua na ia silafia foi, o le a latou faalogo i le valaau a lo latou leoleo mamoe, latou te faalogo ma mulimuli i ai. E moni, latou te lē mulimuli i se tagata 'ese, a e pe aiseā? Latou te faalogo i le leo a lo latou leoleo mamoe, a e lē o iloa se fanua lafulēmū: Na te ta'ita'i ia te i latou ma ulufale i le fanua e tele ai le vao lelei e 'a'ai ai, e mapu ai, e to'a i ai ma maua ai le sa'olotoga filemū. Na te ta'ita'i i latou i le fanua, o lo latou aiga moni lea.

E to'atele ua nonofo i nofoaga ua lē o aiga moni ma ua iloa foi e lē o nuu moni ia. A e po o ai le Atua lea ma lona si'ufofoga ua valaau mai ma faalogo i lona si'ufofoga? E i ai taimi, e i ai foi aso e pa'i mai ai le lagona: Pei lava e i ai se

mea ua faalogoina, a e o se lagona e 'ese i le mafaufau. E iai taimi i le olaga masani faale-tagata, e fetaia'i ai ma se tasi tagata sa le'i mafaufauina lava. A o ia lea, ua na faatino se galuega uiga 'ese sa tau mamao lava ma sou manatu, peitai, ua faaalai ai le alofa ma le agalelei faale-Atua sa e moemiti i ai.

A e iai foi taimi, a o faafeagai ma fe'au masani o aso taitasi, ua faatelevave ona faataunu'u mana'oga o le loto, a e mulimuli ane ua manatua nisi mea lelei sa tataua ona faatino. A e ui i lea, e mafai lava ona taumafai ina ia faalelei. O le mea lea, ou te talitonu ai o le 'valaau mai i lo'u aiga', o le si'ufofoga lava lea o le leoleo mamoe ua valaau mai: "O a'u nei o le faitoto'a o mamoe", o le musumusuga lea faale-agaga i o tatou loto i aso fai pea.

O le mea lea, afai tatou te faautauta i le faataunu'uina o tiute tau'ave o aso faiso'o, ia to'a ma manino le faalogo: so'o se mamoe poto ma atamai e iloa ona mulimuli tonu i le faasinoga---a e pe faapefea i tatou? Mulimuli tonu, ia faia ma le loto faatuatua.

**Tatalo:** Le Atua Silisili 'ese, o lo'u faitoto'a, o lo'u faasinoga tonu, o le malamalama i o'u ala, faailoa mai lou si'ufofoga ia 'ou faalogo ma lagona. **Amene.**

**Mafaufauga Loloto:** O fea le nofoaga e te faalogo so'o ai i le si'ufofoga o IESU i lou olaga i le taimi nei? O le a le si'ufofoga o le Atua mo 'oe i lenei va i taimi o le Etiveni (advent)?

**O le Etiveni i le Evagelia a Ioane**  
**3 O le leoleo mamoe lelei, o le ala, o le vine moni.**  
[Apoapoaiga saunia: Lesley G. Anderson]

**Malologa o le Kerisimasi – Aoga Aso Sa & Aualavou**

**ASO SA, Tesema 16, 2018: “O Iesu o le leoleo mamoe moni.”**

**Jesus, the true shepherd.**

**Tusi Faitau:** Esekielu 34:1-16.

**Matua (f.16):** *Ou te sailia foi lē ua sē, ou te aumaia lē ua tulia, ou te fusia lē ua gau (lavea), ou te faamalosiā lē ua vaivai; a o lē ua peti ma lē ua malosi ou te faaumatia ia, ou te fagaina i latou i le faamasinoga.*

I le tasi po sa ou alu i le taavale ua na o a'u lava i le lotu (falesa) a o leaga lava le tau. Na sesē le 'auala na 'ou ui ai se ia o'o ina ou taunu'u i se nofoaga ou te lē masani ai. Na pei a'u o le mamoe na sē, ua mana'omia lava sē e fesoasoani mai. A e ina ua ou maua le fesoasoani, ona saogalemu ai lea ma manuia le taunu'uga. O le upu moni, o se lu'itau pe afai a e sesē le 'auala, e popole foi le loto ma o'o ina faaletonu.

O ē ua ta'ua i le tusi faitau o le aso lenei, e foliga o tagata ua sē ua leai se leoleo mamoe. Ua latou iai i le tulaga e leai se faamoemoe. Ua tu'uaunoaina i latou i se

tulaga e faa'umatia ai e le fili. A o'o ina ta'ita'i seseina mamoe e le leoleo mamoe sesē, ona 'ave'esea ai lea o mamoe mai le Leoleo Mamoe sili, ma faaseseina ai i latou e i latou lava i le leaga o le agasala. O lona i'uga, e 'ave'esea le filemu ma leai se fiafia ma olioli e molimauina ai. Na nonofo le lalolagi o tagata i le pouliuli ma le pogisa o le oti faale-agaga, o le mea lea na 'auina mai ai e le Atua le Tamā le Atalii o Iesu, o le leoleo mamoe tonu na te sa'ili ma faaola i ē na sē ma lē iloa.

O le va i tau o le Etiveni, e leai se tasi mea ua na o le faamanatu: O i latou uma ua ta'u fanauina i luma o le Alii, e leai lava se tasi ua sē. Pe afai ua sē i latou e faapei o mamoe ua lē iloa, o le mea lea na afio mai ai Iesu e sa'ili ina ia 'aumai i latou ma faafouina ia te IA lava, aua o ia o le Puluvauga e maua ai le faaolataga moni.

**Tatalo:** Le Alii e, o 'oe o le Leoleo Mamoe faamaoni, ta'ita'i i matou i 'auala tonu ma le faamaoni o le olaga. Ia faafouina i matou i le mafutaga faatasi ma lau Afio. **Amene.**

**ASO GAFUA, Tesema 17, 2018: “O lou ‘auai mai ua lava lea.”**

**Sufficient presence**

**Tusi Faitau:** Salamo 23.

**Matua (f.4):** *E ui lava ina 'ou savali i le vanu o le ata o le oti, ou te lē fefe lava i se mea leaga; aua o 'oe ta te faatasi ma a'u; o lau laau ma lou to'oto'o e faamafanafanaina ai a'u.*

Na ou a'oa'oina le Salamo 23 a o o'u itiiti lava. O le tasi lenei o Salamo ua sili ona ou fiafia i ai. Ua na 'au mai ia te a'u le lagona o lo'o faatasi mai le Atua i taimi uma. Pe a o'o mai taimi o faanoanoaga, na te 'au mai le lagona o le loto tele ma le faamalosi; e foa'i mai le malosi i mea ou te vaivai ai aua o lo'o faatasi mai le Atua i taimi pogisa o le olaga. O ia lava o le leoleo mamoe lelei, e alofa ma agalelei ia i tatou i so'o se taimi.

O le Salamo e tosina i tatou i le lagona e faatasi mai pea le Alii i taimi uma, o le leoleo mamoe lelei e tausia i mamoe i taimi uma, e o'o lava i taimi o fesoua'iga o le olaga. E faatasi mai le Alii i taimi pe a feagai ma faigata mamafatū, o faigata o le fesaga'i ma le oti, aua e faatasi mai pea le Alii ma i tatou. O moni lona 'auai mai, e tumau ma faaauau pea, e lava ma totoe se ia o'o lava i le i'uga o le oti!

O le oti (death) o le i'uga o le ola faale-lalolagi, o le mea lea ua matata'u ai le to'atele. O le Salamo ua na ta'ita'i i tatou ia iloa le Alii, o Ia na foa'i mai lona soifua i luga o le satauro i Kalevalio, ina ia 'ave'esea ai le fefe ma le mata'u aua o le oti e lē o le i'uga---o lo'o i ai le ola faavavau.

O lona 'auai faatasi ma i tatou ua fai ma faatusa, “o lau laau ma lou to'oto'o”, o le faatinoga e tasi. O le “laau”, i le tasi itu ua fai ma ala e faasino ma ta'ita'i ai mamoe, a o le tasi itu o lo'o i ai le lave (hook) e fesoasoani lea i le leoleo



mamoe. Ou te faamoemoe e leai se fefe i lo'u oti, "*aua o 'oe ta te faatasi ma a'u.*" Ua ou talitonu ma faatuatua i le liu-tino-tagata o le Atua, aua na afio mai ina ia faaola ia te 'oe ma a'u, na te lē tu'una lava i tatou ina ia faatoilaloina!

**Tatalo:** Le Alii e le Atua, matou te faafetai i lou 'auai mai ia te i matou i so'o se aso ma so'o se taimi, a o matou iai pea i lenei olaga, **Amene.**

**Mafaufauga Loloto:** O le a sou manatu i lenei Salamo 23? Se'i e mafaufau ma manatunatu ini auala e mafai ona e fesoasoani ai i e ua mafatia ma tigaina i lenei va i tau o le Etiveni.

**ASO LUA, Tesema 18, 2018: "O le tāua, 'O a'u."**

**The great 'I am'**

**Tusi Faitau:** Ioane 10:11-18.

**Matua (f.11):** *O a'u le leoleo mamoe lelei. E tu'u atu e le leoleo mamoe lelei o lona ola mo mamoe.*

E faa-fitu ona fetalai Iesu, "O a'u", e faatatau ia te IA lava i le tusi Evagelia a Ioane. O lona faasologa lenei i aso ma taimi: "*O a'u nei le areto o le ola...*" (6:35). "*O a'u nei o le malamalama o le lalolagi...*" (8:12). "*E moni, e moni, ou te fai atu ia te outou, o a'u nei o le faitoto'a o mamoe.*" (10:7). "*O a'u le leoleo mamoe lelei...*" (10:11). "*O a'u nei o le toe tū ma le ola...*" (11:25). "*O a'u nei le ala, ma le upu moni, ma le ola; ...*" (14:6). "*O a'u nei o le vine moni...*" (15:1).

O le va i tau o le Etiveni, o le taimi lea tatou te toe mafaufau loloto ai i faatinoga na faia e le leoleo mamoe lelei, e faapei o Ida Walker o le nuu o Trinidad, o ia lea sa faailoa ma faatino lona agaga alofa ma le agalelei faamaoni e lagolago ma fesoasoani i e ua mafatia i le mativa, atoa ma e mama'i ma aafia i faigata o le olaga.

O Iesu, o le leoleo mamoe faamaoni, ua filifilia faapitoa o ia mai le tele o leoleo mamoe. Ua ia valaau mai ia i tatou o ana mamoe, ia tatou mulimuli atu ia te ia. E faapei o Ida, e tataua ona tatou talia le valaau, aua ua na iloa lelei le ala ma le nofoaga e mapu i ai. E ao ina tatou mulimuli aua o ia ua na iloa ona puipui i tatou i mea faigata e aafia ai. E mafai e ia ona faatupu le loto talitonu faamaoni ia te ia, aua na te mafaia ona saunia le ala tonu e tusa ma o tatou mana'oga tataua. Ua na silafia mea uma ua tatou manana'o i ai, o mea faigata, o lo tatou finafinau, e o'o lava i mea ua tatou popole ai ma atuatuva'e ona o mafatiaga. A e sili ona taua, ua na silafia i tatou i o tatou igoa (10:27; Isaia 43:1), e valaau ia i tatou ta'ito'atasi e ala i taleni ua faatamāoigaina i tatou.

O le leoleo mamoe lelei, "*E tuu atu ... lona ola mo mamoe*". Na fa'amomomoina lona tino, na maligi lona toto i le alofa ona o i tatou i luga o le laau o le satauro. O le faatinoga le na o le faamagaloina o a tatou agasala. Ua faamamāina i tatou mai le leaga, ma ua avanoa ai le ala tatou te sao atu i le manuia e faavavau, faavavau lava!

**Tatalo:** Le Atua Silisili ese, o le leoleo mamoe lelei mo lo’u olaga, faamalosi mai ia ou iloa ona alofa atu e tausi lelei i ou tagata filifilia e tusa ma le “areto o le ola.” **Amene.**

**Mafaufauga Loloto:** Pe faapefea ona e mafuta atu ia Iesu, o ia o le Leoleo Mamoe lelei, ia mafai ai ona liua le lalolagi o tagata ia lelei ma tausa’afia?

**ASO LULU Tesema 19, 2018: “Tumau i le faatuatua ina o tofotofoina.”**

**Trust amidst trial**

**Tusi Faitau:** Ioane 14:1-7.

**Matua (f.1):** *Aua le atuatuvaletou o outou loto; ia outou faatuatua i le Atua, ia faatuatua mai foi ia te a’u.*

E to’atele i latou o lo’o tau’aveina ‘avega mamafa. A o nisi e maua pea le loto faapalepale. A e o nisi foi e faafeagai pea ma lu’itau e tele o le olaga, e faapei o ma’i o le tino ma le mafaufau, a e maise o lagona o le tu’ulafoa’iina ma le to’ilalo. E fetai’i le tagata ma le loto faanoanoa, loto mafatia ma le faavaivai, lagona o le leai se faamoemoe ona o fa’afitauli o le olaga. I totonu o nei tigā ma faigatā o le olaga, o le loto atuatuvaletou ma le leai o se faamoemoe, peitai, o le o’o mai o le Etiveni, o le faamanatu mai lea o le afio mai o le Alii o Iesu, o le Faaola o le lalolagi uma, o ia na te ‘aumai le fiafia ma le olioli i nuu uma. A e le gata i lea, e faamanatu mai pea lana fetalaiga i ona so’o loto popole ma le atuatuvaletou: *“Aua le atuatuvaletou o outou loto.” “Ia outou faatuatua mai foi ia te a’u (Atua).”* Ua ta’utino mai e Iesu ia i tatou, o le alofa o le Atua le Tamā, ua faatinoina lea i lona afio mai i le tino. E lē uma, e lē gata foi lona alofa ia i tatou. E ‘auai mai o ia i o tatou mana’oga uma lava. O Iesu o le mea-alofa a le Atua mo lo tatou faaolaina. A e o le faaolaina o i tatou, o le faasatauroina lea o Iesu, aua na mafatia ma tigaina se ia o’o lava i le oti. Na ia silafia lava o le a mafatia ona so’o e ala i lona maliu. A e na ia silafia foi, ona o le mana malosi o le Atua, e toe tū mai ai i le aso tolu, ma avanoa ai faitoto’a o le malō o le lagi.

O le loto talitonu ma le faatuatua i a’oa’oga a Iesu, tatou te iloa ai o talatu o le ola faale-lalolagi, ua saunia ai e Iesu le ola fou mo i tatou i le malo o le Atua. O le faamoemoe lea o le manumālō o loo tala’iina pea e le Ekalesia Kerisiano i le lalolagi: A e o le nofoaga ua ato’atoa ona saunia, e lē toe i ai ni tigā ma ni puapuaga, e leai ai foi se faanoanoa o i ai. O le ata moni lea o le fetalaiga a Iesu: Aua le atuatuvaletou o outou loto; ia outou faatuatua i le Atua, ia faatuatua mai foi ia te a’u.

**Tatalo:** Le Alii alofa e, ua matou faafetai ona o Iesu i lona soifua, lona maliu ma lona toe tū manumālō mai. Ia tatou faatuatua ia te ia, ma olioli ona o le mea-alofa o le faaolataga. **Amene.**

**Mafaufauga Loloto:** O le a le uiga moni o le faatuatua i le Atua? O le a le mea e tatau ona e faia e saunia ai ‘oe i le faatuatua moni i le Atua? O a ni lu’itau e ono feagai ma ‘oe a o e sauniuni e talia le faatuatua moni i le Atua?

## **ASO TOFI, Tesema 20, 2018: “Nofo faatalitali faale-Atua.”**

### **God’s expectations**

**Tusi Faitau:** Isaia 5:1-7.

**Matua (f.7):** *Auā o le tovine a le Alii o ‘au, o le aiga o Isaraelu lea, o tagata o Iuta foi, o lona faato’aga lea na ia fiafia i ai; ua ia faatalitali i le faamasinoga, faauta foi, o le fasi tagata; na ia faatalitali i le amiotonu faauta foi, o le uio.*

O le Pese i le Tovine na amata o le pese o alofa’aga. E ma’eu le loloto o mo’omo’oga o lenei pese. Ua faatusaina le Atua i le faifaato’aga ma le tausī manu. O Isaraelu o le faato’anofotane, o tagata lava o Isaraelu ma le nuu o Iuta, ua ia alofa i ai. Ua ia faaigoa ia te ia o lana tovine. E faapelepele o ia i vine ona o le manatu ia fua mai i ni fua lelei ma le aogā, ma ia fua tele mai lava. Sa maualuga le agaga na faatalitali ai mo ni vine e fua mai, ia fua tele mai. Na saunia e le Atua mea lelei uma mo Isaraelu. Na ‘aumaia o ia mai le mea sa nofopologa ai i Aikupito. Na lavea’iina e ala i le savavali i totonu o le Sami ‘Ula’ula, na feagai ma faigata i le vaomatua, se ia o’o ina taunuu i le Nuū na Folafoalaina. Na sasa’a atu le alofa ma le agalelei o le Atua ia te i latou, ma le faamoemoe e tatau ona faafetai ma faamanu i le Atua, ma ia faaauau lo latou ola agalelei atu i nisi.

Ua faatalitali pea le Atua, ia te i latou faapea ma nisi---o fua e maua i le alofa, agalelei ma le loto fesoasoani. Peitai, ua fua mai i fua leaga, o le manatu faapito ma le amioletonu. O nisi o i latou ua ola i le olaga fifilemū ma le lelei o le tamāoaiga. Ua latou manatu o se olaga lelei lea mo i latou, peitai, o lo’o lotolotoi ai ma le tele o soligatulafono, o sauaga faapea ma le amioleaga.

O le olaga e aunoa ma se faamasinoga tonu, e fua mai ai o maseiga ma le toto masa’a; e tu’ulafoa’i i e matitiva ma le lē tagolima, e leai foi se faamasinoga tonu e ui ina alalaga mai i le fia sa’oloto. O le finagalo o le Alii, ia tatou fiafia ma alolofa atu i soo se tasi, e pei ona alofa mai ia i tatou. E agalelei le Alii i e matitiva ma e nofo i le pologa. E lē faatua’oia le alofa o le Alii i tagata uma, e lē faapitoa i tausaga, i lanu ma gagana, po’o talitonuga faale-faatuatua. Na afio mai lava le Alo Pele e to’atasi o le Atua le Tamā, ina ia fa’ato’ilaloina le pologa a ia maua le sa’olotoga ina ua to’ilalo le oti ma le tu’ugamau. Na toe soifua mai Iesu Keriso ua manumālō ai le lelei i le leaga, lea ua tatou maua ai le sa’olotoga e ulufale i le manuia e faavavau, faavavau lava.

**Tatalo:** Le Alii e lo matou Atua, a’oa’o mai i matou ia matou iloa ma malamalama i le uiga moni o le eseeseaga i le va o “lelei” ma “leaga.” Ina ia matou faamaoni ai e fai le amio lelei i aso uma o lo matou ola. **Amene.**

**Mafaufauga Loloto:** Mafaufau loloto i le tusi faitau o Isaia 5:1-7, i le tuu faafeagai ma le Lotu i nei ona po? E faapefea ona saunia i tatou i nei ona po ma lenei tulaga ua faailoa mai, e ala i le tusi faitau?

**ASO FARAILE, Tesema 21, 2018: “Iesu, o le vine moni.”**

**Jesus, the true vine**

**Tusi Faitau:** Ioane 15:1-11.

**Matua (f.11):** *Ua ou fai atu nei mea ia te outou, ina ia tumau ai lo’u olioli ia te outou, ia atoatoa foi lo outou olioli.*

O Iesu lava, ua lē o se isi, o le vine moni. Ua ia faataunuuna le mea-alofa o le fua o le Agaga: *“o le alofa, o le olioli, o le filemū, o le onosa’i, o le mataalofa, o le agalelei, o le faamaoni, o le agamalū, ma le amio mamā”* (Kalatia 5:22-23). O le Atua, lona Tamā, o le faifaato’aga, e puipui ma faalelei ina ia fua mai ni fua.

Tatou te fiafia e talia mea-alofa o fua o le Agaga ina ia tatou ola ai i le matagofie ma faasoa atu mo le lelei o nisi. E taua lo tatou feso’otaiga lea ma Iesu, pe a fai i tatou ma Kerisiano e lē o ni lālā mamate. Afai tatou te tutupu e faapei o ni lālā mamate, o Iesu ma lona afio mai: O ia e fesoasoani ina ia tatou fua mai fua lelei, e viia ai le Tamā, o ia lava o lo’o alofa ma agalelei mai. Tatou te mana’omia fua lelei o le Agaga, pe afai ua tatou vaivai ma leai se malosi. O le faatumutumuga lea o a’oa’oga a Iesu, ua ia fetalai mai ai: Ua ou fai atu nei mea ia te outou, ina ia tumau ai lo’u olioli ia te outou, ia atoatoa foi lo outou olioli (f.11). O le pogai lea o lo tatou manumālō!

O lo tatou ‘auai i lenei va i tau o le Kerisimasi ma le faailogaina o le vine moni, o Iesu lea. O IA lava o le autu o lenei aso faailogaina. Ua foa’i mai e le Atua le Tamā lenei mea-alofa silisili, o lona Atalii o Iesu, o le Faaola o le lalolagi uma. Na afio mai o ia e lavea’i i tatou mai le agasala, o le saunia lea o le faaolataga tele (i le ola faavavau). Ia tatou olioli ma fiafia e talia lenei mea-alofa silisili, aua o Iesu na faataunuuna lenei faatinoga ofoofogia ua avea ai i tatou ma fanau moni i le silafaga a le Atua soifua. O le mea lea, o lo tatou so’otaga ma Iesu tatou te fiafia ai ma olioli ma pepese: *“Fiafia ia ma olioli le lalolagi, ua afio mai le Faaola.”* (Joy to the world, the Lord has come.)

**Tatalo:** Le Alii e, o le vine moni, tausii mai ia matou fesoota’i pea ma lau afio, ia avea ai i matou ma fua lelei e finagalo malie ai lau Afio. **Amene.**

**Mafaufauga Loloto:** O le a se faailoga e te manatua ai pea Iesu ma lona finagalo: ia tatou mafuta ma IA, e faa’ato’atoina ai lo tatou fiafia ma olioli?

**ASO TO’ONA’I, Tesema 22, 2018: “Amataga ma le i’uga”**

**Above and below**

**Tusi Faitau:** Ioane 3:1-21.

**Matua (ff.6-7):** *O lē ua fanau mai i la le tino, o le tino lea; o lē foi ua fanau i lā le Agaga, o le agaga lea. “Aua e te ofo auā na ou fai atu ia te ‘oe, E ao ona toe fanau mai outou...”*

O lo tatou i ai i le va i tau o le Kerisimasi, e faamanatu mai o Iesu, le Malamalama o le lalolagi, na ia faasusulu mai le pupula malosi i o tatou olaga e ave'esea ai le pogisa o le agasala ma le oti.

O Nikotemo, o le faailoga tutotonu o le tusi faitau o lenei aso, ua fai ma faatusa o le malosi ma le olaga solo lelei, aua sa ola talitonu ma mulimuli i se olaga ta'usa'afia faale-lotu. Na faalogo o ia i le igoa o Iesu, a e le'i masani ai i ana a'oa'oga. O le mea lea, na ia sailia ai lona avanoa e feiloai ma Iesu i le po. Na mana'o i se feiloaiga faapitoa e tusa ma a'oa'oga a Iesu. O lona naunau e tausia lona olaga tusaafia, na manatu ai Nikotemo e saili le amiotonu ia saunia ai o ia faale-agaga mo le olaga saogalemu i le tino ma le mafaufau. E faapei o le to'atele i nei ona po, sa leai se manatu o Nikotemo o Iesu o le Mesia na auina mai e le Atua e faataunuu le faamoemoe ma le faaolataga i le lalolagi uma. Sa leai foi sona manatu o le a na maua se fiafiaga ona o Iesu, pe afai e talia o ia. Na ia vaai ia Iesu ua na o se faiaoga iloga i mata'upu tau le Atua.

O lenei feiloa'iga, na faailoa atu ai e Iesu ia Nikotemo le tala e faataata i le "Toe Fanau mai", ua na o le Atua lava e mafaia ai, e lē o le faatinoga faale-tino lea (e tusa ma le fanau mai o le pepe i lona tinā). O se faamatalaga sa le malamalama lelei i ai Nikotemo pe faapefea ona faataunuu.

O le a le finagalo o Iesu mo Nikotemo ma i tatou foi e tataua ona malamalama lelei i ai? O afiga a le Atua o loo i ai le alofa tunoa, faamagalaga ma le faaolataga, o le tulaga lea tatou te mana'omia ona iloa ma malamalama i ai, e faapei o Nikotemo ma le tataua ona "toe fanau" i le Agaga mai le lagi. O le mea e ofo ai, ua na o Keriso Iesu lava, pe a ulufale lona finagalo i le loto, ona suia ai lea o le tagata tuai i le ola fou, "*O lenei, afai o ia Keriso se tasi, o le tagata fou ia; ua mavae le ola tuai, faauta, ua o'o mai le ola fou.*" (2 Korinito 5:17). O le mea lea, e ao ai ona tatou tapua'i ma vivi'i i lona Suafa mamalu!

**Tatalo:** Le Alii e, matou te mafaufau pea i lou Alo Pele e to'atasi, o Iesu lea. O ia na foa'i mai lona soifua atoatoa ia matou maua ai le ola fou, e tusa ma lo matou fanaufouina i la le Agaga. **Amene.**

**Mafaufauga Loloto:** O le a sau fesootaiga ma Iesu, o ia na aumai le ola fou i lou olaga? O le a sou lagona, po'o le a foi le uiga o le olaga ua faafouina mai le leaga i le lelei?

### **O le tamāoaiga i le mafaufau.**

[Apoapoa'iga: Aileen Quinn]

**ASO SA, Tesema 23, 2018:** "Ua ia te i tatou le Atua---o le a lona uiga?"

God is with us, but what does that mean?

**Tusi Faitau:** Mataio 1:18-23.

**Matua (f.23b):** ... *Ua ia te i tatou le Atua.*

O tusi faitau mo lenei vaiaso, tatou te iloa ai le folafolaina o le tala i le faaolataga---o le pupula malamalama o le Atua ua faamalamalamaina ai le lalolagi uma. O le manatu e pito sili ona tãua, ua mafuta mai le mana silisili ese. O le mafutaga ma le Alii ua sili lona latalata mai na i lo tatou iloa, aua o le Atua ua ia i tatou. O lenei faamatalaga e uiga i le mafuta mai o le Alii, o se lagona e faamaoni mo a'u i mea ua 'ou manatu i ai.

O nisi taimi, e faigata ona vaavaai atu i le lalolagi ma mafaufau e tusa ma le faatasi mai o le Agaga o le Alii i o tatou tagata. A e ui i lea, ua ou manatu e le o se upu tonu lea e faamatalaina ai lea lagona; aua i nisi taimi e lē o se tulaga e faatino, a e ia faasili ona tãua lo tatou talitonu i ai. O le mafuta mai o le Alii, ua lē o se tulaga e mafai ona faamatalaina atoatoa i le gagana faale-tagata, auā o se tulaga e faale-Atua.

O le tusi faitau o lenei aso ua tatou tau ane ai i igoa e lua e faatatau i le atalii o le a fanau mai i le tinā o Maria: Emanuelu, o lona uiga, "*Ua ia te i tatou le Atua*", ma le upu Iesu, o lona uiga, "*o le Faaola*." O le 'autū o le faatasi mai ma le faaolaina, e foliga ua feuluuluta'i faatasi i tusi faitau o lenei vaiaso, e foliga e lē mafai ona tuu'ese'eseina tulaga ia e lua. Ua ou talitonu, o lo'o i ai se tulaga e tãua loloto e tatau ai ona talitonu ma faatuatua i le faatasi mai o le Atua ia i tatou, a e tofua foi le tagata ma lona lagona e uiga i lea tulaga.

**Tatalo:** A o tatou faafeagai ma tiute o aso ta'itasi, ia tatou tuuina atu i luma o le Atua i o tatou taimi faapitoa lenei lagona tãua---o loo faatasi mai pea le Atua ma i tatou. **Amene.**

### **ASO GAFUA, Tesema 24, 2018: "Masalosalo po'o le fiafia i ai."**

**Naughty or nice?**

**Tusi Faitau:** Tito 3:4-7.

**Matua (f.5):** *Ona faaola mai ai lea o ia ia i tatou, e lē ona o galuega o i le amiotonu sa tatou faia, a e tusa ma lona lava alofa i le faata'eleina i le toefuata'iina ma le faafouina e le Agaga Paia.*

Na ou 'auai i se tasi o sauniga lotu i le vaeluaga o le po, sa lauga ai le faifeau i le mata'upu e uiga i le tutusa ma le ese'esega o Iesu Keriso ma le Santa Claus. Ia e fa'aeteete, auā e moni le tasi a e na o se faatusa le isi! O le tasi o ese'esega iloga, e le'i faailogaina e Iesu po'o ai ua lelei a o ai foi ua leaga. O le Faaolataga e lē faalagolago i mea tatou te galuea'iina.

O se tulaga lenei sa faigata ia te a'u ona malamalama ato'atoa i ai, aua o tagata o le Alii i so'u iloa, e mana'omia le agava'a, e faapei o upu a St. Francis of Assisi, "Ia folafola atu ma lauga le tala lelei, ia fa'aaoga upu tatau ma le tonu." Afai o le faaolataga e lē o se mea e faatinoina i galuega, ma afai foi o se mea e lē tatau ona o'o loloto i le agaga o le agalelei ma le alofa atu, o lona uiga, o le a la sa tatou upu e fai i lea mea?

O le tusi faitau mo lenei aso, o apoapoa'iga ia ua tusia e Paulo i lana tusi ia Tito, ma o upu ua tusia i lenei palakalafa ua faailoa ai le alofa tunoa o le Atua e tusa ma a'oa'oga a Paulo e faatatau i le amio, o le olaga faa-Kerisiano fou e tatau mo le mafutaga i Kereta. E tele a'oa'oga a Paulo ou te fia iloa ma malamalama atili i ai peitai, o le olaga faakerisiano ua si'omia ai i tatou i nei ona po, ua avea nei fuai'upu e fa ma lu'itau i le olaga taumafai ina ia avea ma Kerisiano faamaoni e aunoa ma ni faitioga.

E le avea lenei faamatalaga e fai ma pasese e taofia ai le faatinoina o “galuega lelei uma lava”, e tusa ma le folafolaga o le faaolataga, lea na liu-tino-tagata ai le Atua ma le faamoemoe ia tatou faatinoina galuega lelei e tusa ma le finagalo o le Atua, e faapei ona faatinoina ai le foafoaga a le Atua mai le amataga. O lo tatou sa'olotoga lea.

**Tatalo:** O mea uma tatou te faia, ia faia ma le loto atoa, e le ona o se totogi a e o mea lelei e tatau ona faatinoina. Manatua lenei mea, ia faia ma le agaga o loo i ai le sa'oloto ua mae'a ona saunia e Keriso Iesu. **Amene.**

**Mafaufauga Loloto:** O fea o lou olaga o lo'o atagia ai lou ola taumafai e lelei? O le a sou manatu pe afai e faagata lou ola taumafai?

### Aso Kerisimasi – Christmas Day

**ASO LUA, Tesema 25, 2018: “Ua taunu'u e pei ona masani ai.”**

**An ordinary arrival**

**Tusi Faitau:** Luka 2:1-7.

**Matua (f.7):** *Ua fanau e ia lana tama ulumatua, ua ia aui ia te ia i le ie, ua faataoto ia te ia i le fale manu, auā latou te le ofi i le fale e tali ai mālō.*

Ua tatou masani i le tala e uiga i le fanau mai o le pepe fou i le fale o manu: Na lē maua se avanoa o Maria ma Iosefa i le fale e tali ai mālō, ua na o le fale manu na to'a i ai ina ua po. O le faailoga o le fanau mai o Keriso e leai se aiga, o se ata e iai se uiga loloto ma o se vaaiga faa-atafifaga---e foliga e lē moni.

O le upu Eleni, “kataluma” ua faaliliuina o le “inn” (fale talimalo), ua faauigaina foi o le “guestroom” (potu mālōlō). E foliga o lo'o i ai se lagona o le alofa atu i lenei ulugalii mo so la avanoa aua ua faatumulia le fale tele. E mana'omia se nofoaga po o le fale e i ai se pito e maulalo (lower room), e avanoa lea mo manu pe a o'o i le po---e avanoa mo ni mālō pe afai ua tumu le fale tele. E foliga e lē o se tulaga e faapopolevaleina ai, a e o se faamatalaga i se tulaga e tatau ona faataunuu.

O le lalolagi i nei ona po ma le faamamafa o le soifua maloloina, o le fanau mai o se tinā e latalata i nofoaga e tausia ai manu, po'o le faaaoga o so'o se 'ie pulupulu, e atagia ai le soifuaga e vaivai le tamāoaiga. Peitai, i ona po o le fanau mai o Iesu, sa leai ia tulaga e faapei ona iai i nei ona po, o mea uma ua tusia o mea lava ia sa talia i na ona po.

Ua tatou faitauina le olaga mativa i le fanau mai o le pepe fou i le fale o manu, ua tatou taumafai foi e faamatala le “Iesu o le tagata ‘ese” mai le amataga lava. Peitai, ua ou talitonu o le tala i le fanau mai o le pepe fou i le fale e faigofie ona iloa, ua fesaga’i foi ma le olaga masani faale-tagata, o lo’o ‘aumaia ai iina se uiga loloto o lona afio mai. E faapei o lenei: Ua ia te i tatou le Atua. Ua lē o se maota o se tupu, po o le te’ena foi o nofoaga ua faatauvaa i manatu, a e ua afio mai lava i le malamalama mo le lalolagi uma.

**Tatalo:** IESU e, ua matou manatua le liu-tino-tagata, fesoasoani mai ina ia matou iloa ona talia lou afio mai i o matou aiga. Ia matou iloa e te ‘auai ia i matou i so’o se aso ma soo se taimi. **Amene.**

**Mafaufauga Loloto:** Pe faapefea ona talia Iesu i lou aiga, a e maise lava i le aso nei?

**ASO LULU, Tesema 26, 2018: “E ma’eu le loto tele.” Quiet strength**

**Tusi Faitau:** Luka 2:8-20.

**Matua (f.19):** *A o Maria ua taofi ia upu uma, ua mafaufau ai i lona loto.*

Ou te fiafia ia Maria; o loo ia te ia le malosi, o le uiga o lea manatu, o ia o le tagata e *“loto mauulalo ma aqamalu.”* E le taumateina le malosi sa i lenei tinā talavou, e fa’afeagai ai ma tulaga faigata o le olaga auā e tumau le loto talitonu ma faatuatua. O lona lotomaulalo e lē o se faailoga o le pala’ai loto, ae o le faailoga o le talitonu faamaoni i le Atua ma le musumusuga i lona loto.

O lenei tusi faitau, Luka 2:19, o se tasi o fuai’upu iloga i le Tusi Paia atoa; e tamaoaiga ma o lo’o aumai ai le lagona o ‘upu faatauloto o uiga i le atamai o lo’o ia Maria. E lē gata i lea, o le lagona o le faatalitali i le o’o mai o le “tala lelei.” O le tu’ufa’afeagai o le olioli tele ua faaalii i le ‘au leoleo mamoe, ua sili atu ona loloto le lagona ua o’o ia Maria. E lē masalomia ua pogai nei uiga uma, ona o lenei tinā talavou, o le fa’atoā o’o lea ia te ia se tulaga faapenei, po’o se isi foi mafua’aga e sili atu ona taua. Ou te talitonu, o le “tala lelei” ua ta’ua nei, o se tala e felefele ma lautele---o le faaolataga ua foa’i mai mo i tatou, a e lē o se faatinoga e tumamao i la tatou vaai. E lē taumateina ua iloa e Maria lea tulaga; sa le’i matuā fa’aalia tele sona fiafia auā o lo’o lilo ia te ia le loloto ato’atoa o lenei mea ua tupu---ua fanau mai le tama o le “Faaola.”

Afai ua le o lea, o lona uiga o le lavea’iina. Ua tatou malamalama, e lē o le lavea’i mai puapuaga faale-lalolagi po’o le lavea’i mai tigā o le tino, o tigā ia ma puapuaga e gata i le olaga nei. Peitai, ou te talia le ‘auala na faia e Maria, e faigofie lea mo a’u. Aua ou te fiafia e mafaufau loloto nai lo le tautala, ma o le faatinoga ua vaaia ia Maria ma lona mafaufau i ai, ua sili lea ia te a’u.

**Tatalo:** Le Alii e, ia e faamalalama i o matou loto le faaaliga o lou liu-tino-tagata, ina ia tupu ai lo matou faamoemoe valalata i le faaolataga na e saunia mo le lalolagi agasala. **Amene.**



**Mafaufauga Loloto:** O lē fea taimi e tupu ai le lagona e tete'e atu nai lo le fia mafuta?

**ASO TOFI, Tesema 27, 2018: “Ua faaaauu pea le malamalama.”**

**Longer light**

**Tusi Faitau:** Salamo 97.

**Matua (f.11):** *Ua luluina le malamalama mo lē amiotonu, ua luluina foi le olioli mo e ua loto faamaoni.*

A mavae atu le aso Kerisimasi ma faatalitali mo le o'o mai o le Tausaga Fou, o le va i taimi lelei lea e mapu ane ai mo sina malologa pu'upu'u mai le tele o mafutaga ma faafiafiaga, a e maise le pisi o le masina o Tesema. I lenei itu o le lalolagi o lo'o o'u nofo tumau ai, ua amata ona faitau le tele o itula o le aso e malamalama ai i le itu i mātū o le kelope.

O le tusi faitau mo lenei aso ua atagia ai le luluina o le malamalama i le uiga faale-Atua, ma lona pupula e ufitia ai le lalolagi uma. O lo'o faailoa i le faaaliga le malamalama silisili ese i le tuu faafeagai ma le pepe fou o lo'o tatou faalogo ai so'o i lenei va i tau o le Kerisimasi. O le upu moni, o upu nei na tusia anamuā a e le'i fanau mai le pepe o Iesu, peitai, ua latou tautala i le amiotonu ua tupu ai le faamoemoe, ma tupu a'e ai le fesili masani ia i latou na latou mua'i laasia lenei vaiaso. A e tatou te le'i faitau i le luluina o le malamalama mo lē amiotonu, ua ta'u mai e le fai Salamo, o le Atua: *“Na te lavea'iina i latou ai lima o e amio leaga.”* (f.10b).

Peitai, po o le a lava fuafuaga faale-lalolagi o loo faia nei, tatou te iloa lava e lē atoatoa ona faia le amiotonu i le lalolagi, e pei foi ona lafi le solitulafono e lē faasalaina. O le mea lea, o le fesili ua tula'i mai, o le a lā le uiga moni o le upu lavea'iina ma puipuia e le Atua.

O le tele o Salamo ua faitauina, i so'u iloa, e faapei o se faamalosi loto e aumai ai se faamoemoe mo e ua tigaina ma mafatia---i upu faala'ei'au, ma le faaolataga e maua i le o'o mai o le ola fou. Tatou te le mafai ona faamasino fuafuaga uma ia i auala faale-lalolagi, e faapea foi ona tatou le mafai ona iloa mea lilo i talatu o mea ua vaaia.

**Tatalo:** Le Atua e, a e le'i faia le lagi ma le lalolagi sa leai ni atumauga. Ia faailoa mai ia te i matou le malosi o lou alofa i auala e tusa ma lo matou iloa.  
**Amene.**

**Mafaufauga Loloto:** O i matou o le malamalama o le lalolagi--pe faapefea ona matou faailoa atu lea malamalama i isi tagata i lenei aso?

**ASO FARAILE, Tesema 28, 2018: “O faaaliga o le alofa.”**

**Revelations of love**

**Tusi Faitau:** Luka 2:21-40.

**Matua (ff.34-35):** *Ua faamanuia atu Simeona ia te i laua, ua fai atu foi ia Maria lona tinā, “Faauta, ua tu'u le tama nei e pa'u'u ai ma toe tutū ai tagata e*

*to'atele o i Isaraelu; e fai foi ma faailoga e ta'uleagaina; ---e tu'ia foi lou lava loto ia ati i le pelu---ina ia faaalua mai ai manatu o tagata e to'atele."*

Ina ua fanau mai la'u tama (son), sa ou le'i matuā saunia lelei e fetaia'i ma lagona faigata na o'o ifo i lo'u loto. Na avea ata tifaga i Hollywood ma faasinoga ua ou talitonu ai, po o le a lava le faigata e o'o i ai le fanau mai o le pepe, e fa'agae'etia lava le loto i le alofa e sili lea i mea uma. O a lava tiga ma faigata, a o'o mai loa le taimi, e galo lava ia mea uma. E sili ona ou popole i le tausiga o la'u tama nai lo lo'u manatu ifo ia te a'u lava, a e maise lava i ulua'i aso a o pepe, ina o o'u taumafai foi e taofi pea i lo'u loto ni lagona popole ma le atuatuvaile ia te a'u. Ou te vaavaai i le fiafia mai o nisi tagata i la'u pepe, ma lo latou manatu pe aisea ou te lē faapea ai. Ou te faafetai i le musumusuga lilo i lo'u loto, a e maise o lo'u aiga ma le faalapopotoga o le Tausia o le Soifuaga Maloloina, sa latou fesoasoani mai aua le 'ave'esea o ia lagona e faapei o se miti---o le miti i lo'u alofa i la'u pepe.

Ou te ofo lava ia Maria e tusa ma le lagona sa ia te ia i le Malumalu; faamata o lona lē mau gagana na faapogai mai i le leai o se malologa lelei i po ua mavae? Faamata na mafai e Maria ona tau'ave le tele ma le loloto o upu na faamatala e Simeona ma Ana e faatatau i lana tama (son)? O le tama meamea o loo tagi a o si'i i ona lima i itula paganoa?

E i ai taimi e faamalosi ai le faatinoina nei loa o se mea, a e faatuatua'i i se mea sa sili ona manatu i ai, po o se mea foi sa tatau lava ona faatino. Peitai, e iai lo'u poto masani, atonu tatou te lē manatu i lea mea, a e o lo'o i ai pea le fesoota'iga.

E faapei ona ou alofa i la'u tama e tupu ma saga tupu pea, atonu o se faaaliga lea o le alofa o le Atua; e le faatasi ona pa'i mai, a e tupu faatasi ma i tatou, e faailoa mai ia i tatou i auala eseese ina ua tatou mafaufau ma manatunatu pea i ai.

**Tatalo:** Le Alii e, o nisi taimi o le olaga e faigata ona fofō ma faamalieina. Fesoasoani mai ia matou iloa ona saili atu ina ia matou iloa loloto le uiga moni o lou alofa. **Amene.**

**Mafaufauga Loloto:** Pe i ai se vaega i lou olaga e tupu tele ai lou mana'o ia te 'oe lava? E mafai ona e faaitiitia lea finauga i lou lava loto i le aso nei?

**ASO TO'ONA'I, Tesema 29, 2018: "Tu'u pea le Atua i le Atua."**

**Let God be God**

**Tusi Faitau:** Esekielu 36:22-32.

**Matua (f.28b):** ... e fai foi outou mo'u nuu, e fai foi a'u mo outou Atua.

O le tele o molimau tusia i le Feagaiga Tuai, e faapei o le tusi faitau o lenei aso, ua faaalua ai o le tamāoaiga tele ua foa'i mai e le Atua mo Isaraelu, ua le o se tulaga ua faapitoa na o i latou lava, a e ina ia "faapaiaina" ai le silisili ese o lona suafa. O lenei faatinoga o le silisili ese o le finagalo o le Atua, ua faia ina ia iloa ai e le lalolagi uma a e le na o se vaega to'aitiiti ua filifilia.

Ou te talitonu, e faigofie pe a taga'i toto'a i le matagofie o le poloaiga e uiga i le "loto fou" ma le "agaga fou", e pei ona ta'ua i le fuaiupu 26, a e le faagaloina foi isi faasinoga e faatatau lava i lenei mata'upu ma le finagalo alofa o le Atua. O le upu moni, o lu'itau ma faigata, o mata'upu ia e lua e tataua ona mafaufau i ai e tusa ma le faitauina o le Tusi Paia. O tulaga masani o le soifuaga faa-Kerisiano, o le taga'i toto'a lea i faatinoga e le masani ai, a e o loo aofia ai uiga masani o le alofa o le Atua, e faapei o uiga ta'atele ia e vaايا i taimi o le aso Kerisimasi. Peitai, e faapei foi ona ou mua'i faailoa, e faapea: O le faaolataga a le Atua e 'ese mai faamafanafanaga, ma e sili foi ona ese mai le faatinoga i galuega.

O se vaega itiiti o le fuaiupu e 28 ua ou filifilia e fai ma Matua, o le ki lea i lenei mata'upu. Ua faaali mai e le Atua le faasologa e tataua ona mulimuli ai. Ua masani ona tatou faaali i le Atua mea ua tatou manana'o i ai, peitai, e galo i o tatou loto lo tatou tiute tau'ave---o i tatou o tagata o le Alii.

Aua le manatu ua sili i tatou, aua le taumafai e pulea mea uma, aua foi le talitonu o mea uma ua lelei, pe a fai e uma ona tatou faia---e pule aoao le Atua. O i tatou lava o tagata o le lalolagi e lē atoatoa. Tu'u pea le Atua i le Atua.

**Tatalo:** O lau lava Afio o le Atua lea, o i matou foi o ou lava tagata. **Amene.**

**Mafaufauga Loloto:** Pe a fai e mafai, ia mafaufau ma manatunatu i le uiga o le fuai'upu e 28.

**ASO SA, Tesema 30, 2018: "O le nofoalii e mau ai." A dwelling-place [Faigalotu TV – Kereti Faiai F.T. EFKAS Afono]**

**Tusi Faitau: Salamo 90:1-2, 12-17.**

**Matua (f.1):** *Le Alii e, ua fai 'oe ma mea matou te nonofo ai i lea tupulaga ma lea tupulaga.*

O le tatalo matagofie lenei Salamo. Ua iloa lona atoatoaga ma lona talafeagai i le tagata. O lo'o aofia ai le viiga, o upu faamafanafana i lē ua mafatia, a e maise o le olega ina ia finagalo alofa mai le Atua. "*Ia e faamalilie mai ia te i matou i le taeao i lou alofa*" (f.14); faamata e lē o upu lava ia ua tatou masani ai i a tatou talosaga i le tele o po?

O upu tusia i le laina muamua lava ou te fiafia tele i ai. "*(Le Alii e,) Ua fai 'oe ma mea matou te nonofo ai i lea tupulaga ma lea tupulaga.*" O le upu, "*lea tupulaga ma lea tupulaga*", e tãua lea ia te a'u. O lenei Salamo o se vaega e faatatau i le pologa o Isaraelu, ua faamatala le liliu 'ese o fofoga o le Atua mai ia te i latou. Peitai, e tumau pea le agalelei ma le alofa o le Atua. E faaopoopo i le na, e avea le Atua ma nofoaga e nonofo tumau ai i lea tupulaga ma lea tupulaga. E fusia faatasi ai lo latou lalolagi i soo se mea.

Afai e mafaufau i le faatasi mai o le Atua e pei ona faamatalaina, "*o le mea matou te nonofo ai*", o le faalauteleina lea o le tamãoaiga o avanoa. O le Atua i lona nofoalii, o le aiga lava lea. Ua le o se nofoaga e fealua'i ai i le sau ma toe

alu, a e o le nofoaga o lo'o i ai le ola, o lo'o i ai mea uma lava. Ou te fiafia tele ai. Ou te ta'utino atu, ua ou lē iloa ua ou le malamalama foi i le atoatoa o le Atua: Ua lē o se tagata, po o se mea fai tino, po o se mea foi e tautala i ai, a e o le punavai lea o le alofa. Ua moni ia mea ia te a'u, a e ui i lea, ua lē o ia te a'u le malosi e faatino ai. A e ona o le Atua e lē o se mea-faitino, o le pogai lea ua faigata ai ona faamatala atoatoa i se gagana, a e tatou te taumafai pea. A e ui i lea, o le iai o lenei nofoaga tumau, le nofoaga e pei ona ta'ua, o lea ua ou iloa nei. O se tulaga e ofo ai ona o a'u o le tusi-tala e tataua ona iloa, peitai, o lea ua mafai ona 'ou faamatalaina--e i ai le Atua.

**Tatalo:** Le Alii e, o 'oe lava o le 'olo matou te sulufai i ai i taimi faigata o le olaga, i faanoanoaga ma faafiafiaga, I taimi e fanau mai ai ma taimi e oti ai, faailoa mai ia matou iloa atili lou finagalo. **Amene.**

**Mafaufauga Loloto:** O fea, a e pe faapefea foi le nofoaga e te fia mapu atu i ai? O a foliga o le nofoaga ua saunia e le Atua e sili ona e loto i ai?

**ASO GAFUA, Tesema 31, 2018: "Tula'i ia, inā malamalama!"**

**Arise, shine!**

**Tusi Faitau:** Isaia 60:1-9.

**Matua (f.1):** *Tula'i ia, ina malamalama ia, auā ua o'o mai lou malamalama; ua alu a'e foi le pupula o le Alii i ou luga.*

O le a 'ea se fe'au ua pito sili ona tāua i le o'o mai o le Tausaga Fou, e faapei o le vala'au ia faatamaoigaina? Ua valaau Isaia i tagata o le Atua ina ia tula'i e talia poloa'iga mai lē silisili 'ese ma ia si'i a'e maualuga o latou ulu. Ou te lē iloa pe na faapefea mai ou aso. A e le taumate ua misi ia te 'oe le mavae atu o le 2018, po'o lou mana'o ia alu atu ia?

Ou te toe fia tepa i tua i le 2016 ona o ni mafua'aga iloga, e le gata ia te a'u lava a e o le vaaiga lautele faale-kolope, tatou te iloa lava o le mou malie atu o le aso 31 o Tesema ma faitauina le 1st. o Ianuari, e leai lava se suiga iloga pe mao'a e tupu mai ai. O foliga masani lava e tusa ma fesuia'iga o aso ma masina o le tausaga, peitai, o lo'o 'au mai ai se fe'au taua: Taga'i i luma po'o a ni mea fou e tutupu mai. O le a sou manatu e uiga i sau ta'utinoga faapitoa mo le Tausaga Fou, e fia ni a outou talatalanoaga ma e masani e tusa ma mana'oga iloga e tataua ona toe faalelei i le tausaga fou, a e pe faapefea foi ona faatino ma faataunuu? Atonu e le tupu so'o, a e o ni faatinoga e lelei ona faatinoina. Mo lenei tausaga, o le a se manatu e tusa ma a'u ta'utinoga--o se faatinoga e sili ona malosi i mafaufauga ma manatu nai lo le faatinoina. Ou te mana'o ia fesiligia a'u pe faapefea ona 'ou tula'i e tali atu i le fe'au ua valaau mai ai Isaia: Ia tula'i e talia le malamalama. A e faapefea ona ou faasusulu atu le malamalama o le Kerisimasi ia pupula ai le masina o Ianuari? E faapefea ona faaaau lea malamalama i le na tausaga fou pe a aulia atu? Faamata o le a sona fua aoga e lelei mo a'u?

Ua tofu le tagata ma ana lava fuafuaga, pe faatelegese pe faavave foi ona amata faafiafiaga o le Tausaga Fou. A e ia manatua, ia faamuamua ma faatele le viiga o le Atua, ma ia tumau ai pea lea viiga i aso uma ona o le pupula ma le malamalama o le tala lelei ia Iesu Keriso.

**Tatalo:** Fesoasoani mai, le Alii e, ia matou tula'i ma le mautinoa e talia le valaau. Ia matou iloa ona faapupula le malamalama o lau Afio---susulu atu i le lalolagi pogisa. Ia susulu faapei o fetu o le lagi. **Amene.**

**Mafaufauga Loloto:** Po'o i ai sau ta'utinoga mo le tausaga fou e mafai ona faasusulu atu i le pogisa o le lalolagi?

**!!! Ia manuia le Tausaga Fou !!!**